

শ্রীহেমেন্দ্রবিজয় সেন, এম্-এ, বি-এল,

প্রণীত

সংশোধিত ও পরিবর্তিত

সংস্করণ

[ অক্টোবর, ১৩৫৩ ]

মূল্য এক টাকা


প্রকাশক—শ্রীসুবোধচন্দ্র মজুমদার  
দেব সাহিত্য-কুটীর  
২২।৫ বি, বামাপুকুর লেন, কলিকাতা

শ্রীযোগেশচন্দ্র বন্দ্যোপাধ্যায়  
সম্পাদিত

প্রিন্টার—এস. সি. মজুমদার  
দেব-প্রেস  
২৪, বামাপুকুর লেন, কলিকাতা

## উৎসর্গ

দেশ-মাতৃকার পূজা—মহাত্রত জীবনের গাঝে  
বরণ করিল যারা ; পরাধীন মাতৃভূমি হেরি'  
হৃদয়-তন্ত্রীতে যার অশরীরী মহাধ্বনি বাজে ;  
অত্যাচার-উৎপীড়ন করে জয় বাজাইয়া ভেরী ;  
দেশে দেশে যুগে যুগে করে দান শোণিতের ধারা,  
ক্ষুধা-তৃষ্ণা মহাক্লেশ হেলায় সহিল অনিবার ;  
মহানন্দে কারাগারে বরণ করিয়া নিল যারা ;—  
দিলাম তাদের করে 'নেতাজী স্মরণ' আমার ।





## গ্রন্থকারের নিবেদন

বাংলার তথা ভারতের গৃহে গৃহে সুভাষচন্দ্র বসুর নাম  
শ্রদ্ধা প্রাপ্তস্মরণীয় হইয়া উঠিয়াছে। তাঁহার অসামান্য প্রতিভা,  
অলৌকিক স্বার্থত্যাগ, অদ্ভুতপূর্ব তেজস্বিতা, অদ্বিতীয় সজ্জগঠন-  
শক্তি, সর্বোপরি নির্মল মন্দাকিনী-ধারার মত তাঁহার অকৃত্রিম  
অনাবিল স্বদেশপ্রেম তাঁহাকে ধনি-দরিদ্র-নির্বিশেষে ছোট-  
বড় সকলের প্রিয় করিয়া তুলিয়াছিল।

হইতে পারে তিনি জীবনে সাক্ষ্য লাভ করিতে পারেন  
নাই; কিন্তু স্বদেশের স্বাধীনতা অর্জনের জন্য তাঁহার জীবন-  
ব্যাপী প্রচেষ্টা রাণা প্রতাপের মত ইতিহাসের পৃষ্ঠায় তাঁহাকে  
অমর করিয়া রাখিবে, সন্দেহ নাই।

তাঁহার জীবন বিফলতায় পর্যায়ান্তিত হইলেও তাঁহার  
মহাজীবনে শিক্ষার অনেক কিছু আছে। তাই বাংলা-মায়েদ  
অঞ্চলের নিধি সুভাষচন্দ্রের জীবন কাহিনী প্রণয়নে আমরা  
এই ক্ষুদ্র প্রয়াস।

এই গ্রন্থ প্রণয়নে আমি বহুস্থানে “কলিকাতা মিউনিসিপ্যাল  
গেজেট, সুভাষ-সংখ্যা”র সাহায্য গ্রহণ করিয়াছি। তন্ত্র  
গাময়িক পত্রিকা, সংবাদ-পত্র, শ্রীযুক্ত হেমেন্দ্রনাথ দাশগুপ্ত  
প্রণীত “দেশবন্ধু-স্মৃতি”, অধ্যাপক শ্রীবিনয়কুমার সরকার প্রণীত  
“বিনয় সরকারের বৈঠকে”, সুভাষবাবুর নিজের রচনা “স্বদেশী  
ও বয়কট” (ইংরেজী) হইতেও অনেক সাহায্য গ্রহণ

করিয়াছি। তজ্জন্ম উপরিলিখিত পুস্তক ও পত্রিকার লেখক ও সম্পাদকগণকে আমি আমার আন্তরিক কৃতজ্ঞতা জ্ঞাপন করিতেছি।

পরিশেষে “দেব সাহিত্য-কুটীরের” স্বত্বাধিকারী শ্রদ্ধেয় শ্রীযুক্ত সুভাষচন্দ্র মজুমদার মহাশয়কে আমার আন্তরিক কৃতজ্ঞতা জ্ঞাপন না করিলে আমার কর্তব্য অসম্পূর্ণ থাকিয়া যায় ; কারণ তিনিই সুভাষচন্দ্র বঙ্গর জীবন-চরিত প্রণয়নে আমাকে উৎসাহিত এবং সর্বপ্রকারে সাহায্য করিয়াছেন। তাঁহার উৎসাহ এবং সাহায্য না পাইলে স্বদেশপ্রেমিক নেতাজী সুভাষচন্দ্রের কীর্তি-কাহিনী লেখনীমুখে প্রকাশিত হইত কি না সন্দেহ।

মঙ্গলময় ভগবান্ নেতাজী সুভাষচন্দ্রের আত্মাকে শান্তিদান করুন।

১১ বি, শম্ভুবাবু লেন,  
কলিকাতা  
দোল-পূর্ণিমা, ১৩৫২ বঙ্গাব্দ

} শ্রীহেমেন্দ্রবিজয় সেন

## সম্পাদকের নিবেদন

শ্রদ্ধাস্পদ শ্রীযুক্ত হেমেন্দ্রবিজয় সেন মহাশয় যখন “নেতাজী সুভাষচন্দ্র’ লিখিতে আরম্ভ করেন, তখন পর্য্যন্ত এই বিরাট পুরুষটির সব কথা ও তাঁহার অলৌকিক কীর্তির অনেক-কিছু সাধারণের অজ্ঞাত ছিল। কাজেই মাত্র এক মাসের মধ্যেই প্রথম সংস্করণ ফুরাইয়া যাওয়ার দ্বিতীয় সংস্করণ ছাপানোর আগে বইখানি আবার নূতন ভাবে পরিমার্জনের প্রয়োজন মনে হয় : দেব সাহিত্য-কুটীরের কর্ণধার শ্রীযুক্ত সুবোধচন্দ্র মজুমদার মহাশয় সে দায়িত্ব আখারই কাঁধে চাপাইয়া দেন।

এই দায়িত্ব আমার পক্ষে অতি কষ্টকর হইলেও আমি তাহা যথাসাধ্য বহন করিবার চেষ্টা করিয়াছি ; কিন্তু কতটুকু কৃতকার্য হইয়াছি, সে বিচার করিবেন আমার পাঠক-পাঠিকাগণ। তবে একটা কথা বলা আবশ্যিক মনে করি।

আমার কলম-চালনা ও ভিন্ন দৃষ্টিভঙ্গীর ফলে পুস্তকের গৌরব যদি কোথাও ক্ষুণ্ণ হইয়া থাকে, অথবা কাহারও আপত্তিকর কিছু ইহাতে প্রবেশ করিয়া থাকে, তাহা হইলে সেজন্য দায়ী এই নগণ্য সম্পাদক,—মূল গ্রন্থকার হেমেন্দ্রবিজয় বাবু একেবারেই দায়ী নহেন। ইতি—

কলিকাতা  
১১নং কৈলাশ বসু ষ্ট্রীট  
২ই জ্যৈষ্ঠ, ১৩৫৩

শ্রীযোগেশচন্দ্র বন্দ্যোপাধ্যায়  
সম্পাদক

## সূচীপত্র

এক—বাল্য-জীবন ...	...	...	১
দুই—বিদ্যার্থী-জীবন...	...	...	৬
তিন—কর্ম-জীবন ...	...	...	১৩
দেশবন্ধু চিত্তরঞ্জনের সাহচর্য ...	...	...	১৩
জন-নায়ক ...	...	...	২৭
কলিকাতা কর্পোরেশনের অন্ডারম্যান ও মেরর সুভাষচন্দ্র ...	...	...	৩৭
ইয়োরোপ-প্রবাস ...	...	...	৪৫
ভারতীয় জাতীয় মহা-সমিতির সভাপতি ...	...	...	৫৩
চারি—অন্তর্দান ...	...	...	৬৩
পাঁচ—অন্তর্দানের বিবরণ ...	...	...	৭৫
ছয়—সুদূরের যাত্রা ...	...	...	৯১
সাত—খাজাদ-হিন্দ ফৌজ ও খাজাদ-হিন্দ গভর্নমেন্ট ...	...	...	১০১
আট—নজপাও ...	...	...	১৩২
নয়—সুভাষ-স্মরণে ...	...	...	১৪০
দশ—ব্যক্তিত্ব ...	...	...	১৪৪

---



# নেতাজী সুভাষচন্দ্র

—

এক

## বাল্য-জীবন

জন্ম—মাতাপিতা—প্রথম বিদ্যাশিক্ষা আরম্ভ।

বাংলার সুসন্তান, দেশ-মাতৃকার একনিষ্ঠ সেবক অলোক-সামান্য ত্যাগী, সুখে-দুঃখে নিঃস্পৃহ, বাঙ্গালী বীর, নেতাজী সুভাষচন্দ্র বসু মহাশয় ১৮৯৭ খৃষ্টাব্দের ২৩শে জানুয়ারী মহানদীর তীরবর্তী কটক সহরে সর্গচ্যুত মন্দার-কুম্বের মত ধূলি-মলিন ধরণী-বক্ষে এক শুভ মুহূর্তে সর্বপ্রথম সূর্যালোককে অভিনন্দিত করেন।

এই দিন যে নবীন জ্যোতিক ভারতের ভাগ্য-গগনে সমুদিত হইল, তাহার বিমল দ্যুতি আজ ভারতের এক প্রান্ত হইতে অপর প্রান্ত পর্যন্ত পরিপূর্ণ বিকীর্ণ, এবং তাহার প্রভাবে, আজ শুধু আসমুদ্র-হিমাচল নহে, প্রতীচির শ্বেতদ্বীপ পর্যন্ত চঞ্চল হইয়া উঠিয়াছে!

সুভাষচন্দ্রের পিতার নাম জানকীনাথ বসু এবং মাতার নাম প্রভাবতী বসু। বসু-পরিবারের আদি নিবাস জেলা চব্বিশ-পরগণার অন্তর্গত কোদালিয়া গ্রামে। জানকীনাথ

বাংলাদেশ ত্যাগ করিয়া সুদূর কটকে ব্যবহারাজীবের কার্যে যোগদান করেন। এই স্থানে ভাগ্যলক্ষ্মীর অপার করুণা তাঁহার উপর বর্ষিত হইতে থাকে। ধীরে-ধীরে তিনি স্থানীয় উকিলগণের শীর্ষস্থান অধিকার করিয়া বার-লাইব্রেরীর নেতৃত্ব এবং গভর্নমেন্ট প্লীডারের পদ পর্য্যন্ত লাভ করিয়াছিলেন। তাঁহার কার্যে সন্তুষ্ট হইয়া গভর্নমেন্ট তাঁহাকে “রায় বাহাদুর” উপাধি দ্বারা সমলঙ্কিত করেন।

জানকীনাথ নিজে যেরূপ বিদ্বান্ ও বিদ্যোৎসাহী ছিলেন, তিনি স্বীয় পুত্রগণকেও অনুরূপভাবে শিক্ষিত করিবার প্রয়াস পান। ব্যবহারাজীবের কার্যে উপার্জিত বিপুল অর্থ তিনি পুত্রগণের সুশিক্ষার জন্ত অকাতরে ব্যয় করিয়াছেন। তাঁহার আটটি পুত্র এবং ছয়টি কন্যার মধ্যে দুইটি পুত্র এবং চারিটি কন্যা পূর্বেই পরলোক গমন করিয়াছেন; অবশিষ্ট ছয়টি পুত্রের নাম—সতীশচন্দ্র, শরৎচন্দ্র, সুধীরচন্দ্র, সুরেশচন্দ্র, সুনীলচন্দ্র এবং সুভাষচন্দ্র।

জানকীনাথ পুত্রগণের প্রত্যেককে শিক্ষাদানের জন্ত ইয়োরোপে পাঠাইতে দ্বিধা বোধ করেন নাই; কারণ, তিনি বুঝিয়াছিলেন,—পাশ্চাত্ত্য শিল্প, বিজ্ঞান ও শিক্ষা আয়ত্ত করিতে না পারিলে, এবং যে জমস্ত জাতি বর্তমান জগতে প্রভাব বিস্তার করিয়া বড় হইয়াছে তাহাদের সংস্পর্শে না আসিলে, জগতের বুকে মানুষের মত দাঁড়ান সম্ভব নহে।

জানকীনাথের ইচ্ছা আজ পরিপূর্ণ হইয়াছে—তাঁহার সকল পুত্রই কৃতবিদ্ব ; তন্মধ্যে দুই পুত্র—সুভাষচন্দ্র ও শরৎচন্দ্রের

যশোরশি সূর্য ও পূর্ণচন্দ্রের মত ভারতাকাশ চির-দীপ্তিতে সমুদ্ভাসিত রাখিবে।

জানকীনাথ নিজে অত্যন্ত তেজস্বী ছিলেন। গভর্নমেন্ট প্রীডার এবং গভর্নমেন্টের উপাধিধারী হইলেও তিনি কোন দিন গভর্নমেন্টের অন্তায় কার্য সমর্থন করিতে পারেন নাই। আইন-অমান্য আন্দোলনের সময় গভর্নমেন্ট যখন প্রচণ্ডভাবে দমন-নীতির প্রয়োগ করিতে আরম্ভ করিয়াছিলেন, তখন তেজস্বী জানকীনাথ গভর্নমেন্টের এই কার্যের প্রতিবাদ-স্বরূপ “রায় বাহাদুর” উপাধি বর্জন করিতেও কুণ্ঠা বোধ করেন নাই। পিতার এই তেজস্বিতা এবং স্বাধীনচিত্ততা পুত্র সুভাষচন্দ্রের মধ্যে পূর্ণভাবে সংক্রমিত হইয়াছিল।

জানকীনাথ পঁচাত্তর বৎসর বয়সে পরলোক গমন করেন। সুভাষচন্দ্রের জননী প্রভাবতীও সর্বাংশে স্বামীর অনুরূপ ছিলেন। তাঁহার অসামান্য দয়া, মায়া, স্নেহ প্রভৃতি চারিত্রিক সদগুণরাজি তাঁহার পুত্র-কন্যাগণের—বিশেষতঃ সুভাষচন্দ্রের মধ্যে সমুজ্জ্বলভাবে বিকশিত হইয়া উঠিয়াছিল।

তিনি আদর্শ হিন্দু রমণী ছিলেন; কিন্তু সুশিক্ষার জন্য পুত্র-কন্যাগণের ইয়োরোপ গমনে কখনও বাধা প্রদান করেন নাই। দীন-দরিদ্রের দুঃখ-দুর্দশা দর্শনে তাঁহার হৃদয় বিগলিত হইত এবং তিনি সর্বদাই মুক্তহস্তে তাহাদের দুঃখ-মোচনে নিরত থাকিতেন। পরবর্তীকালে বিভিন্ন কৰ্মক্ষেত্রে মাতার এই পরদুঃখ-কাতরতাও সুভাষচন্দ্রের মধ্যে আত্ম-বিকাশ করিয়াছিল।

বিগত ১৯৪৩ খৃষ্টাব্দের ২৮শে ডিসেম্বর তারিখে শরৎচন্দ্র ও সুভাষচন্দ্রের জননী প্রভাবতী দেবী ছিয়াত্তর বৎসর বয়সে হিন্দুর চির-আকাঙ্ক্ষিত স্বর্গে গমন করিয়াছেন।

পাঁচ বৎসর বয়সে সুভাষচন্দ্র কটকের প্রটেষ্ট্যান্ট ইয়োরোপীয়ান স্কুলে ভর্তি হন। এই বিদ্যালয়ে তিনি দ্বাদশ বৎসর বয়স পর্য্যন্ত অধ্যয়ন করিয়াছিলেন।

সুভাষচন্দ্রের বাল্য-জীবনের এই ছয়-সাত বৎসর, সমগ্র জীবনের অতি সামান্য অংশ হইলেও, চরিত্র-গঠনে ইহা তাঁহাকে নিতান্ত কম সাহায্য করে নাই! পাশ্চাত্য মানব-চরিত্রের দোষ-গুণ তিনি অতি মনোযোগের সঙ্গেই লক্ষ্য করিতে পারিয়াছিলেন! পাশ্চাত্যের সজীবতা ও নিজেদের জড়তা তিনি নিজের অন্তরে অনুভব করিয়া ক্ষুণ্ণ হইয়া পড়িতেন! আর সঙ্গে-সঙ্গে সমস্ত দুর্বলতা, গ্লানি ও অপমান এক মুহূর্তে দূরে নিক্ষেপ করিয়া সিংহ-বিক্রমে জগতে দণ্ডায়মান হইবার আকাঙ্ক্ষায় অনুপ্রাণিত হইয়া উঠিতেন! আর তখন হইতেই কি এক দৃঢ় সঙ্কল্পের নিশ্চয় গুরুভার তাঁহার ভবিষ্যৎ জীবনের সুপ্ত ভাবরাশিকে মহানদীর তরঙ্গ-কল্লোলে প্রতিধ্বনিত করিয়া, তাঁহাকে উন্মনা করিয়া তুলিত!

সুভাষচন্দ্র বাল্যকাল হইতে চিন্তাশীল ছিলেন। বিদ্যা-শিক্ষার প্রতি তাঁহার অনুরাগও বাল্যকাল হইতেই পরিলক্ষিত হইত। লেখাপড়ার জন্য তাঁহাকে কোনদিন কোনরূপ তাড়না করিতে হয় নাই। স্বাভাবিক সংস্কার-বশেই যেন তিনি পাঠ্য পুস্তক লইয়া বসিতেন!

দীন-দরিদ্রের দুঃখ-মোচনের আন্তরিক ইচ্ছা, আত্মের পরিত্রাণ-কামনা, রোগীর রোগ-শয্যায় শুশ্রূষা করিবার অভিনাষ, মোট কথা, সমগ্রভাবে জনসাধারণের তথা জননী জন্মভূমির দেবার আকাঙ্ক্ষা, তাঁহার অন্তরলোকে বিকশিত হইয়া উঠিত ; কিন্তু তখনও তাহার বাহ্য-বিকাশ তেমন দেখা যাইত না। এক কথায় বলা চলে—তাঁহার বৃহত্তর জীবনের ছায়া যেন সেই বাল্য-জীবনেই প্রতিফলিত হইয়া উঠিত ! এই প্রসঙ্গে স্বতঃই মনে পড়ে পাশ্চাত্য অন্ধ মহাকবির অমর বাণী—

“Childhood shows the man,  
As morning shows the day.”



ছই

## বিদ্যার্থী-জীবন

র্যাভেন্সা কলেজিয়েট স্কুলে—রামকৃষ্ণ-বিবেকানন্দের  
প্রভাব—বেণীমাধব দাসের প্রভাব—ম্যাট্রিকুলেশন  
পরীক্ষা—ধর্মভাবের প্রাবল্য—তেজস্বিতার প্রথম  
বিকাশ—বি. এ. উপাধি লাভ—আই. সি. এম.—  
কেমিস্ট্রির বি. এ.।

দ্বাদশ বৎসর বয়সক্রমকালে সুভাষচন্দ্রকে প্রটেক্ট্যান্ট  
ইয়োরোপীয়ান স্কুল হইতে লইয়া আসিয়া র্যাভেন্সা কলেজিয়েট  
স্কুলে ভর্তি করিয়া দেওয়া হয়। বর্ষার বারিধারা-সম্পাতে  
সুপ্ত বীজ যেমন অঙ্কুরিত হইয়া উঠে, এইবার সময় এবং  
সুযোগের প্রভাবে সুভাষচন্দ্রের মনোজগতে সেইরূপ সুপ্ত  
বৃত্তিসমূহ জাগিয়া উঠিল :

এতদিন ইয়োরোপীয় স্কুলে বিদ্যাভ্যাসে নিরত থাকায়,  
ঠিক জাতীয় ধর্মভাবের প্রেরণা তিনি লাভ করিতে পারেন  
নাই। র্যাভেন্সা কলেজিয়েট স্কুলে আসিবার পর হইতে  
শ্রীশ্রীরামকৃষ্ণ পরমহংসদেবের স্মধুর উপদেশাবলীর সহিত  
তিনি পরিচিত হইতে আরম্ভ করেন ; সঙ্গে-সঙ্গে শ্রীশ্রীরাম-  
কৃষ্ণের প্রধান শিষ্য ও বাণী-প্রচারক ভারতের অন্যতম গৌরব ও  
দেশ-মাতৃকার অন্যতম সুসন্তান স্বামী বিবেকানন্দের কার্যাবলী  
তাঁহাকে অনুপ্রাণিত করিতে আরম্ভ করে।

চুম্বকের আকর্ষণে লৌহ যেমন তাহার দিকে আকৃষ্ট হয়, তেমনি স্বামী বিবেকানন্দ-প্রবর্তিত রামকৃষ্ণ-মিশনের সেবা-কার্যের দিকে কিশোর সুভাষচন্দ্রও চলিয়া পড়িলেন। যখন তিনি সেকেণ্ড ক্লাসে পড়িতেন, তখনই তিনি রোগীর শুশ্রুষায়, দুঃখীর দুঃখ-মোচনে এবং দরিদ্রের সেনায় দিবসের অধিকাংশ সময় কাটাইয়া দিতেন।

এই সময় কটক র্যাভেনশা কলেজিয়েট স্কুলের হেডমাস্টার ছিলেন শ্রীযুক্ত বেণীমাধব দাস এম্. এ.। ইনি পরে কলিকাতা সংস্কৃত কলেজিয়েট স্কুল হইতেই পেন্সন্ গ্রহণ করেন।

ইনি অত্যন্ত ধার্মিক ও স্বেচ্ছাপ্রেমিক ছিলেন। তাঁহার জন্মস্থান চট্টগ্রাম। ইঁহার কন্যা শ্রীমতী বীণা দাস কলিকাতা বিশ্ববিদ্যালয়ের কনভোকেশনে মহামাণ্ড গভর্নর বাহাদুরকে গুলি করিয়া রাজদণ্ডে দণ্ডিত হইয়াছিলেন। সম্প্রতি তাঁহাকে মুক্তিদান করা হইয়াছে।

শ্রীযুক্ত বেণীমাধব দাস মহাশয় সুশিক্ষক বলিয়া বিশেষ খ্যাতিলাভ করিয়াছিলেন। এতদ্বিন্ন তাঁহার সরল অমায়িক ব্যবহার এবং ছাত্রগণের প্রতি স্নেহ আচরণ তাঁহাকে অত্যন্ত জনপ্রিয় করিয়া তুলিয়াছিল। কাহারও কোনরূপ দোষ-ত্রুটি দেখিলে তিনি প্রথমে মিষ্ট ব্যবহারে তাহা সংশোধনের প্রয়াস পাইতেন। উহাতে কোনরূপ ফল না হইলে পরে শৃঙ্খলা-রক্ষার্থ কঠোরতা অবলম্বনেও দ্বিধা-বোধ করিতেন না।

গুরুর এই দুইটি সদগুণ—কোমল ও কঠোরের অপূর্ব সংমিশ্রণ—শিষ্য সুভাষচন্দ্রে সম্পূর্ণরূপে প্রতিকলিত হইয়াছিল। মহাকবি ভবভূতির ভাষায় বলা যায়, তিনি ছিলেন--

“বজ্রাদপি কঠোরানি মৃদুনি কুসুমাদপি।

লোকোত্তরাণাং চেতাংসি কোহি বিজ্ঞাতুমীশ্বরঃ ॥”

১৯১৩ খৃষ্টাব্দে সুভাষচন্দ্র কটক র্যাভেনশা কলেজিয়েট স্কুল হইতে ম্যাট্রিকুলেশন পরীক্ষা প্রদান করেন। এই পরীক্ষায় তিনি কলিকাতা বিশ্ববিদ্যালয়ে দ্বিতীয় স্থান অধিকার করিয়া বৃত্তি লাভ করেন। এইবার মহানদীর তীর হইতে বাসভূমি জাহ্নবীর তীরে পরিবর্তিত হইল—কটক ত্যাগ করিয়া তিনি বিদ্যাশিক্ষার্থ কলিকাতা আগমন করিলেন এবং প্রেসিডেন্সী কলেজে ভর্তি হইলেন।

প্রেসিডেন্সী কলেজে আই. এ. পড়িবার সময় স্বামী বিবেকানন্দের শ্রায় তিনিও তাঁহার বৃকের মাঝে কি এক নিদারুণ অশান্তি ও অতৃপ্তি অনুভব করিতে লাগিলেন! কটক-শস্যায় ষাঁহার ভবিষ্যৎ বিশ্রাম, তিনি কি কখনও ধনীর দুলালের শ্রায় তৃপ্তি লাভ করিতে পারেন? শীঘ্রই তাঁহার মনোজগতে এক ধর্ম্মভাবের প্রাবল্য উপস্থিত হইল। বাহ্যজগতে পার্থিব বিষয়ে উন্নতি অপেক্ষা আত্মার যুক্তি উজ্জ্বলতর হইয়া ফুটিয়া উঠিল। গৃহে বাস তাঁহার নিকট বন্ধনরূপে দেখা দিল।

যে রহস্য মীমাংসার জন্য বুদ্ধদেব একদিন রাষ্ট্রোৎসর্গ ত্যাগ করিয়া ভিক্ষু সাজিয়াছিলেন, যে ভূমানন্দের প্রত্যাশায়



নবদ্বীপের নিমাই পণ্ডিত তাঁহার পাণ্ডিত্য-খ্যাতি, সুন্দরী স্ত্রী, স্নেহশীলা জননী প্রভৃতি ত্যাগ করিয়া নীলাচলের পথে-পথে গাহিয়া বেড়াইতেন—

“ন ধনং, ন জনং, ন সুন্দরীং, কবিতাং বা জগদীশং কাময়ে”—  
সুভাষচন্দ্রের প্রাণেও সে রহস্য-মীমাংসার চিন্তা সমুদিত হইল,  
সে ভূমানন্দ লাভের আকাঙ্ক্ষা জাগরিত হইল।

তিনি আর গৃহে থাকিতে পারিলেন না—আত্মীয়-স্বজনের অজ্ঞাতসারে সৎগুরু লাভ করিয়া জীবন কৃতার্থ করিবার অভিপ্রায়ে গৃহত্যাগ করিয়া প্রব্রজ্যা অবলম্বন করিলেন। ভারতের বিভিন্ন তীর্থক্ষেত্রে পরিভ্রমণ করিয়া জটাজূট-বিমণ্ডিত বিভূতি-ভূষিত সন্ন্যাসি-মহলে তিনি সৎগুরুর অনুসন্ধান করিতে লাগিলেন। কিন্তু বিধাতা তাঁহাকে বুদ্ধ, চৈতন্য, কবির, বানক, তুলসীদাস, বিজয়কৃষ্ণ প্রভৃতি মহাপুরুষগণের পদধূলি-বিরঞ্জিত ক্ষুদ্র মার্গে বিচরণ করিবার জন্য সৃষ্টি করেন নাই—তাঁহার কর্মক্ষেত্র ছিল সম্পূর্ণ বিভিন্ন। পর-পদানতা শৃঙ্খলিতা স্বেচ্ছা-জননী যেন মলিন-বদনে তাঁহারই মুখের দিকে কাতর ভাবে দৃষ্টিপাত করিয়া ছিলেন! সেই জন্য তিনি গৃহত্যাগী সন্ন্যাসীর দলে মিশিয়াও ঠিক মনের মত গুরুর দর্শন পাইলেন না। সুতরাং তিনি গৃহে ফিরিয়া সুবোধ বালকের ন্যায় আবার পাঠ্য পুস্তকে মনঃসংযোগ করিলেন।

১৯১৫ খৃষ্টাব্দে তিনি আই. এ. পরীক্ষায় প্রথম বিভাগে উত্তীর্ণ হন এবং দর্শন শাস্ত্রে অনার্স লইয়া প্রেসিডেন্সী কলেজেই বি. এ. পড়িতে থাকেন।

সুভাষচন্দ্র যখন তৃতীয় বার্ষিক শ্রেণীতে অধ্যয়ন করিতেন, তৎকালে ই. এফ. ওটেন মহোদয় প্রেসিডেন্সী কলেজে ইতিহাসের অধ্যাপক ছিলেন \* এবং এইচ. আর. জেমস ছিলেন প্রিন্সিপ্যাল। ই. এফ. ওটেন মহোদয় পরে বাংলার ডিরেক্টর অফ পাবলিক ইন্সট্রাকশন্স-এর পদ অলঙ্কৃত করিয়াছিলেন।

মিঃ ওটেন অনেক সময় ভারতীয় ছাত্রদের মনোবৃত্তি আহত করিতে কুণ্ঠিত হইতেন না। ইহাতে সুভাষচন্দ্র জীবনে প্রথম শাসকজাতির গর্ব এবং ঔদ্ধত্যের বিরুদ্ধে দণ্ডায়মান হইলেন এবং তাঁহার জীবনে এই প্রথম পুঁথিগত নীতি ও পুঁথিগত স্বদেশপ্রেম কর্মক্ষেত্রে ভীষণ পরীক্ষার সম্মুখীন হইল; এবং যখন তিনি এই পরীক্ষায় উত্তীর্ণ হইয়া অক্ষত শরীরে বাহির হইয়া আসিলেন, তখন তাঁহার ভবিষ্যৎ জীবন চিরকালের জন্য নির্ধারিত হইয়া গেল।†

অধ্যাপক মিঃ ওটেনকে প্রহার করার অভিযোগে সুভাষচন্দ্র অনির্দিষ্টকালের জন্য প্রেসিডেন্সী কলেজ তথা বিশ্ববিদ্যালয় হইতে বিতাড়িত হন। পরে শিক্ষাব্রতী পুরুষসিংহ স্মার

\* দি ক্যান্টনমেন্ট মিউনিসিপ্যাল গেজেটে ই. এফ. ওটেনকে প্রিন্সিপ্যাল বলিয়া উল্লেখ করা হইয়াছে। উহা ভ্রমাত্মক।

† “Prof. Oaten was said to have wounded the feelings of the Indian Students and Subhash Chandra, for the first time in his life, made a bold stand against the pride and arrogance of the ruling class and it was the first occasion in his life when his ‘theoretical morality and theoretical patriotism were put to a trial and a very severe test’; and when he came out of the ordeal unscathed, his ‘future career had been chalked out once for all.’”  
—*The Calcutta Municipal Gazette*, Vol XLII, No. 16, P. 442 (a)

আশুতোষ মুখোপাধ্যায় মহাশয় এই বিষয়ে অবহিত হন। তাঁহার প্রচেষ্টায় সুভাষচন্দ্র বিশ্ববিদ্যালয় হইতে আবার অধ্যয়ন করিবার অনুমতি লাভ করিলেন।

সুভাষচন্দ্র এবার আর প্রেসিডেন্সী কলেজে ভর্তি হইলেন না, তিনি স্কটিশ-চার্চ কলেজে ভর্তি হইলেন এবং ১৯১৯ খৃষ্টাব্দে দর্শন-শাস্ত্রের অনার্সে প্রথম শ্রেণীতে দ্বিতীয় স্থান অধিকার করিয়া বি. এ. উপাধি লাভ করেন। অতঃপর তিনি ব্যবহারিক মনোবিজ্ঞানে এম্. এ. পড়িতে আরম্ভ করিলেন।

সুভাষচন্দ্রের সমগ্র পরিবারই উচ্চ-শিক্ষিত। সুতরাং তাঁহারা সুভাষচন্দ্রের গায় মেধানী ছাত্রকে বাঙ্গালী জীবনের ইন্দ্রকর করিবার উদ্দেশ্যে, আই. সি. এম্. পরীক্ষায় প্রস্তুত হইবার জন্য ইংলণ্ডে যাইতে আদেশ করেন।

সুভাষচন্দ্র অভিভাবকের আদেশ কোন দিনই লঙ্ঘন করেন নাই; রণক্ষেত্রের সৈনিকের মত তিনি উৎকর্ষিত ব্যক্তির আদেশ চিরকালই অবনত মস্তকে পালন করিতেন। সুতরাং অভিভাবকের সম্ভাষণ-বিধানার্থ তিনি ১৯১৯ খৃষ্টাব্দের সেপ্টেম্বর মাসে ইন্ডিয়ান সিভিল সার্ভিসের প্রতিযোগিতা-পরীক্ষা প্রদানার্থ ইংলণ্ড যাত্রা করেন।

ইংলণ্ডে উপনীত হইবার আট মাস পরে তিনি ভারতীয় সিভিল সার্ভিস পরীক্ষা প্রদান করেন এবং গুণানুসারে চতুর্থ স্থান অধিকার করিয়া উত্তীর্ণ হন। মাত্র আট মাস পড়িয়া এইরূপ কঠিন প্রতিযোগিতা-মূলক পরীক্ষায় এতাদৃশ কৃতিত্ব-প্রদর্শন সুভাষচন্দ্রের অসাধারণ প্রতিভার পরিচায়ক।

কিন্তু আই. সি. এস. পরীক্ষায় উত্তীর্ণ হইয়াও সুভাষচন্দ্র অন্তরে-অন্তরে ঠিক আত্ম-প্রসাদ লাভে সমর্থ হন নাই। সেইজন্য তিনি পুনরায় মনো-বিজ্ঞান ও নীতি-বিজ্ঞানে ট্রাইপোজসহ কেম্ব্রিজ বিশ্ববিদ্যালয়ে বি. এ. পড়িতে আরম্ভ করেন এবং অনতিবিলম্বে উক্ত বিষয়ে ট্রাইপোজসহ বি. এ. উপাধি লাভ করিলেন।

এইখানেই ব্যবহারিক ভাবে তাঁহার বিদ্যাশিক্ষার পরিসমাপ্তি ঘটে এবং তাঁহার বৈচিত্র্যপূর্ণ জীবনের একটি অঙ্কে ষবনিকা নিপতিত হয়।



## তিন কর্ম-জীবন

### দেশবন্ধু চিত্তরঞ্জনের সাহচর্য

আই. সি. এম. পদত্যাগ—ভারতে প্রত্যাভর্তন—অসহযোগ-  
আন্দোলন—কলিকাতায় হরতাল—গ্রেপ্তার ও কারাদণ্ড—  
বন্ধ্যা-পীড়িতদের সেবা—কংগ্রেসের গম্মা-অধিবেশনে—  
'বাংলার কথা' ও 'ফরওয়ার্ড'—কলিকাতা কর্পোরেশনে—  
অডিটোয় গ্রেপ্তার—মান্দালয়ে নির্যাসন—দেশবন্ধুর মৃত্যু—  
মুক্তিলাভ।

১৯২০ খৃষ্টাব্দে ভারতীয় জাতীয় মহাসমিতির নাগপুর-  
অধিবেশনে অসহযোগ-আন্দোলনের প্রস্তাব গৃহীত হয় এবং  
সমগ্র ভারতবর্ষ মহাত্মা গান্ধীর নেতৃত্বে সেই আন্দোলনে  
কাঁপাইয়া পড়ে। হিমালয় হইতে কন্যাকুমারী এবং চট্টগ্রাম  
হইতে গুজরাট পর্যন্ত অসহযোগ-আন্দোলনের হোমানলে  
আত্মাহুতি প্রদানে ব্যাকুল হইয়া উঠিল।

এই আন্দোলনের বিদ্রাট তরঙ্গ সুদূর সাগর-পারে  
ইংলণ্ডে অবস্থিত সুভাষচন্দ্রের চিত্ত-বীণায়ও আঘাত করিল।  
নবীন সঙ্কল্প, নবীন উৎসাহ, নবীন আশার বাণী তাঁহার অন্তর-  
লোকে নবাকুণ-রাগে ফুটিয়া উঠিল। সঙ্গে-সঙ্গে তিনিও  
অসহযোগ-আন্দোলনের হোমানলে আত্মাহুতি দিতে কৃতসঙ্কল্প

হইয়া উঠিলেন এবং কালবিলম্ব না করিয়া আই. সি. এস.-পদে ইস্তফা-পত্র দাখিল করিলেন।

তৎকালীন ভারত-সচিব মণ্টেগু তাঁহাকে পদত্যাগ-পত্র প্রত্যাহার করিবার জন্য অনুরোধ করিয়াছিলেন ; কিন্তু তিনি তাহাতে সম্মত হইলেন না। আবাল্য যে অতৃপ্তির পীড়ন তিনি মর্মে-মর্মে অনুভব করিতেছিলেন, পদত্যাগ-পত্র দাখিল করিয়া তিনি যেন তাহা হইতে কথঞ্চিৎ মুক্তিলাভ করিলেন ! দেশ-মাতৃকার করুণ মুখমণ্ডল তাঁহার অন্তর-মধ্যে যেন স্পর্শ দিবালোকের ন্যায় ফুটিয়া উঠিল। তিনি দেশসেবার কঠোর ব্রত গ্রহণে সঙ্কল্প করিলেন।

সুভাষচন্দ্র ১৯২১ খৃষ্টাব্দে ভারতে প্রত্যাবর্তন করিয়া মহাত্মা গান্ধীর সহিত সাক্ষাৎ করিলেন। মহাত্মা গান্ধী তাঁহাকে দেশবন্ধু চিত্তরঞ্জন দাশ মহাশয়ের নির্দেশক্রমে মাতৃ-ভূমির সেবায় আত্মনিয়োগ করিতে উপদেশ দেন।

মহাত্মা গান্ধীর উপদেশে সুভাষচন্দ্র বাংলাদেশে ফিরিয়া আসিলেন এবং দেশবন্ধু চিত্তরঞ্জন দাশ মহাশয়ের সহিত সাক্ষাৎ করেন। দেশবন্ধুও তাঁহাকে অসহযোগ-আন্দোলনের কর্ম্ম-মণ্ডলের অন্তর্ভুক্ত করিয়া লইলেন এবং সর্বকার্য্যে স্নায় দক্ষিণ-হস্তস্বরূপ বিবেচনা করিতে লাগিলেন।

এই প্রসঙ্গে শ্রীযুক্ত হেমেন্দ্রনাথ দাশগুপ্ত লিখিয়াছেন—

“জুলাই-আগষ্ট মাসে সুভাষচন্দ্র সিভিল সার্ভিস পরীক্ষায় কৃতকার্য হইয়াও বাঙালী জীবনের ইন্দ্রপদ পরিত্যাগ করিয়া সেবাব্রত লইয়া দেশবন্ধুর সঙ্গে মাতৃভূমির সেবাকল্পে আত্মোৎসর্গ করেন। এই অকৃত্রিম

তেজস্বী ধীমান্ কর্ম্মাটিকে পাইয়া দেশবন্ধুর আনন্দের অবধি ছিল না।  
 \* \* \* \* স্বরাজ-সাধনার সুভাষচন্দ্রের সহযোগিতা জাতীয় ইতিহাসে  
 এক নব অধ্যায়ের সূচনা করিল।” —দেশবন্ধু-স্মৃতি, পৃঃ ২৮০

সুভাষচন্দ্র প্রথমে দেশবন্ধু চিত্তরঞ্জনের প্রতিষ্ঠিত বেঙ্গল  
 গ্যামিনাল কলেজ বা গোড়ীয় সর্ব-বিদ্যালয়ের অধ্যক্ষ-পদে কার্য  
 করিতে লাগিলেন এবং বঙ্গীয় প্রাদেশিক কংগ্রেস-কমিটির  
 পাবনিসিটি অফিসার বা প্রচারাদ্যক্ষের কার্যভারও তাঁহার  
 উপর অর্পিত হইল। অতঃপর তিনি জাতীয় স্বেচ্ছাসেবক-  
 বাহিনীর ক্যাপ্টেন বা অধ্যক্ষ নিযুক্ত হন। সম্ভবতঃ সামরিক  
 জীবনের উন্মাদনা ও মর্যাদা জীবনে এই সর্বপ্রথম তিনি  
 উপলব্ধি করেন।

১৯২১ খৃষ্টাব্দে ১৭ই নভেম্বর মহামান্য প্রিন্স অব্ ওয়েল্‌স্  
 মহোদয় ভারত-পরিদর্শনার্থ বোম্বাই বন্দরে পদার্পণ করেন।  
 গভর্নমেন্টের সহিত সর্বপ্রকার সহযোগিতা বর্জনের নিদর্শন-  
 স্বরূপ কংগ্রেসের পূর্ব-নির্দেশানুসারে ঐ দিন ভারতের সর্বত্র  
 হরতাল অনুষ্ঠিত হইয়াছিল। কলিকাতায়ও এই হরতাল  
 পূর্ণভাবে প্রতিপালিত হয়। সুভাষচন্দ্র এই হরতালকে  
 সাফল্যমণ্ডিত করিতে প্রাণপণ পরিশ্রম করেন।

এই প্রসঙ্গে শ্রীযুক্ত হেমেন্দ্রনাথ দাশগুপ্ত লিখিয়াছেন—

“ষ্টেশন হইতে সুভাষচন্দ্র গাড়ীর উপরে বসিয়া স্ত্রীলোকদিগকে  
 গন্তব্য স্থানে পৌছাইয়া দিতেছিলেন এবং বাহিরে লেখা ছিল ‘On  
 National Service’—অর্থাৎ ‘জাতীয় সেবারতে’। কোনও যান চলে  
 নাই ; বাইসিকেল পর্য্যন্ত বন্ধ ছিল।” —দেশবন্ধু-স্মৃতি, পৃঃ ২৭

সুভাষচন্দ্রের অক্লান্ত পরিশ্রমে হরতাল সাফল্যমণ্ডিত হইল বটে, কিন্তু সঙ্গে-সঙ্গে অতি নিৰ্মমভাবে সরকারী দমন-নীতির সূত্রপাত হইল।

ইহাতে বিশ্বয়ের কিছুই ছিল না, ইহা অপ্রত্যাশিতও নহে। কারণ, মহামান্য ভারত-সম্রাটের জ্যেষ্ঠ পুত্র এবং ভারতের ভবিষ্যৎ ভাগ্য-বিধাতাকে যাঁহারা অবহেলায় অপাংক্তেয় করিতে সাহসী হন, চরম রাজরোষ যে তাঁহাদের মস্তকে বজ্রের আকারে পতিত হইবে, তাহাতে আর সন্দেহের কি আছে?

হরতালের একদিন পরে বঙ্গীয় গভর্নমেন্ট ১৯শে নভেম্বর তারিখে কংগ্রেস ও খিলাফৎ স্বেচ্ছাসেবক-বাহিনীকে বে-আইনি বলিয়া ঘোষণা করিলেন এবং এই উভয় আন্দোলনকে নিষ্ক্রিয় করিবার অভিপ্রায়ে প্রত্যেক কংগ্রেস ও খিলাফৎ-অফিসে ধারাবাহিকভাবে খানা-তল্লাসী চলিতে লাগিল। ইহার প্রতিবাদে কলিকাতার জাতীয়তাবাদী নেতা ও কর্মীগণের সাক্ষরিত এক বিবৃতি প্রকাশিত হয়। ইহাতে প্রাদেশিক ও জেলা কংগ্রেস-কমিটির সমস্ত সন্ত্রাসকে জাতীয় স্বেচ্ছাসেবক-বাহিনীর সভ্যশ্রেণীভুক্ত হইবার জন্য আহ্বান করা হইল।

এই সম্পর্কে ১৯২১ সালের ১০ই ডিসেম্বর দেশবন্ধু চিত্তরঞ্জন দাশ, মৌলানা আবুল কালাম আজাদ, সুভাষচন্দ্র বসু ও অন্যান্য কয়েকজন নেতাকে গ্রেপ্তার করা হয়। দেশবন্ধু চিত্তরঞ্জন ও সুভাষচন্দ্র বসু বিনাশ্রমে ছয় মাসের কারাদণ্ডে দণ্ডিত হন।





( ১৯২০ সালে, লণ্ডনে )—উপবিষ্ট ডাঃ সুনীল বসু ও সতীশচন্দ্র বসু  
দণ্ডায়মান—রণেন দত্ত ( স্ত্রীশচন্দ্রের মাতুল ) ও স্ত্রীশচন্দ্র ।



এই কারাজীবন সম্বন্ধে স্মৃতিচক্র নিজে একখানি পত্রে লিখিয়াছিলেন—

“১৯২১ ও ১৯২২ সালে দেশবন্ধুর সহিত আট (৭) মাস কাল কারাগারে কাটাইবার সৌভাগ্য আমার হইয়াছিল ; তন্মধ্যে দুইমাস কাল আমরা পাশাপাশি সেলে প্রেসিডেন্সী জেলে ছিলাম এবং বাকী ছয় মাস কাল আরও কয়েকজন বন্ধুর সহিত আলিপুর সেন্ট্রাল জেলের একটি বড় ঘরে ছিলাম। এই সময়ে তাঁহার ( দেশবন্ধুর ) সেবার ভার কতকটা আমার উপর ছিল। আলিপুর জেলে শেষ কয়েকমাস তাঁহার একবেলার রান্নাও আমাদিগকে করিতে হইত, গভর্ণমেন্টের রূপায় আমি যে আট মাস কাল তাঁহার সেবা করিবার অধিকার ও সুযোগ পাইয়াছিলাম,—ইহা আমার পক্ষে পরম গৌরবের বিষয়।”

—দেশবন্ধু-স্মৃতি, পৃঃ ৫৪৯

১৯২২ খৃষ্টাব্দে স্মৃতিচক্র কারাবাস হইতে মুক্তিলাভ করেন। তখন ভগবানের অলঙ্ঘ্য বিধানে ভীষণ বন্যায় উত্তর-বঙ্গ ভাসিয়া গিয়াছে ! অন্নহীন, বস্ত্রহীন, আশ্রয়হীন সহস্র সহস্র নরনারীর আর্তনাদে আকাশ-বাতাস নিয়ত প্রতিধ্বনিত হইতেছে। ইহাতে স্ভাব-করণ স্মৃতিচক্রের প্রাণ কাঁদিয়া উঠিল। তিনি বন্যা-পীড়িতদের সাহায্যার্থ বন্ধপত্রিকর হইলেন।

তিনি স্বয়ং উত্তর-বঙ্গে গমন করিয়া বন্যা-পীড়িতদের দুঃখ-দুর্দশা স্বচক্ষে দেখিয়া অত্যন্ত ব্যথিত হন এবং বেঙ্গল রিলিফ-কমিটির সেক্রেটারীরূপে যেরূপ শৃঙ্খলা ও সুব্যবস্থায় বন্যা-পীড়িত নর-নারীর সেবার কার্য নির্বাহ করেন, তাহাতে তাঁহার অসাধারণ কর্মশক্তি ও গঠন-প্রতিভার সুস্পষ্ট পরিচয় প্রতিভাত হইয়া উঠিল।

১৯২২ খৃষ্টাব্দের ডিসেম্বর মাসে সুভাষচন্দ্র দেশবন্ধুর সমভিব্যাহারে ভারতীয় জাতীয় মহাসমিতি বা কংগ্রেসের গয়া-অধিবেশনে যোগদানার্থ গমন করেন। এই অধিবেশনে দেশবন্ধু চিত্তরঞ্জন কাউন্সিলে প্রবেশ করিয়া গভর্নমেন্টের মুখোশ খুলিয়া দেখাইবার প্রস্তাব করিলে সুভাষচন্দ্র দেশবন্ধুকে সমর্থন করিয়াছিলেন; কিন্তু কাউন্সিল-প্রবেশের প্রস্তাবে দেশবন্ধুর পরাজয় ঘটে। এই পরাজয়ের পর ১৯২২ সালের ৩১শে ডিসেম্বর তারিখে গয়া, টিকারীর রাজবাড়ীতে দেশবন্ধু কংগ্রেস-খিলাফত-স্বরাজ পার্টি নামে একটি দল গঠন করেন। ১৯২৩ খৃষ্টাব্দে বোম্বাই ও এলাহাবাদের অধিবেশনে এই দলের নাম সংক্ষিপ্ত করিয়া “স্বরাজ্য-দল” করা হয়।

১৯২৬ খৃষ্টাব্দে দেশবন্ধু চিত্তরঞ্জন কাউন্সিল প্রবেশের জন্য প্রতিদ্বন্দ্বিতায় অবতীর্ণ হইলেন। এই ব্যাপারে সুভাষচন্দ্র দেশবন্ধুর দক্ষিণ হস্ত-স্বরূপ হইয়া ‘স্বরাজ্য-দল’ গঠনে ও নির্বাচন-প্রতিদ্বন্দ্বিতায় জয়যুক্ত হইবার জন্য অসাধারণ পরিশ্রম করেন। এই পরিশ্রমের ফলে স্বরাজ্যপার্টির ললাটে বিজয়-তিলক অঙ্কিত হইল।

এই সময় সুভাষচন্দ্র ‘বাংলার কথা’ নামক একখানি দৈনিক পত্রিকা প্রকাশ করিতে আরম্ভ করেন। পরে স্বরাজ্য-দলের মুখপত্ররূপে দেশবন্ধু যখন ইংরাজী দৈনিক ‘ফরওয়ার্ড’ পত্রিকা বাহির করিলেন, তখন সুভাষচন্দ্র প্রচার-সচিব নিযুক্ত হন। প্রচার-সচিবরূপে তিনি পত্রিকার জন্য কিরূপভাবে কাজ

করিতেন, তাহা অধ্যাপক শ্রীবিনয়কুমার সরকার মহাশয়ের রচনা হইতে উদ্ধৃত করা হইল—

“তখন সুইট্‌জারল্যান্ডে ছিলাম। লুগানো সহরে বা পল্লীতে হঠাৎ সুভাষ বসুর টেলিগ্রাম পেলাম, সঙ্গে সঙ্গে চিঠি। চিত্তরঞ্জনের ‘ফরওয়ার্ড’ দৈনিক তখন সবে বেরিয়েছে বা বেরোর বেরোর হয়েছে। ১৯২৩ সন, \* \* \* ফরওয়ার্ডের জন্ম এই অধমকে ‘বিদেশী সংবাদ-দাতা’ বহাল করা হয়েছিল। আমার উপর ভার ছিল ফরাসী, ইতালিয়ান, আর জার্মান ভাষায় প্রচারিত বিশ্ব-সংবাদ টেলিগ্রাফে ফরওয়ার্ডকে পাঠাবার। চিঠিতে লেখা ছিল, রয়টারকে হারাতে হবে।’—এই কথাটার খুব খুসী হয়েছিলাম।” —বিনয় সরকারের বৈঠকে, ২য় ভাগ, পৃঃ ২৪৩-৪৪

এইভাবে অবিরাম পরিশ্রম করিয়া তিনি ফরওয়ার্ড দৈনিককে শ্রেষ্ঠ দৈনিক পত্রিকারূপে জন-সমাজে প্রতিষ্ঠিত করিবার চেষ্টা করিয়াছিলেন। বলা বাহুল্য, তিনি দীর্ঘকাল ফরওয়ার্ডের সেবা করিবার সুযোগ পান নাই।

১৯২৪ খৃষ্টাব্দের ফেব্রুয়ারী মাসে দেশবন্ধু চিত্তরঞ্জনের নেতৃত্বে বঙ্গীয় “স্বরাজ্য দল” কলিকাতা কর্পোরেশন অধিকার করিল। বত্রিশটি ওয়ার্ডে দেশবন্ধুর মনোনীত ব্যক্তি কাউন্সিলার নির্বাচিত হইলেন। দেশবন্ধু চিত্তরঞ্জনই কলিকাতা কর্পোরেশনের সর্বপ্রথম মেয়র হন। ইহাতে কলিকাতার মিউনিসিপ্যাল কর্ম-ব্যবস্থায় যুগান্তর সংসাধিত হয় এবং সুভাষচন্দ্র বসু কর্পোরেশনের সংশ্রবে আসেন।

১৯২৪ খৃষ্টাব্দের ১৪ই এপ্রিল সুভাষচন্দ্র মাত্র ২৭ বৎসর বয়সে কলিকাতা কর্পোরেশনের প্রথম চীফ্‌ এক্সিকিউটিভ

অফিসার নিযুক্ত হইলেন। এই পদের সাধারণ বেতন মাসিক ৩০০০ টাকা, কিন্তু সুভাষচন্দ্র অর্ধেক বেতন মাত্র গ্রহণ করিতেন।

দেশবন্ধুর শত্রুতা এই সময় কর্পোরেশনের বিরুদ্ধে সমালোচনা করিতে আরম্ভ করিলে, দেশবন্ধু অগাধ বিশ্বাসের সহিত বলিয়াছিলেন—

“সব কাজ লোকমান করে সুভাষকে দিয়েছি, একটু সময় দিন; সবই হবে।”—দেশবন্ধু-স্মৃতি, পৃঃ ৩৫১

সুভাষচন্দ্রকে দেশবন্ধু যে কতটা বিশ্বাস ও স্নেহ করিতেন, এই সামান্য একটি কথায়ই তাহা স্পষ্ট বুদ্ধিতে পারা যায়। যাহা হউক, দেশবন্ধু ও সুভাষচন্দ্রের সহযোগিতায় কর্পোরেশনে এক নূতন জীবনের সঞ্চার হইল। যে কর্পোরেশন এতকাল পাশ্চাত্য ভাবধারায় লালিত-পালিত হইতেছিল, সহসা তাহাতে জাতীয় ভাবধারা অনুপ্রবিষ্ট হইল। কর্পোরেশনের কর্মচারী ও সভ্যগণ সূচিক্রমে বিদেশী মাজসজ্জা পরিত্যাগ করিয়া অমঙ্গল খদ্দেরে দেহ শোভিত করিয়া আফিসে আমিতে লাগিলেন। উৎকৃষ্ট বিদেশী পোষাকের অপেক্ষা খদ্দেরের সম্মান এই সর্বপ্রথম পৌরসভায় সীকৃত হইল।

এতদ্ব্যতীত জনসাধারণের কল্যাণের দিকেও সুভাষচন্দ্রের মনোযোগ নিতান্ত কম ছিল না! সুভাষচন্দ্র কর্পোরেশনের প্রধান কর্মকর্তা হইয়াই নাগরিকদিগকে বিনা খরচে প্রাথমিক শিক্ষা ও ঔষধ-পথ্য পাইবার সুযোগ দান করিলেন। হয়তো তাহাদিগকে আরও অনেক সুবিধাই দেওয়া হইত, কিন্তু

সহসা তাহাতে এক বিঘ্ন আসিয়া পড়িল। কর্পোরেশনের উন্নতিমূলক কার্যে তিনি আর বেশীদিন আত্মনিয়োগ করিতে পারিলেন না। ১৯২৪ খৃষ্টাব্দের ২৫শে অক্টোবর তারিখে ১৯২৪ খৃষ্টাব্দের বঙ্গীয় ফৌজদারী আইন-সংশোধন অর্ডিন্যান্স অনুসারে সুভাষচন্দ্রকে গ্রেপ্তার করা হইল।

এই প্রসঙ্গে শ্রীযুক্ত হেমেন্দ্রনাথ দাশগুপ্ত লিখিয়াছেন—

“গরিবত ধনবানের হস্ত হইতে সমবেদনাময় সেবক-সম্প্রদায়ের হস্তেই কর্পোরেশন আসিয়া পড়িত; গরিবের সেবা হইত, মাছ ছুগ্ধ খাইয়া কলিকাতার লোক ঝাঁচিত, বিধাক্ত তৈল ও ঘূতের সহায়তায় ডিম্বেপ্‌মিয়া চিরস্থায়ী বন্দোবস্ত করিতে পারিত না, কিন্তু সব বিফল হইল! সুভাষচন্দ্র অমাত্য-ভক্তের কবলে নিপতিত হইলেন।”

—দেশবন্ধু-স্মৃতি, পৃ: ৩৫১

সুভাষচন্দ্রের গ্রেপ্তারে সমগ্র দেশে একটা সাড়া পড়িয়া গেল। সুভাষচন্দ্রকে গ্রেপ্তার এবং বিনা বিচারে কারারুদ্ধ করায় কলিকাতা কর্পোরেশনের ২৯শে অক্টোবরে অনুষ্ঠিত সভায় দেশবন্ধু চিত্তরঞ্জন কলিকাতার মেয়র-রূপে নিম্নলিখিত ভাষায় গভর্নমেন্টের এই কার্যের তীব্র প্রতিবাদ করেন—

“স্বদেশকে ভালবাসা যদি অপরাধ হয়, তবে আমিও অপরাধী। যদি সুভাষচন্দ্র বন্ধু অপরাধী হন, তবে আমিও অপরাধী—কর্পোরেশনের শুধু প্রধান কর্ম-সচিব নহে, মেয়রও সমভাবে অপরাধী।” \*

\* “If love of country is crime, I am a criminal. If Mr. Subhas Chandra Bose is a criminal,—I am a criminal,—not only the Chief Executive Officer of the Corporation, but the Mayor of this Corporation is equally guilty.”

—*The Calcutta Municipal Gazette*, Vol. XLII, No. 16, P. 442.

সুভাষচন্দ্রই কলিকাতা মিউনিসিপ্যাল গেজেট প্রকাশের পরিকল্পনা করিয়াছিলেন ; কিন্তু উহা প্রকাশের পূর্বেই তাঁহাকে গ্রেপ্তার করা হয় । সুতরাং তিনি উহার প্রকাশ দেখিয়া বাইতে পারেন নাই ।

১৯২৪ খৃষ্টাব্দের ১৫ই নভেম্বর কলিকাতা মিউনিসিপ্যাল গেজেটের প্রথম সংখ্যা প্রকাশিত হয় । এই সংখ্যার সম্পাদকীয় স্তম্ভে নিম্নলিখিত মন্তব্য স্থান পাইয়াছিল—

“প্রধান কর্ম-সচিবের গ্রেপ্তারে কর্পোরেশন কতদূর ক্ষতিগ্রস্ত হইয়াছে, যাহারা ইহার বহির্ভাগে অবস্থিত তাহাদের পক্ষে তাহা পরিমাপ করা দুঃসাধ্য । \* \* \* শ্রীযুক্ত বসু কর্পোরেশনের শুধু কর্ম-সচিব ছিলেন না ; তিনি ছিলেন প্রত্যেক প্রয়োজনীয় কার্যের বা পরিকল্পিত কার্য-সম্পাদনের নিয়ন্ত্রণকারী । এই গেজেট প্রকাশের পরিকল্পনা তাঁহারই মস্তিষ্ক-প্রসূত । আমরা জানি, তিনি ইহার পরিচালনার্থ একটি বিস্তৃত কর্মপদ্ধতি প্রস্তুত করিতেছিলেন ।”

সুভাষচন্দ্র বসুর আলিপুর সেন্ট্রাল জেলে অবস্থিতিকালে তাঁহাকে কর্পোরেশনের কার্য-সংক্রান্ত কাগজ-পত্র দেখিতে এবং তৎসংশ্লিষ্ট লোকজনের সহিত দেখা-সাক্ষাৎ করিতে দেওয়া হইত । পরে যখন গভর্নমেন্ট উহা বন্ধ করিয়া দিলেন, তখন কর্পোরেশন মিঃ জে. সি. মুখার্জীকে তাঁহার স্থলে কার্য করিবার জন্য প্রথমে তিন মাসের জন্য নিযুক্ত করিলেন ; তৎপরে সুভাষচন্দ্রকে আরও ছুটি মঞ্জুর করা হয় এবং এই অস্থায়ী ব্যবস্থা চলিতে থাকে ।

গ্রেপ্তারের পর সুভাষচন্দ্রকে প্রথমে কিছু দিন আলিপুর সেন্ট্রাল জেলে রাখা হয়, পরে তথা হইতে তিনি বহরমপুর



জেলে স্থানান্তরিত হন। বহরমপুর হইতে তাঁহাকে ব্রহ্মদেশের মান্দালয়ে নির্বাসিত করা হইল।

মান্দালয়ে নির্বাসিত জীবনে নির্জ্ঞান কারাবাসের ফলে এবং অতিরিক্ত গ্রীষ্মাধিক্যেহেতু সুভাষচন্দ্রের স্বাস্থ্য ভগ্ন হইয়া যায়, ১৯২৭ খৃষ্টাব্দের এপ্রিল মাসে তিনি শয্যাশায়ী হইয়া পড়েন। ইহাতে বঙ্গীয় গভর্নমেন্ট তাঁহাকে মান্দালয় হইতে কলিকাতায় না আসিয়া সোজাসুজি ইয়োরোপ যাওয়ার অনুমতি দিবার প্রস্তাব করেন; কিন্তু সুভাষচন্দ্র গভর্নমেন্টের এই প্রস্তাব প্রত্যাখ্যান করিয়াছিলেন।

ইতঃপূর্বে গভর্নমেন্ট মান্দালয়ে অবস্থিত বন্দীদিগকে পুষ্কা ও ধর্ম্যকার্যের জন্য অর্থ প্রদানে অস্বীকৃত হন। এই অস্বীকৃতির প্রতিবাদ-স্বরূপ ১৯২৬ খৃষ্টাব্দের ২০শে ফেব্রুয়ারী তারিখে সুভাষচন্দ্রও অন্যান্য বন্দীগণের সহিত অনশন-ব্রত অবলম্বন করেন। কলিকাতা কর্পোরেশন ২৪শে ফেব্রুয়ারী তারিখের সভায় গভর্নমেন্টের এই কার্যের ভীত প্রতিবাদ করেন।

২৬শে ফেব্রুয়ারী সমগ্র কলিকাতা মহানগরীর নাগরিকবৃন্দ গভর্নমেন্টের এই কার্যের প্রতিবাদে পূর্ণ হরতাল প্রতিপালন করে; পুনরায় ২৮শে ফেব্রুয়ারী তারিখে বাংলার অয়ান-কুসুম-তুল্য স্কুমার সন্তানগণের দৃষ্টিতে আন্তরিক সহানুভূতি জ্ঞাপন করিয়া কলিকাতাবাসী দ্বিতীয় বার হরতালের অনুষ্ঠান করে। অবশেষে সুভাষচন্দ্র ও তাঁহার সঙ্গী বন্দীগণ ৪ঠা মার্চ তারিখে অনশন-ব্রত পরিহার করেন।

এই অনশন-ব্রত উদ্‌ঘাপনে সুভাষচন্দ্র ও তাঁহার সঙ্গী বন্দি-গণের মানসিক শক্তি কিরূপ বিপুল, তাহা সহজেই অনুমিত হয়। সাধারণ মানুষ কয়েক ঘণ্টা বা দুই-এক দিনের উপবাসে কিরূপ কাতর হইয়া পড়ে, তাহা নিত্য প্রত্যক্ষের বিষয়; কিন্তু যাহারা প্রায় পনের দিন ক্ষুৎ-পিপাসার কঠোর জ্বালা নির্বিবকার-চিত্তে সহ্য করিতে পারে,—তাহারা বাস্তবিকই প্রণম্য ও নমস্ক্য। সাধারণের গণ্ডী অপেক্ষা এই সমস্ত মহা-মানব যে অনেক উর্দ্ধস্তরে অবস্থিত, সে সম্বন্ধে কোন সন্দেহ নাই।

১৯২৫ খৃষ্টাব্দের ১৬ই জুন মঙ্গলবার, চির-তুষারমণ্ডিত হিমালয়ের দুর্জয়-লিঙ্গ শৈল-শিখরে বাংলার গৌরবরবি মহামতি দেশবন্ধু চিত্তরঞ্জন চিরকালের জন্য অস্তাচলে গমন করেন। সুভাষচন্দ্র তখন সুদূর ব্রহ্মদেশে মান্দালয়ে কারা-প্রাচীরের অন্তরালে নিবাসিত জীবন যাপন করিতেছিলেন। সুতরাং দেশবন্ধুকে হারাইয়া তাঁহার অন্তরে শোক-দুঃখের যে বিরাট ঝঞ্ঝা বহিয়া যাইতেছিল, তখন তাহার কোন বাহ্য বিকাশ পরিলক্ষিত হয় নাই।

১৯২৬ খৃষ্টাব্দের ৩রা মার্চ মান্দালয় হইতে তিনি যে পত্র লিখিয়াছিলেন, তাহাতে তাঁহার অন্তরের ব্যথা পূর্ণভাবে প্রকাশ পাইয়াছে। এতদ্ব্যতীত এই পত্রে তিনি দেশবন্ধুর সজ্জ-গঠন শক্তি, অনুগত ব্যক্তির প্রতি ভালবাসা, কবিত্ব, ধর্ম্য এবং পরোপকার-বৃত্তির বিষয়ে অনেক কথা বলিয়াছেন। সুভাষচন্দ্র এই একখানি পত্রে দেশবন্ধুর সর্বতোমুখী প্রতিভার

যে রূপ বিশদ পরিচয় লিপিবদ্ধ করিয়া গিয়াছেন, সেইরূপ সুসংযত ভাষায় অনুরূপ ভাবের আলোচনা খুব কমই দেখিতে পাওয়া যায়। নিম্নে সেই পত্র হইতে স্থানে-স্থানে সামান্য উদ্ধৃত হইল—

“তাঁহার ( দেশবন্ধুর ) জীবনের মাত্র তিন বৎসর কাল আমি তাঁহার সঙ্গে ছিলাম এবং অনুচর হইয়া তাঁহার কাজ করিয়াছিলাম। এই সময়ের মধ্যে চেষ্টা করিলে তাঁহার নিকট অনেক কিছু নিখিতে পারিতাম; কিন্তু চোখ থাকিতে কি আমরা চোখের মূল্য বুঝি? \* \* \* দেশবন্ধুর সহিত আমার শেষ দেখা আলিপুর সেন্ট্রাল জেলে। আরোগ্যলাভের জন্য এবং বিশ্রাম পাইবার ভরসায় তিনি সিমলা পাহাড়ে গিয়াছিলেন, আমাদের গ্রেপ্তারের সংবাদ পাইয়া তৎক্ষণাৎ সিমলা হইতে রওনা হইয়া কলিকাতায় আসেন। আমাকে দেখিতে তিনি দুই বার আলিপুর সেন্ট্রাল জেলে আসেন এবং আমাদের শেষ সাক্ষাৎ হয় বহরমপুর জেলে বদলী হইবার পূর্বে। প্রয়োজনীয় কথাবার্তা শেষ হইলে আমি তাঁহার পায়ের ধূলা লইয়া বলিলাম—‘আপনার সঙ্গে আমার বোধ হয় অনেক দিন দেখা হইবে না।’ তিনি তাঁহার স্বাভাবিক প্রফুল্লতা ও উৎসাহের সহিত বলিলেন—‘না, আমি তোমাদের শীগ্গির খালাস করে আনছি।’

হায়! তখন কে জানিত যে ইহজীবনে আর তাঁহার সাক্ষাৎ পাইব না! \* \* \* তাঁহার সেই শেষ স্মৃতিটুকু আমার প্রাণের সম্বল হইয়া দাঁড়াইয়াছে। \* \* \* জনমণ্ডলীর উপর দেশবন্ধুর অতুলনীয় অলৌকিক প্রভাবের গূঢ় কারণ কি—এ প্রশ্নের সমাধান করিবার চেষ্টা অনেকে করিয়াছেন। আমি সর্বপ্রথমে তাঁহার প্রভাবের একটি কারণ নির্দেশ করিতে চাই। আমি দেখিয়াছি, তিনি সর্বদা মানুষের দোষগুণ বিচার না করিয়া তাহাকে ভালবাসিতে পারিতেন। \* \* \* কত বিভিন্ন রকমের লোক হৃদয়ের টানে নিকটে আসিত এবং জীবনের কত ক্ষেত্রে এই নিমিত্ত

তাঁহার প্রভাব ছিল। সমুদ্রে প্রকাণ্ড ঘূর্ণাবর্তের ন্যায় এই বিপুল জন-সমাজে তিনি চারিদিক্ হইতে সকল প্রাণকে আকর্ষণ করিতেন \*\*\* সহকর্মী বা অনুচরকে ভাল না বাসিতে পারিলে বিনিময়ে তাহার প্রাণ পাওয়া যায় না। সাধারণ সাংসারিক জীবনের ন্যায় দেশবন্ধুর আত্ম-পর-জ্ঞান ছিল না। তাঁহার বাড়ী সাধারণ সম্পত্তি হইয়া পড়িয়াছিল। সর্বত্র—এমন কি, তাঁহার শয়ন-প্রকোষ্ঠেও সকলের গতিবিধি ছিল।\*\*\* দেশবন্ধুর সজ্জের প্রধান নিয়ম ছিল সংযম ও শৃঙ্খলা। পরস্পরের মধ্যে স্বতানৈক্য ঘটতে পারে কিন্তু একবার কর্তব্য স্থির হইয়া গেলে সকলকে সেই পন্থা অবলম্বন করিতেই হইবে। সজ্জের নিয়মানুবর্তী হওয়ার নিয়ম ভারতবর্ষে নূতন নয়। ২৫০০ বৎসর পূর্বে ভগবান্ বুদ্ধ সর্ব প্রথমে ভারত-বাসীকে এই শিক্ষা দিয়া যান। আজ পর্যন্ত পৃথিবীর সর্বত্র বৌদ্ধগণ প্রার্থনার সময় বলিয়া থাকেন—‘বুদ্ধং শরণং গচ্ছামি, ধম্মং শরণং গচ্ছামি, সজ্জং শরণং গচ্ছামি।’

বস্তুতঃ কি ধর্ম প্রচার, কি স্বদেশ-সেবা, সজ্জ ও সজ্জানুবর্তিতা ভিন্ন কোন মহৎ কাজ জগতে সম্ভবপর নয়।\*\*\* বাংলার বৈষ্ণবধর্ম ও দৈতানৈবৈতবাদ দেশবন্ধুকে নাস্তিকতা হইতে টানিয়া লইয়া নীরস বেদান্তের ভিতর দিয়া প্রেমমার্গে লইয়া গিয়াছিল।\*\*\* বাংলার শিক্ষা ও সভ্যতার সার সঞ্চলন করিয়া তাহাতে রূপ দিলে যেরূপ মানুষের উদ্ভব হয়, দেশবন্ধু অনেকটা সেইরূপ ছিলেন।\*\*\* জীবনে-মরণে শয়নে-স্বপনে তাঁহার ছিল এক ধ্যান—এক চিন্তা—স্বদেশ-সেবা—এবং সেই স্বদেশ-সেবাই তাঁহার ধর্মজীবনের সোপান-স্বরূপ।”

—দেশবন্ধু-স্মৃতি, পৃঃ ৫৪৩-৬৫

অবশেষে সুভাষচন্দ্রের দেহে ক্ষয়-রোগের লক্ষণ প্রকাশ পাইতে থাকে। তাঁহার স্বাস্থ্য পরীক্ষার্থ তাঁহাকে রেঙ্গুন হইতে কলিকাতায় আনিয়া ব্যারাকপুরের নিকট গঙ্গাবক্ষে

বজ্রায় রাখা হয় এবং ডাক্তারী পরীক্ষা নিষ্পন্ন হয়। আড়াই বৎসরেরও অধিক কাল কারাবাসের পর ১৯২৭ খৃষ্টাব্দের ১৬ই মে তারিখে তাঁহাকে মুক্তিদান করা হয়।

তাঁহার মুক্তিলাভের একদিন পরে কলিকাতা কর্পোরেশন সাদরে তাঁহার সম্বর্ধন করেন। ইহাও বিশেষ উল্লেখযোগ্য যে, কর্পোরেশন মহামতি সুভাষচন্দ্রকে ছুটি প্রদান করিয়াছিলেন। তাহা শেষ হইবার দুই দিন পরে তাঁহাকে মুক্তি দেওয়া হইয়াছিল। ঠিক দুই দিন পূর্বের অস্থায়ী কম্বিসচিব মিঃ জে. সি. মুখার্জি সুভাষচন্দ্রের স্থলে স্থায়ী প্রধান কম্বিসচিব নিযুক্ত হইয়াছিলেন।

## জন-নায়ক

সাইমন-কমিশন বয়কট—মহাত্মার সহিত মতভেদ—কংগ্রেসের কলিকাতা-অধিবেশন—লাহোর-অধিবেশন—নানা সংশ্রবে সুভাষচন্দ্র—রাজনীতিক লাঞ্ছিতগণের দিবসে শোভাযাত্রা—নয়মাস কারাদণ্ড—ষ্টুডেন্টস কনফারেন্স—স্বদেশী লীগ।

রোগশয্যা পরিত্যাগের পরই সুভাষচন্দ্র পুনরায় তুভিক্ষ-পীড়িত জনপদে সাহায্য-প্রদানের চেষ্টায় অগ্রণী হইলেন। পুনরায় নির্বাচন-প্রতিদ্বন্দ্বিতা চালাইয়া দেশবন্ধুর আয়ত্ন কার্য পূর্ণ করিবার জন্তও সুভাষচন্দ্র বন্ধপরিষ্কর হইলেন এবং দেশের সর্বত্র স্বাধীনতার বাণী ঘোষণা করিয়া বেড়াইতে লাগিলেন।

এই সময় সাইমন-কমিশন ভারতের সর্বত্র পরিভ্রমণে প্রবৃত্ত হইয়াছিলেন। এই কমিশনের উদ্দেশ্য ছিল যে, তাঁহারা ভারতের রাজনৈতিক, সামাজিক এবং অর্থনৈতিক অবস্থা বিশদরূপে পর্যালোচনা করিবেন এবং স্থির করিবেন যে ভারতবর্ষকে কতটা শাসন-ভার দেওয়া যাইতে পারে, তাহা নির্ণয় করিবেন।

কংগ্রেসের সাধারণ সম্পাদক তখন সুভাষচন্দ্র ও পণ্ডিত জওহরলাল নেহেরু। কমিশনের ঐ উদ্দেশ্য—অর্থাৎ ভারতবর্ষকে কতটুকু দেওয়া যাইতে পারে এই সঙ্কীর্ণ নীতি তাঁহাদের মনঃপূত হইল না; তাহার ফলে কংগ্রেস স্থির করিলেন, সাইমন-কমিশন বয়কট করা হইবে।

১৯২৮ সালের ৩রা ফেব্রুয়ারী সাইমন-কমিশন বোম্বাইয়ে পদার্পণ করিতেই, সহস্র কণ্ঠে “সাইমন, ফিরিয়া যাও,” জনমতের এই স্পন্দিত দাবী সমস্বরে ঘোষিত হইল এবং শত-শত কৃষ্ণ পতাকা সঞ্চালিত হইয়া কমিশনকে অবাঞ্ছিত বলিয়া প্রচার করিল। বাংলাদেশে সাইমন-কমিশন বয়কটকে তীব্র করিয়া তুলিলেন সুভাষচন্দ্র স্বয়ং!

সুভাষচন্দ্র ভাবিয়াছিলেন, এই সাইমন-কমিশনকে কেন্দ্র করিয়াই তিনি এমন এক বিরাট আন্দোলনের সৃষ্টি করিবেন, যাহাতে অসন্তুষ্ট ও ক্ষুব্ধ জনমতের নিকট ব্রিটিশ-প্রভু চিরদিনের জন্য অবনত হইয়া যায়! সেইজন্য মে মাসে তিনি সবরমতী আশ্রমে মহাত্মা গান্ধীর সঙ্গে সাক্ষাৎ করিয়া, তাঁহাকে এই আন্দোলনে নেতৃত্ব করিতে অনুরোধ করেন। কিন্তু

মহাত্মা গান্ধী কোনদিনই এমন চরমপন্থী ছিলেন না। তিনি চাহিয়াছিলেন, আবেদন-নিবেদন ও আপোষ করিয়া যতটা আদায় করিয়া লওয়া যায় তাহাতেই পরিতৃপ্ত থাকিতে। সুতরাং সুভাষচন্দ্রের উগ্রপন্থা তিনি অনুমোদন করিতে পারিলেন না। তিনি বিশেষ চিন্তা করিয়া সুভাষচন্দ্রকে জানাইয়া দিলেন, “আমি এ কাজে ভগবানের কোন নির্দেশ পাইতেছি না।”

অবশ্য ইহাতে মহাত্মা গান্ধীকে কোন দোষ দেওয়া চলে না ; কারণ, ইহার পূর্বে পণ্ডিত মতিলাল নেহেরুর সভাপতিত্বে “নেহেরু-কমিটি” নামে একটি কমিটি গঠিত হইয়াছিল। ভারতবর্ষের আকাঙ্ক্ষা ‘পূর্ণ স্বাধীনতা’ হইলে, সে পথ নিতান্তই বিপজ্জনক ; সম্ভবতঃ ইহা ধারণা করিয়াই সেই কমিটি পূর্ণ স্বাধীনতা না মানিয়া, ঔপনিবেশিক স্বায়ত্তশাসনকেই তাঁহাদের ঈপ্সিত বস্তু বলিয়া মানিয়া লইয়াছিলেন। মহাত্মা গান্ধীও এই মতের অনুকূলেই ছিলেন।

১৯২৮ খৃষ্টাব্দে লক্ষ্ণৌয়ে সর্বদলের এক সম্মেলন হয়। তাহাতেও নেহেরু-কমিটির স্বায়ত্তশাসন-প্রস্তাবকেই ভারতের লক্ষ্য বলিয়া গৃহীত হইল। ইহাতে সুভাষচন্দ্র ও পণ্ডিত জওহরলাল ফুল্ল হইয়া ‘স্বাধীনতা-সঙ্ঘ’ নামে একটি ভিন্ন প্রতিষ্ঠান গঠন করিয়াছিলেন।

সাইমন-কমিশনকে কেন্দ্র করিয়া জন-আন্দোলনের নেতৃত্ব ভার মহাত্মা গান্ধী গ্রহণ না করায় সুভাষচন্দ্র ব্যথিত হইয়া ফিরিয়া আসিলেন, কিন্তু মহাত্মার এই নিষ্ক্রিয়তা একেবারেই

সহ করিতে পারিলেন না। সেই বৎসরই মে মাসে পুণায় যে মহারাষ্ট্র প্রাদেশিক কনফারেন্স হয়, তিনি তাহাতে সভাপতিত্ব করিবার কালে মহাত্মার এই নিষ্ক্রিয়তার তীব্র সমালোচনা করেন। মহাত্মার চিন্তাধারা ও কার্যপদ্ধতির সহিত তিনি যে একমত হইতে পারিতেছেন না, প্রকাশ্য জনসভায় সম্ভবতঃ এই তাহার প্রথম অভিব্যক্তি।

সেই বৎসরই ডিসেম্বর মাসে কলিকাতায় ভারতীয় জাতীয় মহা-সমিতির ত্রিচত্বারিংশৎ অধিবেশন অনুষ্ঠিত হয়। এই সময় সুভাষচন্দ্র পুনরায় স্বেচ্ছাসেবক-বাহিনী সংগঠনে আত্মনিয়োগ করিলেন এবং স্বয়ং স্বেচ্ছাসেবক-বাহিনীর জেনারেল-অফিসার-কম্যাণ্ডিং-রূপে জাতীয় মহাসমিতির নির্বাচিত সভাপতি পরলোকগত পণ্ডিত মতিলাল নেহেরুকে বিরাট শোভাযাত্রায় সম্বর্ধনা করেন।

কংগ্রেসের এই অধিবেশনে মহাত্মার মতবাদের সহিত সুভাষচন্দ্রের পুনরায় প্রকাশ্য বিরোধিতা হইল। কারণ, মহাত্মা গান্ধীর প্রস্তাব ছিল আপোষ-মীমাংসার প্রস্তাব; কিন্তু দেশপ্রেমের মূর্তি আয়েয়গিরি সুভাষচন্দ্রের পক্ষে ব্রিটিশ রাজের অধীনে স্বায়ত্তশাসনের অধিকার লইয়া তৃপ্ত ভাবে অবস্থান করা, একেবারেই ছিল অসম্ভব। স্বাধীনতা—পূর্ণ স্বাধীনতাই ছিল তাঁহার লক্ষ্য; কংগ্রেসকে তিনি সেই ভাবেই অনুপ্রাণিত দেখিতে আশা করিয়াছিলেন; কিন্তু তাহাতে হতাশ হইয়া তিনি মহাত্মা গান্ধীর আপোষ-মীমাংসা প্রস্তাবের জ্বলন্ত ভাষায় প্রতিবাদ করেন।



তিনি বলিলেন,—

“স্বল্প ভবিষ্যতে স্বাধীনতার প্রার্থী আমরা নহি। ইহা আমাদের অবিলম্বে প্রাপ্য বস্তু।” \*

তিনি আরও বলেন,—

“আপনারা সকলেই জানেন, দেশে জাতীয় আন্দোলনের উধাকাল হইতে বাংলাদেশ স্বাধীনতা বলিতে সম্পূর্ণ স্বাধীনতাই বুঝিয়াছে— ডোমিনিয়ান্ ষ্টেটাস্কে কখনও স্বাধীনতা বলিয়া ব্যাখ্যা করে নাই।” †

তাহার অভিযত এই যে, ব্রিটিশের সহিত সম্পর্ক সম্পূর্ণ বিচ্ছিন্ন হওয়ার পূর্বে কখনও প্রকৃত স্বাধীনতালাভ হইতে পারে না ‡:

সুভাষচন্দ্রের ইচ্ছা ছিল, পূর্ণ-স্বাধীনতাই কংগ্রেসের কাম্য, ইহা ঘোষণা করিয়া তখন হইতেই সরকারের বিরুদ্ধে আপোষ-বিহীন সংগ্রাম শুরু করা। কিন্তু মহাত্মা গান্ধী বলিলেন, “ব্রিটিশ গভর্নমেন্ট যদি ১৯২৯ সালের মধ্যে নেহেরু-কমিটির রিপোর্ট মানিয়া লইয়া স্বায়ত্তশাসন মঞ্জুর করেন, তাহা হইলে ভারতবর্ষ তাহা গ্রহণ করিবে। যদি তাহা না করে,

\* “We stand for independence not in the distant future but as our immediate objective.”

—*The Calcutta Municipal Gazette*, Vol. XLII, No. 16, P. 442(c).

† “So far as Bengal is concerned, you are aware that since the dawn of the National movement in this country, we have always interpreted freedom as complete and full independence. We have never interpreted it in terms of Dominion Status.”

—*Ibid.*, P. 443(c).

‡ “He was of opinion that there could be no true freedom till British connection was severed.”

—*Ibid.*, P. 442(c).

কংগ্রেস তাহা হইলে অহিংস অসহযোগ-আন্দোলন আরম্ভ করিবে।”

সুতরাং সুভাষচন্দ্রের পূর্ণ স্বাধীনতা ও মহাত্মার তথা-কথিত স্বাধীনতা, এই দুই বিষয়ে ভোট গ্রহণ করা হইল। কিন্তু জনমত তখনও এত তীব্র হইয়া উঠে নাই যে প্রতিষ্ঠিত শ্রদ্ধা ও সঙ্কোচের গণ্ডী এড়াইয়া তরুণের বিপদসঙ্কুল পথ বাছিয়া লইবে! কাজেই সুভাষচন্দ্রের পূর্ণ স্বাধীনতার প্রস্তাব গৃহীত হইল না—তিনি পরাজিত হইলেন।

সুভাষচন্দ্র পরাজিত হইলেন বটে, কিন্তু মহাত্মা গান্ধীকে সম্ভবতঃ চিন্তিত হইতে হইল! তিনি লক্ষ্য করিলেন, সুভাষচন্দ্র ও জওহরলাল প্রভৃতি চরমপন্থী তরুণের দল ক্রমশঃই নরমপন্থী জননেতা কংগ্রেসের সতর্ক চিন্তাধারাকে যেন অতিক্রম করিয়া যাইতেছে! সুতরাং লাহোরে কংগ্রেসের যে পরবর্তী অধিবেশন হইবে, তাহার সভাপতি নির্বাচনে খুব সাবধানতার প্রয়োজন অনুভব করিলেন।

চিন্তা অনুযায়ী কার্য হইল। পণ্ডিত জওহরলাল নেহেরু লাহোর-কংগ্রেসের প্রেসিডেন্ট নির্বাচিত হইলেন। তাঁহাকে এই মর্যাদা-দানের ফলে পণ্ডিতজী চরমপন্থী দল হইতে মহাত্মা গান্ধীর নরমদলে আকৃষ্ট হইয়া পড়িলেন, এবং মহাত্মা গান্ধীর অভিমতকেই নিজের মত বলিয়া মানিয়া লইলেন।

কিন্তু মহাত্মা গান্ধী সম্ভবতঃ ইতোমধ্যে নিজের ভুল বুঝিতে পারিয়াছিলেন। কংগ্রেসের কলিকাতা-অধিবেশনে তিনি সুভাষচন্দ্রের যে পূর্ণ স্বাধীনতা-প্রস্তাবের বিরোধী ছিলেন,

লাহোর-অধিবেশনে তিনি নিজেই সেই পূর্ণ স্বাধীনতার প্রস্তাব আনয়ন করিলেন।

সুভাষচন্দ্রের চিন্তাধারা সর্বদাই কিছু অগ্রবর্তী; তিনি প্রস্তাব করিলেন, ব্রিটিশ গভর্নমেন্টকে পূর্ণভাবে বয়কট করা হটক, আইন-অমান্য খান্দোলন করা হটক এবং পাশাপাশি জাতীয় গভর্নমেন্ট প্রতিষ্ঠা করা হটক। কিন্তু সুভাষচন্দ্রের এই প্রস্তাব গৃহীত হইল না।

লাহোর-অধিবেশনের পূর্বে বড়নাট লর্ড অারউইন ভারত-বর্ষকে ঔপনিবেশিক স্বায়ত্তশাসনের প্রলোভন দেখাইয়াছিলেন এবং লণ্ডনে 'রাউণ্ড টেবিল কন্ফারেন্স' নামে এক সর্বদল-সম্মেলন হইবে ইহা ঘোষণা করিয়াছিলেন।

অনেকেই ছিলেন এই কন্ফারেন্সে যোগদানের পক্ষে। কিন্তু সুভাষচন্দ্র ও কিছু প্রভূতি কয়েকজন মাত্র ইহার বিরোধিতা করিলেন। তিনি রাজপুরুষদের কাহারও কাছে কোন ভিক্ষার প্রার্থনা বা কাহারও সহিত কোন আপোষমূলক আলোচনা চালাইবার সম্পূর্ণ বিরোধী ছিলেন। অনমনীয় সুভাষচন্দ্রের ইহাই ছিল চারিত্রিক বৈশিষ্ট্য।

অক্লান্তকর্মী সুভাষচন্দ্র দেশের প্রায় প্রত্যেক কাজের সঙ্গেই সংশ্লিষ্ট ছিলেন।

১৯২৮ খৃষ্টাব্দের ২৮শে ডিসেম্বর তারিখে কলিকাতার হিন্দুস্থান সেবাদল-কন্ফারেন্সের যে অধিবেশন হয়, সেই অধিবেশনে সুভাষচন্দ্র সভাপতির আসন গ্রহণ করেন এবং

সমগ্র দেশকে সামরিক শৃঙ্খলায় উদ্ভূত করিবার জন্য স্বেচ্ছাসেবক-বাহিনী গঠনের প্রয়োজনীয়তার বিষয় বিশেষ-ভাবে উল্লেখ করেন। তিনি বলেন—

“বর্তমান কালে দেশে যুবক-আন্দোলন ও শরীর-চর্চার আন্দোলনের দ্রুত প্রসার একটি বিশেষ আশার বিষয়। এই দুইটি আন্দোলনের মধ্যে সংযোগ-সাধন একান্ত দরকার।

যুবকগণকে ব্যায়ামের দ্বারা সুগঠিত, শিক্ষিত ও সংযত স্বেচ্ছাসেবকে রূপান্তরিত করিতে হইবে; তবেই আমরা নূতন এমন একটি পুরুষের আবির্ভাবের আশা করিতে পারিব, যাহারা ভারতের স্বাধীনতা অর্জন করিয়া উহা রক্ষা করিতে পারিবে।” \*

১৯২৭ খৃষ্টাব্দ হইতে ১৯২৯ খৃষ্টাব্দ পর্য্যন্ত তিনি বঙ্গীয় প্রাদেশিক কংগ্রেস-কমিটির সভাপতি এবং নিখিল-ভারত কংগ্রেস-কমিটির সাধারণ সম্পাদকরূপে কার্য করেন। ১৯২৯ খৃষ্টাব্দে তিনি নিখিল-ভারত ট্রেড-ইউনিয়ান কংগ্রেসের সভাপতি নির্বাচিত হন। এই পদে তিনি ১৯৩১ খৃষ্টাব্দ পর্য্যন্ত কার্য করেন।

১৯২৯ খৃষ্টাব্দের জুন মাসে সুভাষচন্দ্র বঙ্গীয় কাউন্সিল নির্বাচনে কংগ্রেস-কর্মীগণকে পরিচালিত করেন। ১৯২৯ খৃষ্টাব্দের এপ্রিল মাসে কাউন্সিল ভঙ্গ হয় এবং অধিকাংশ

\* “One of the hopeful features of the times is the rapid expansion of the youth movement and the physical culture movement all over the country. There must be a co-ordination between these two movements. Youths must be drilled, trained and disciplined as Volunteers. Then alone can we hope to rear up a new generation of men who will win freedom for India and have strength to retain it.”

—*Ibid*, P. 442(d).

কংগ্রেস-কর্মী অতিজন-ভোটে কিংবা বিনা বাধায় কাউন্সিলের সদস্য নির্বাচিত হন।

১৯২৯ খৃষ্টাব্দের আগস্ট মাসে সুভাষচন্দ্র দক্ষিণ কলিকাতায় একটি শোভাযাত্রা পরিচালনা করেন। এই শোভাযাত্রার উদ্দেশ্য ছিল—নিখিল-ভারতীয় রাজনীতিক লাক্ষিতগণের দিবস উপলক্ষে রাজনীতিক কারণে লাক্ষণাপ্রাপ্ত ব্যক্তিগণের প্রতি সহানুভূতি-প্রদান। এই শোভাযাত্রা পরিচালনার জন্য ১৯৩০ খৃষ্টাব্দের জানুয়ারী মাসে তিনি অভিযুক্ত হন এবং বিচারে ২৩শে জানুয়ারী তারিখে তাঁহার প্রতি নয় মাস সশ্রম কারাদণ্ডের আদেশ হয়।

১৯২৯ খৃষ্টাব্দের সেপ্টেম্বর মাসে লাহোর-ঘড়ঘত্র মামলার আসামী যতীনদাস দাস লাহোর সেন্ট্রাল জেলে অনশনব্রত গ্রহণ করেন এবং ৬৩ দিন উপবাসের পর ইচ্ছামৃত্যু যতীন দাসের অমর আত্মা নশ্বর দেহ ত্যাগ করিয়া স্বর্গরথে অমর-লোকে প্রস্থান করে। যতীন দাসের শবদেহ কলিকাতায় আনা হইল, সুভাষচন্দ্র শবানুগমনের বিরাট শোভাযাত্রা পরিচালনা করিয়া মৃত্যুঞ্জয়ী বীরের প্রতি সম্মান প্রদর্শন করিলেন।

উক্ত সেপ্টেম্বর মাসেই তিনি হাওড়া পলিটিক্যাল কন্ফারেন্সে সভাপতির আসন গ্রহণ করেন।

১৯২৯ খৃষ্টাব্দের অক্টোবর মাসে পাঞ্জাব কন্ফারেন্সে কন্ফারেন্সের লাহোর-অধিবেশনে সভাপতিরূপে তিনি যে অভিভাষণ প্রদান করেন, তাহাতে তিনি দেশের যুবকগণের

সম্মুখে স্বাধীনতার আদর্শ মূর্তি উপস্থাপিত করিয়া, সেই আদর্শ অনুসরণের ভার যুবকগণের হস্তে সমর্পণ করেন।

১৯২৯ খৃষ্টাব্দের ডিসেম্বর মাসে তিনি মধ্যপ্রদেশ 'ও বেরারের স্টুডেন্টস্ কনফারেন্সের অমরাবতী-অধিবেশনে সভাপতির আসন গ্রহণ করিয়াছিলেন।

ভারতের স্বাধীনতার স্বরূপ সম্বন্ধে মহাত্মা গান্ধী ও তাঁহার অনুবর্তিগণের সহিত কিছুকাল হইতেই তাঁহার অনৈক্য হইতেছিল। সুতরাং অবশেষে তিনি কংগ্রেস ওয়ার্কিং কমিটির সদস্য-পদ পরিহার করেন। তিনি পুনরায় মহাত্মা গান্ধীর প্রস্তাবের সংশোধনের চেষ্টা করিয়া কলিকাতা-অধিবেশনের মতই অকৃতকার্য হইলেন।

১৯৩০ খৃষ্টাব্দের ডিসেম্বর মাসে সুভাষচন্দ্র “দি বেঙ্গল স্বদেশী লীগ” গঠন করেন। তিনি নিজে এই লীগের সভাপতি ছিলেন। শ্রীযুক্ত ললিতমোহন দাস, ভাইস-প্রেসিডেন্ট; শ্রীযুক্ত কিরণশঙ্কর রায়, জেনারেল সেক্রেটারী এবং শ্রীযুক্ত আনন্দজি হরিদাস কোষাধ্যক্ষ হইলেন। কলেজ ষ্ট্রীট মার্কেটে এই লীগের কার্যালয় অবস্থিত ছিল।

বেঙ্গল স্বদেশী লীগের গবেষণা-শাখায় ডক্টর প্রমথনাথ বন্দ্যোপাধ্যায়, শ্রীযুক্ত নলিনীরঞ্জন সরকার, শ্রীযুক্ত ক্রিভেন্দ্রনাথ সেনগুপ্ত, ডক্টর নলিনাক্ষ সাংঘাল ও ডক্টর সুহৃদকুমার মিত্র সদস্য এবং ডক্টর হরিশচন্দ্র সিংহ সম্পাদক ছিলেন ॥

লীগের উদ্দেশ্য ছিল—ব্যবসায়ী, শিল্পপতি, অর্থনীতিক

ও জাতীয় কন্সিডলের কার্যাবলীর সম্মেলনে বাংলাদেশে স্বদেশীর প্রসার-বৃদ্ধি।

১৯৩১ খৃষ্টাব্দে বেঙ্গল স্বদেশী লীগের গবেষণা-শাখা হইতে সুভাষচন্দ্রের সম্পাদনায় “স্বদেশী এণ্ড বয়কট” নামক ইংরেজী বুলেটিন প্রকাশিত হয়। বঙ্গদেশ, মাদ্রাজ, বোম্বাই, ব্রহ্মদেশ ও সিন্ধুপ্রদেশে এবং সমগ্র ভারতে বিদেশী দ্রব্যের— বিশেষতঃ ব্রিটিশজাত দ্রব্যের আমদানি লইয়া ইহাতে আলোচনা চালান হইয়াছে। তাহাতে দেখা যায় যে, ব্রিটিশজাত দ্রব্যের আমদানী দিন-দিন হ্রাস প্রাপ্ত হইতেছে— সুতরাং বয়কট বেশ সাফল্যমণ্ডিত হইয়াছে।

## কলিকাতা কর্পোরেশনের অন্ডারম্যান ও মেয়র সুভাষচন্দ্র

মেয়র নির্বাচিত—গোলটেবিল বৈঠক-প্রসঙ্গে—গতিবিধি-  
নিয়ন্ত্রণ—নিষেধাজ্ঞা অমান্ত—কারাবাস—পুলিশের যষ্টি-  
প্রহার—করাচি কংগ্রেসে—হিঙ্গলী বন্দিশালার গুলি—  
প্রতিবাদে পদত্যাগ।

দেশপ্রিয় যতীন্দ্রমোহন সেনগুপ্ত মহাশয় অন্তরীণ অবস্থায় থাকা হেতু তিন মাসের মধ্যে অন্ডারম্যানের বিশ্বস্ততার শপথ গ্রহণে অসমর্থ হওয়ায় ১৯৩০ খৃষ্টাব্দের ২২শে আগষ্ট তারিখে সুভাষচন্দ্র বহু মহাশয় কলিকাতা কর্পোরেশনের মেয়র নির্বাচিত হন; কিন্তু সুভাষচন্দ্র তখনও কারা-প্রাচীরের অভ্যন্তরে বন্দী অবস্থায় ছিলেন।

১৯৩০ খৃষ্টাব্দের ২৩শে সেপ্টেম্বর রাত্ৰিকালে সুভাষচন্দ্রকে আলিপুর সেন্ট্রাল জেল হইতে মুক্তিদান করা হয়। তৎপর-দিবস তিনি অল্ডারম্যানের বিশ্বস্ততার শপথ গ্রহণ করেন, এবং তুফল হর্ষধরনির মধ্যে মেয়র-পদে অধিষ্ঠিত হন। তাঁহার মেয়র-পদলাভে কলিকাতা কর্পোরেশনের সর্বত্র একটা ধানন্দের ও উৎসাহের বন্যা প্রবাহিত হইয়াছিল।

মেয়র-পদে অধিষ্ঠিত হইবার পর অভিনন্দন-সূচক বক্তৃতা-বলীর অবসানে, মেয়র সুভাষচন্দ্র প্রত্যুত্তরে বলেন—

“প্রথম মেয়রের প্রথম বক্তৃতাই মিউনিসিপ্যাল টেপ্টামেন্ট বা ধর্ম-পুস্তক-স্বরূপ হইবে ; দেশবন্ধুর কর্ম-পদ্ধতি ছিল—দরিদ্র-নারায়ণের সেবা, অবৈতনিক প্রাথমিক শিক্ষা, বিনা ব্যয়ে চিকিৎসা এবং স্বাস্থ্যপ্রদ বাসগৃহ প্রদান। এই সমস্তই দরিদ্রের পক্ষে আশীর্বাদ-স্বরূপ। এতদ্ভিন্ন স্বল্প ব্যয়ে বিস্তৃত পুষ্টিকর খাদ্য ও দুগ্ধ-সরবরাহ, শোধিত ও মশোধিত জল-সরবরাহের প্রাচুর্য, জলাকীর্ণ ও বস্তি-অঞ্চলে স্বাস্থ্যরক্ষার উৎকৃষ্টতর ব্যবস্থা অবলম্বন, যান-বাহনের উন্নতি-বিধান—এই সমস্তও তাঁহার কার্য-তালিকার অন্তর্ভুক্ত ছিল।

কর্পোরেশনেই ইয়োরোপীয় ফ্যাসিজম্ ও সোশ্যালিজমের সমন্বয় সাধিত হইয়াছে। একদিকে স্ত্রী, সাম্য ও মৈত্রী, ইহারা সোশ্যালিজমের প্রতীক ; অত্রদিকে সংঘম ও কর্মদক্ষতা—এই দুইটি ফ্যাসিজমের প্রতীক ; প্রকৃত পক্ষে সোশ্যালিজমের এবং ফ্যাসিজমের অপূর্ব সমন্বয়—এই কর্পোরেশন।”

১৯৩০ খৃষ্টাব্দের ১৩ই নভেম্বর সুভাষচন্দ্রের নেতৃত্বে কলিকাতা কর্পোরেশনের এক সভায় তদানীন্তন গোলটেবিল-বৈঠকের তীব্র নিন্দা করা হয় ; কারণ, গোলটেবিল-বৈঠক



প্রকৃত পক্ষে সর্বদলীয় প্রতিনিধি-সম্মেলন নহে। ১৩ই নভেম্বর লণ্ডনে গোলটেবিল-বৈঠকের আলোচনা আরম্ভ হইয়াছিল।

১৯৩০ খৃষ্টাব্দের ডিসেম্বর মাসে কলিকাতার মেয়র-রূপে সুভাষচন্দ্র পাবনা পরিভ্রমণে গমন করেন ; তৎকালে পাবনা-মিউনিসিপ্যালিটি একটি সভায় তাঁহাকে অভিনন্দন প্রদান করে। এই অভিনন্দনের উত্তরে তিনি বলিয়াছিলেন—

“মানব-জীবন একটি অখণ্ড পূর্ণতা মাত্র। ইহাকে বায়ুহীন কক্ষে বিভক্ত করা চলে না। অংশে অংশে ইহার প্রতি দৃষ্টি-প্রয়োগ করা সম্ভব নহে। নাগরিক জীবন, রাজনীতিক জীবন ও সামাজিক জীবনকে পরস্পর বিচ্ছিন্ন জীবন মনে করা যাইতে পারে না। অভ্যন্তর হইতে একটা বিরাট আদর্শ উদ্ভূত না হইলে নাগরিক জীবন সুন্দর ও পূর্ণ হওয়া সম্ভব নহে, স্বাধীনতা ব্যতীত সেই আদর্শ উদ্ভূত হওয়া অসম্ভব। \* \* \* প্রভাত-সূর্যোদয়ে যেমন সুদীর্ঘ রজনীর তমসাবৃত মেঘমালা দূরে পলায়ন করে, তেমনি আমরা শীঘ্রই দেখিব যে যুগ-যুগান্তরব্যাপী পরাধীনতা প্রভাতের কুস্মাটিকার মত অন্তর্হিত হইবে এবং স্বাধীনতা-সূর্য্য জাতির ললাটে গৌরবময় বিজয়-টীকা পরাইয়া দিবে।”

সুভাষচন্দ্রের এই সকল বক্তৃতা হইতে স্পষ্টই বুঝিতে পারা যায় যে, স্বাধীনতা ছিল তাঁহার হৃদয়-শোণিত ; স্বাধীনতাকে বাদ দিয়া তিনি কখনও কিছু ভাবিতেই পারিতেন না।

১৯৩১ খৃষ্টাব্দের জানুয়ারী মাসে সুভাষচন্দ্র উত্তরবঙ্গের বিভিন্ন স্থানে পরিভ্রমণ করেন। মালদহ পরিভ্রমণকালে তাঁহার উপর ফৌজদারী কার্যবিধির ১৪৪ ধারা অনুসারে উক্ত

জেলায় প্রবেশের এক নিষেধাজ্ঞা জারি হয়। নির্ভীক সুভাষচন্দ্র এই নিষেধাজ্ঞা অগ্রাহ্য করেন। ফলে তাঁহাকে গ্রেপ্তার করা হয় এবং রেলওয়ে-স্টেশনের বিশ্রামকক্ষে তাঁহার বিচার হয়।

বিচারকালে সুভাষচন্দ্র বলিয়াছিলেন, “এই আদেশে ফৌজদারী কার্যবিধির ১৪৪ ধারার সম্পূর্ণ অপব্যবহার করা হইয়াছে। আত্মমর্যাদা-সম্পন্ন ভারতবাসী হিসাবে আমি ইহা মানিয়া লইতে পারি না।”

এই বিচারে তাঁহার প্রতি নিন্দাশ্রমে এক সপ্তাহের জন্ম কারাবাসের আদেশ হয়।

১৯৩১ খৃষ্টাব্দের ২৬শে জানুয়ারী ‘স্বাধীনতা-দিবস’ উদ্‌যাপন উপলক্ষে সুভাষচন্দ্র স্বয়ং পুরোভাগে থাকিয়া একটি শোভাযাত্রা পরিচালনা করেন। পুলিশ এই শোভাযাত্রা লাঠি-চালনা দ্বারা ভাঙ্গিয়া দেয় এবং সুভাষচন্দ্রও প্রহৃত হন। নিষেধাজ্ঞা অমান্য করিয়া শোভাযাত্রা পরিচালনা করায় তাঁহাকে গ্রেপ্তার করা হয় এবং বিচারে তাঁহার প্রতি ছয় মাস সশ্রম কারাদণ্ডের আদেশ হয়। কিন্তু পরিপূর্ণ ছয় মাস তাঁহাকে কারাদণ্ড ভোগ করিতে হয় নাই। কারণ, বড়লাট লর্ড আরউইনের সহিত মহাত্মা গান্ধীর ইতোমধ্যে এক চুক্তি (Pact) সম্পাদিত হইয়াছিল।

লর্ড আরউইন যখন দেখিলেন যে, অসহযোগ-আন্দোলনের ফলে বিলাতের গোলটেবিল-বৈঠকে কোন ভারতীয় প্রতিনিধি যোগদান করিলেন না, তিনি তখন কৌশলে অসহযোগ-

আন্দোলন দমন করিতে সচেষ্ট হইলেন। মহাত্মার সহিত আলাপ-আলোচনা করিয়া তিনি এইটুকু ব্যবস্থা করিলেন যে, মহাত্মা তাঁহার অসহযোগ-আন্দোলন বন্ধ করিবেন এবং কংগ্রেসের প্রতিনিধি হিসাবে বিলাতে দ্বিতীয় গোলটেবিল-বৈঠকে যোগদান করিবেন। গভর্নমেন্টও সমস্ত রাজনৈতিক বন্দীকে মুক্তি দিতে প্রতিশ্রুত হইলেন। মহাত্মা গান্ধীর সহিত লর্ড আর্ডউইনের এই চুক্তির ফলে সুভাষচন্দ্র পূর্ণদণ্ড ভোগের পূর্বেই, ৮ই মার্চ তারিখে মুক্তিলাভ করিলেন।

গান্ধী ও লর্ড আর্ডউইনের চুক্তি সম্পর্কে আলাপ-আলোচনার সময় একদল উগ্রপন্থী কংগ্রেস-কর্মী তখন মহাত্মাকে অনুরোধ করে যে, পাঞ্জাব-ষড়ষন্ত্র মামলার আসামী ভগৎ সিংএর মুক্তির জন্যও তিনি যেন চেষ্টা করেন।

ভগৎ সিং পাঞ্জাব পরিষদ-কক্ষে বোমা-নিষ্ক্ষেপ করিয়া ধৃত হইয়াছিলেন। বড়লাট তাঁহার মুক্তির কোন বন্দোবস্ত করিলেন না; তাঁহার মুক্তির প্রশ্ন পাঞ্জাব-গভর্নমেন্টের ব্যাপার বলিয়া, তিনি এড়াইয়া যাইবার চেষ্টা করিলেন। ইহা সত্ত্বেও মহাত্মা গান্ধী যে লর্ড আর্ডউইনের সহিত চুক্তি-বন্ধ হইলেন এবং অসহযোগ-আন্দোলন বন্ধ করিয়া গোলটেবিল-বৈঠকে যোগদান করিতে সম্মত হইলেন, ইহাতে দেশের যুব-সম্প্রদায় বিশেষ ক্ষুব্ধ হইলেন। তাঁহারা করাচিতে কংগ্রেসের অধিবেশন-কালে, প্রায় পাশাপাশি 'নও-জোয়ান-কংগ্রেস' নামে অপর একটি সম্মেলন আহ্বান করিলেন।

তরুণ সম্প্রদায়ের এই সম্মেলনে সুভাষচন্দ্র সভাপতি

নির্বাচিত হইলেন ; কিন্তু সম্মেলনের অধিবেশন হইবার পূর্বেই ভগৎ সিং ও শুকদেব সিংএর ফাঁসি হইয়া গেল। ইহাতে তরুণের পুঞ্জীভূত ক্ষোভ যেন চরমে উঠিল ! তাঁহারা মনে করিলেন, যাঁহার গভর্নমেন্ট এত বড় একটা সামাজ্যিক কাজের পৃষ্ঠপোষক ও অনুমোদক, তাঁহার সহিত চুক্তিবদ্ধ হইয়া অসহযোগ-আন্দোলন বন্ধ করা মহাত্মার খুবই অগ্রায় হইয়াছে। সুতরাং অতঃপর তিনি যখন করাচিতে উপস্থিত হইলেন, তখন ক্ষুর জনতা তাঁহাকে কৃষ্ণ পতাকা প্রদর্শন করিয়া অভ্যর্থনা করিল।

নও-জোয়ান কংগ্রেসের অধিবেশন শেষ হইলে, সেই মণ্ডপেই নিখিল-ভারত লাঞ্চিত রাজনীতিক সম্মেলনের অধিবেশন হয়। সুভাষচন্দ্র তাহাতেও সভাপতি হইলেন। তখন সভাপতির অভিভাষণে তিনি বলিয়াছিলেন, “আইন-অমান্য-আন্দোলন বন্ধ করিবার আদেশ দিয়া মহাত্মাজী দেশের স্বাধীনতা লাভের পক্ষে গুরুতর ক্ষতি করিয়াছেন। তাঁহার সঙ্গে বড়লাটের চুক্তি দেশের কাছে বিশ্বাসঘাতকতা মাত্র !”

১৯৩১ খৃস্টাব্দের ৩১শে মার্চ তারিখে করাচি-মিউনিসিপ্যালিটি কলিকাতা-কর্পোরেশনের লর্ড-মেয়র সুভাষচন্দ্রকে এক স্বাগত-অভিনন্দন প্রদান করিয়া সম্বর্ধিত করেন : এই অভিনন্দনের উত্তরে সুভাষচন্দ্র প্রথমেই দেখাইয়া দেন যে, এই পরাধীন দেশে লর্ড বা প্রভু কেহ নাই—সকলেই দাস।\*

\* “Subhash chandra Bose...pointed out that in their enslaved country, there were yet no lords but all slaves.”—*Ibid.* P. 444.

প্রসঙ্গতঃ তিনি পাশ্চাত্য লেখকগণের ভ্রান্ত ধারণার কথা উল্লেখ করিয়া বলেন যে, তাঁহাদের মতে পুরাকালে ভারতবর্ষে গণতন্ত্র বা স্বায়ত্তশাসনমূলক কোন প্রতিষ্ঠান ছিল না।

পাশ্চাত্য পণ্ডিতগণের এই ধারণা যে ভ্রান্তিগূলক, তাহা প্রাচ্য পণ্ডিতগণের গবেষণায় সপ্রমাণিত হইয়াছে। তাঁহারা প্রমাণ করিয়াছেন যে, প্রকৃত প্রস্তাবে ভারতবর্ষে গণতন্ত্র ও স্বায়ত্ত-শাসন-মূলক প্রতিষ্ঠানের সহিত বিশেষ পরিচিত ছিল।

তাঁহাদের আর একটি অভিমত যে, নাগরিক জীবনের সহিত রাষ্ট্রনীতির কোন সম্পর্ক ছিল না ;—কিন্তু তাহা সম্পূর্ণ অসম্ভব। এই সময় সুভাষচন্দ্র দেশবন্ধু চিত্তরঞ্জনের উল্লেখ করিয়া বলেন যে, দেশবন্ধুর মতে নাগরিক শাসন ও রাষ্ট্রশাসনকে জলরোধী কক্ষের মত পৃথক করা সম্ভব নহে ; উভয়কে একটি অখণ্ড বস্তু বলিয়া ধরিতে হইবে। পরিশেষে তিনি বলেন যে, মিউনিসিপ্যালিটি সাহায্য করিলে জাতীয়তার প্রতি কর্তব্য সম্পাদিত হইতে পারে ; সুতরাং জাতীয় প্রতিষ্ঠানসমূহকে রক্ষা করা এবং সহস্র-সহস্র নূতন জাতীয় প্রতিষ্ঠান গড়িয়া তোলা মিউনিসিপ্যালিটির কার্য।

সুভাষচন্দ্রের এই বক্তৃতায়ও সুস্পষ্ট প্রমাণিত হয় যে, পরাধীনতাকে তিনি কত বড় একটা দুর্ভাগ্য বলিয়া মনে করিতেন এবং জাতীয় কার্যের জন্ম তাঁহার সমস্ত অসুঃকরণ কতদিকে উন্মুখ হইয়া থাকিত !

স্বাধীনতা যঁহার অস্থি-মজ্জায় এমন ভাবে মিশিয়া ছিল, সরকারী দণ্ড ও অত্যাচারকে তিনি যে ঘৃণিত ও পাশব কীর্ত্তি বলিয়া মনে করিবেন, তাহাতে আর সন্দেহ কি? সুতরাং সারা ভারতবর্ষে তখন সরকারী চণ্ডনীতি যেভাবে আত্মপ্রকাশ করিতেছিল, বিশেষতঃ বন্দিশালায় আবদ্ধ নিরস্ত্র রাজনৈতিক বন্দীদের উপর তখন স্থানে-স্থানে যে সব অত্যাচার হইতেছিল, সুভাষচন্দ্র তাহা শুনিয়া অত্যন্ত ব্যথিত হন।

নিরস্ত্র বন্দীদের উপর চূড়ান্ত অত্যাচার হইল হিজলী বন্দিশালায়। সেখানে বন্দীদের উপর বেপরোয়া লাঠি-চালনা হইল—গুলি-চালনা হইল। গুলি-চালনার ফলে দুইজন রাজবন্দী নিহত হইলেন।

সকলেই আশা করিয়াছিল, কংগ্রেস এই ব্যাপারে নিশ্চয়ই হস্তক্ষেপ করিবেন; কিন্তু কংগ্রেস তাহাতে বিশেষ কোন আন্দোলন করিলেন না।

নিরস্ত্র বন্দীদেরকে গুলি করিয়া হত্যা করা যে কত নৃশংস ও মর্মান্তিক, সুভাষচন্দ্র তাহা উপলব্ধি করিলেন। তথাপি কংগ্রেস বিশেষ কোন আন্দোলনের পক্ষপাতী নহে, তিনি ইহা লক্ষ্য করিয়া, প্রতিবাদে বঙ্গীয় প্রাদেশিক কংগ্রেস-কমিটির সভাপতির পদ ও কলিকাতা কর্পোরেশনের অল্ডারম্যানের পদে ইস্তফা দিলেন।

## ইয়োৰোপ-প্ৰবাস

১৪৪ ধাৰা অমান্ত—গ্ৰেপ্তাৰ—কাৰাবাস ও ইয়োৰোপ যাত্ৰা—  
প্ৰত্যাৰ্ত্তন ও পিতাৰ মৃত্যু—আৰাৰ ইয়োৰোপে—দেশবাসীৰ  
আমন্ত্ৰণে আগমন—গ্ৰেপ্তাৰ—ইয়োৰোপে তৃতীয়বাৰ।

১৯৩১ খৃষ্টাব্দেৰ অক্টোবৰ মাসেৰ প্ৰথমে ব্যাৰাকপুৰে এক  
শ্ৰমিক-কনফাৰেন্স অনুষ্ঠিত হয়। এই সভায় উপস্থিত না  
হইবাৰ জগু সূভাষচন্দ্ৰেৰ উপৰ কৌজদাৰী কাৰ্য্যবিধিৰ  
১৪৪ ধাৰা জাৰি কৰা হয়; কিন্তু চিৰ-নিৰ্ভীক সূভাষচন্দ্ৰ  
গভৰ্ণমেণ্টেৰ নিষেধাজ্ঞা উপেক্ষা কৰিয়া কনফাৰেন্সে যোগদান  
কৰিলেন।

ঢাকায় পুলিশেৰ অবৈধ কাৰ্য্য-কলাপেৰ তদন্তেৰ জগু  
বেসৰকাৰী তদন্ত-কমিটিৰ সদস্যৰূপে সূভাষচন্দ্ৰ যখন ঢাকা  
যাইতেছিলেন, তৎকালে তেজগাঁও ষ্টেশনে তাঁহাৰ উপৰ  
১৪৪ ধাৰা অনুসাৰে পুনৰায় এক নিষেধাজ্ঞা জাৰি কৰা হয়;  
কিন্তু সূভাষচন্দ্ৰ এই বাৰও নিষেধাজ্ঞা অমান্ত কৰিয়া ঢাকা  
গমন কৰেন।

সৌভাগ্যেৰ বিষয়, উক্ত দুইবাৰেৰ একবাৰও নিষেধাজ্ঞা  
অমান্ত কৰাৰ অজুহাতে তাঁহাকে গ্ৰেপ্তাৰ কৰা হয় নাই।

১৯৩১ খৃষ্টাব্দেৰ ডিসেম্বৰ মাসে তিনি মহাত্মা গান্ধীৰ  
সহিত পৰামৰ্শ কৰিবাৰ জগু বোম্বাই গমন কৰেন। মহাত্মা  
তখন সবে মাত্ৰ গোলটেবিল-বৈঠক হইতে ব্যৰ্থ-মনোৱৰ্থ হইয়া  
ভাৰতবৰ্ষে ফিৰিয়া আসিয়াছেন। মহাত্মা গান্ধীৰ সঙ্গ

আলোচনার বিষয় ছিল—বাংলার রাজনীতিক অবস্থা ও পুলিশের ক্রমবর্ধিত হস্তক্ষেপ। মহাত্মার সহিত সাক্ষাৎকালে তিনি কংগ্রেসের ওয়ার্কিং কমিটির এক অধিবেশনেও যোগদান করিলেন। মহাত্মার সহিত আলাপ-আলোচনা শেষ করিয়া, দেশে ফিরিয়া আসিবার পথে কল্যাণ স্টেশনে ১৯৩২ খৃষ্টাব্দের ২রা জানুয়ারী তারিখে, ১৮১৮ খৃষ্টাব্দের ৩ রেগুলেশন অনুসারে তাঁহাকে গ্রেপ্তার করা হয়।

এইবার তাঁহাকে বাংলার বাহিরে বিভিন্ন জেলে রাখা হয়, ফলে তাঁহার স্বাস্থ্য ভাঙ্গিয়া পড়ে। ইহাতে ভারত-গভর্নমেন্টে ভগ্নস্বাস্থ্য-হেতু ভারতের বাহিরে চিকিৎসার্থ গমন করিবার জন্য তাঁহাকে মুক্তিদান করেন।

১৯৩৩ খৃষ্টাব্দের ১লা জানুয়ারী\* তারিখে জননী-জন্মভূমির নিকট বিদায় গ্রহণ করিয়া সুভাষচন্দ্র দ্বিতীয়বার ইয়োরোপ যাত্রা করেন।

১৯৩৩ খৃষ্টাব্দের ৮ই মার্চ তারিখে তিনি ভিয়েনায় উপনীত হইলেন। তথায় তিনি একটি স্বাস্থ্য-নিরাসে বাস করিতে থাকেন। ভিয়েনায় তিনি কেন্দ্রীয় পরিষদের ভূতপূর্ব সভাপতি, অধুনা-পরলোকগত ভি. জে. পেটেলের সহিত সাক্ষাৎ করেন।

ভি. জে. পেটেলের জীবনের শেষ দিন পর্যন্ত সুভাষচন্দ্রের সহিত তাঁহার ঘনিষ্ঠ সম্পর্ক বিদ্যমান ছিল। এই সময় মহাত্মা গান্ধী আইন-অমান্য-আন্দোলন বন্ধ করায় ভি. জে. পেটেল ও

\* ২৩শে ফেব্রুয়ারী—আনন্দবাজার পত্রিকা।



সুভাষচন্দ্র—উভয়ে সমবেত ভাবে মহাত্মার এই কার্যের সমালোচনা করিয়া এক যুক্ত বিবৃতি প্রদান করেন।

সুভাষচন্দ্রকে মিঃ পেটেল এতটা বিশ্বাস করিয়াছিলেন যে, ভারতের জাতীয় আন্দোলন পরিচালনার নিমিত্ত তিনি তাঁহার উইলে একটা বিপুল অর্থ সুভাষচন্দ্রের হস্তে ন্যস্ত করিবার নির্দেশ দিয়া যান; কিন্তু সুভাষচন্দ্রের দুর্ভাগ্য, তিনি যেন চিরদিনই একটা সজ্জবদ্ধ ষড়যন্ত্রের লক্ষ্যস্থল ছিলেন এবং এই পরাধীন দেশের স্বাভাবিক ক্রোধ-কালিমার উর্দ্ধে থাকিয়া তাঁহার জাতীয় উন্নতির কোন স্বপ্নকেই বাস্তবে রূপান্তরিত করিতে পারিবে না! সুতরাং স্বার্থ-বিশিষ্ট ব্যক্তির নিয়োজিত কৌসলীর আইনগত কূটতর্কে সর্গত পুণ্যশ্লোক মহাপুরুষ ভি. জে. পেটেলের সেই নির্দেশ বাতিল হইয়া গেল— সুভাষচন্দ্রের হাতে কোন অর্থই আসিল না।

ইয়োরোপ প্রবাস-কালে রুশিয়া, ইংলণ্ড ও আমেরিকার যুক্তরাষ্ট্রে গমন তাঁহার পক্ষে নিষিদ্ধ ছিল। লণ্ডনের ইণ্ডিয়ান রিপাবলিকান অ্যাসোসিয়েশনের তাঁবে অনুষ্ঠিত লণ্ডন পলিটিক্যাল কন্ফারেন্সের সভাপতি-পদ গ্রহণের জন্ত তাঁহাকে আহ্বান করা হইয়াছিল; কিন্তু অনুমতি না পাওয়ার তিনি লণ্ডনে উপস্থিত হইতে পারেন নাই। তবে তাঁহার লিখিত অভিভাষণ উক্ত সভায় পাঠ করা হইয়াছিল। তাঁহার এই অভিভাষণ সামুদ্রিক শুল্ক-আইন অনুসারে ভারতে আসা নিষিদ্ধ।

তাঁহার সুপ্রসিদ্ধ পুস্তক 'ভারতীয় সংগ্রাম' (In Struggle) লণ্ডনের একটি পুস্তক-প্রকাশক কোম্পানী প্র [ পৃঃ—৮০

করিয়াছেন। বিভিন্ন দেশের লোকমাণ্য লক্ষপ্রতিষ্ঠ চিন্তাশীল ব্যক্তিবর্গ শতমুখে এই গ্রন্থের প্রশংসা করিয়াছেন। দুঃখের বিষয়, এই গ্রন্থেরও ভারতে আগমন নিষিদ্ধ।

১৯৩৪ খৃষ্টাব্দের শেষ দিকে জানকীনাথ বসু মহাশয় অত্যন্ত অসুস্থ হইয়া পড়েন। সুভাষচন্দ্র চিরস্নেহময় পিতার অসুস্থতার সংবাদে স্থির থাকিতে পারিলেন না। তিনি ৩রা ডিসেম্বর তারিখে গভর্নমেন্টের বিনা অনুমতিতেই আকাশ-যানে ইয়োরোপ হইতে করাচি উপনীত হইলেন। কিন্তু দুঃখ এবং দুর্ভাগ্যের বিষয়—করাচি পৌঁছিয়াই তিনি পিতার মৃত্যু-সংবাদ পাইলেন। তাঁহার দুঃখ রাখিবার স্থান রহিল না। পিতার মৃত্যুকালে তাঁহার দর্শনে বঞ্চিত হওয়া যে কি শোকাবহ ঘটনা, তাহা ভুক্তভোগী ব্যতীত অপরে ঠিক হৃদয়ঙ্গম করিতে পারিবে না।

শোক-ব্যথিত হৃদয় লইয়া তিনি কলিকাতায় আসিয়া উপস্থিত হইলেন। দম্‌দম্-এরোডোমে তাঁহার উপর নিষেধাজ্ঞা জারি হইল যে, তাঁহাকে সরাসরি এলগিন রোডের বাড়ীতে যাইতে হইবে এবং নিজ গৃহে বন্দী ভাবে বাস করিতে হইবে; পরে, সাত দিনের মধ্যে ভারতবর্ষ ত্যাগ করিতে হইবে—এই মর্মে অপর একটি নিষেধাজ্ঞা তাঁহার উপর জারি করা হইল। অবশেষে পিতার শ্রাদ্ধাদি কার্য নিষ্পন্ন না হওয়া পর্য্যন্ত তাঁহাকে অবস্থান করিবার অনুমতি দেওয়া হয়।

গান্ধী পিতৃ-শ্রাদ্ধের অবসানে সুভাষচন্দ্রকে আবার বিধবা জননী  
\* দুঃখিনী জন্মভূমির নিকট বিদায় গ্রহণ করিয়া ১৯৩৫



কতকগুলি মশক বাধা, তাহার উপরে জ্বল বিছানো ।

পৃঃ—৮০



খৃষ্টাব্দের ৮ই জানুয়ারী ক্ষুধমনে, ব্যথিত ও ভয় হৃদয়ে অশ্রু-সজল চক্ষে সুদূর সাগর-পারে যাত্রা করিতে হইল।

ইয়োরোপে ফিরিয়া গিয়া তিনি এমন একটি রোগে আক্রান্ত হইয়া পড়েন যে, তাঁহার দেহে অস্ত্রোপচারের প্রয়োজন হয়। সুপ্রসিদ্ধ ডাক্তার ড্যামিয়েল অস্ত্রোপচার-কার্য নিষ্পন্ন করেন।

অস্ত্রোপচার-কার্য সম্পূর্ণ সাফল্যমণ্ডিত হইয়াছিল; তিনি ধীরে-ধীরে আরোগ্যের পথে অগ্রসর হন।

এই সময় তিনি ভারতীয় জাতীয় আন্দোলনের ইতিহাস (History of the Indian National Movement) রচনায় আত্মনিয়োগ করেন; কিন্তু শারীরিক অসুস্থতাবশতঃ কঠোর পরিশ্রমে অক্ষম হওয়ায় তিনি এই গ্রন্থ শেষ করিতে পারেন নাই।

১৯৩৫ খৃষ্টাব্দের ৬ই জুন তারিখে ভিয়েনায় অনুষ্ঠিত ভারতীয় মধ্য-ইয়োরোপীয় সমিতির (Indian Central European Society) কনফারেন্সে সুভাষচন্দ্র যোগদান করেন।

১৯৩৫ খৃষ্টাব্দের ডিসেম্বর মাসে রোম নগরে অনুষ্ঠিত এমিয়াটিক ফুডেণ্টস্ কনফারেন্সেও সুভাষচন্দ্র যোগদান করিয়াছিলেন। সনামধন্য সিনর মুসোলিনি এই কনফারেন্সের উদ্বোধন করেন।

১৯৩৬ খৃষ্টাব্দের প্রথম ভাগে তিনি আয়ার্ল্যান্ড পরিভ্রমণ করিয়া পুনরায় ভিয়েনায় ফিরিয়া আসিলেন।

সেই বৎসরই মার্চ মাসে তিনি ভারতবর্ষে প্রত্যাবর্তনের সঙ্কল্প প্রকাশ করিলেন।

তাঁহার উদ্দেশ্য ছিল, ভারতীয় জাতীয় মহাসমিতির লক্ষ্মী-অধিবেশনে যোগদান করিয়া আন্দোলন সম্পর্কে আলোচনা করিবেন; কারণ, লক্ষ্মী-অধিবেশনের সভাপতি পণ্ডিত জওহরলাল নেহেরু তাঁহাকে জানাইয়াছিলেন যে তিনি এই অধিবেশনে যোগদান করেন, ইহাই দেশবাসীর আকাঙ্ক্ষা।

কিন্তু দেশবাসীর আকাঙ্ক্ষা হইলে কি হইবে, ভারত-গভর্নমেন্ট তাহাতে সন্মত হইলেন না; স্বদেশে ফিরিলেই তাঁহাকে গ্রেপ্তার করা হইবে, ইহা তাঁহারা প্রকাশ করিলেন। ভিয়েনার ব্রিটিশ কন্সালের নিকট হইতেও তিনি অনুরূপ একখানি পত্র পাইলেন। এই পত্রে তাঁহাকে জানান হইল—তিনি মার্চ মাসেই ভারতে প্রত্যাগমন করিবেন, সংবাদ-পত্রে এইরূপ মন্তব্য পাঠ করিয়া ভারত-গভর্নমেন্ট তাঁহাকে সুস্পষ্টভাবে জানাইতেছেন যে, যদি তিনি ভারতে প্রত্যাবর্তন করেন, তবে হয়ত তিনি স্বাধীন ভাবে বিচরণ করিতে সমর্থ হইবেন না।

এই পত্র পাঠ করিয়াও সুভাষচন্দ্রের সঙ্কল্প অচল-অটল রহিল। তিনি বুঝিলেন, দেশবাসীর আস্থানে সাড়া দিতে গেলে গভর্নমেন্টের কোপদৃষ্টিতে পড়িয়া তাঁহাকে বন্দী জীবন যাপন করিতে হইবে।

এখন এরূপ অবস্থায় কি করা কর্তব্য?—কিন্তু কর্তব্য-নির্ধারণ করিতে তাঁহার বেশী দেরী হইল না। যত বিপদই

হট্টক, সুভাষচন্দ্র দেশবাসীর আস্থানে সাড়া দিতে সক্ষম করিলেন।

তাহা ছাড়া, সম্ভবতঃ আরও একটি কারণ ছিল। দেশকে যাহারা ভালবাসে, তাহারা দেশকে ছাড়িয়া দীর্ঘকাল বিদেশে নির্বাসিত জীবন যাপন করিতে পারে না। ফরাসী সম্রাট মহাবীর নেপোলিয়ন বোনাপার্ট প্রকৃতই ফ্রান্সকে ভালবাসিতেন; সেই জন্ত তিনিও এল্‌বা দ্বীপে নির্বাসিত জীবন দীর্ঘকাল যাপন করিতে পারেন নাই—গোপনে এল্‌বা ত্যাগ করিয়া ফ্রান্সে ফিরিয়া আসিয়াছিলেন।

সুভাষচন্দ্রও নেপোলিয়নের মত ইয়োরোপ ত্যাগ করিয়া ভারতের অভিমুখে যাত্রা করিলেন। গভর্নমেন্ট-বিজ্ঞাপিত বন্দী-জীবনের বিভীষিকাও তাঁহাকে সক্ষম হইতে চূত করিতে পারিল না, বিপদের ঝঞ্ঝাবৃষ্টি মাথায় করিয়া তিনি আবার সাগর-পাড়ি দিলেন। চিরদিন বিদেশে নির্বাসিত জীবন যাপন করা অপেক্ষা স্বদেশে কারা-প্রাচীরের অন্তরালে অবস্থিতিও তিনি শ্রেয়ঃ মনে করিলেন।

১৯৩৬ খৃষ্টাব্দের ৮ই এপ্রিল তিনি বোম্বাই বন্দরে অবতরণ করেন। সঙ্গে-সঙ্গে তাঁহাকে ১৯১৮ সালের ৩নং রেগুলেশন অনুসারে গ্রেপ্তার করিয়া পুণা যারবেদা-জেলে রাখা হয়। বিভিন্ন জেলে অবস্থিতির পর তাঁহাকে তাঁহার দাদা শরৎচন্দ্র বসুর কার্ণিয়াংস্থিত বাড়ীতে অন্তরীণ করা হয়।

সুভাষচন্দ্রের গ্রেপ্তারে সমস্ত দেশে একটা আন্দোলনের সৃষ্টি হয়। ১০ই মে দেশের সর্বত্র “নিখিল-ভারত সুভাষ-দিবস”

নির্ধারিত হইল এবং ঐ দিন ভারতের সর্বত্র তাঁহার  
শ্রেণ্যারের প্রতিবাদে সভা-সমিতি ও বক্তৃতা অনুষ্ঠিত  
হইয়াছিল।

দীর্ঘকাল বন্দীজীবন যাপন করায় সুভাষচন্দ্রের স্বাস্থ্য  
ভাঙ্গিয়া পড়িল। অবশেষে ১৯৩৭ খৃষ্টাব্দের ১৭ই মার্চ  
তারিখে গভর্নমেন্ট তাঁহাকে বিনা সর্তে মুক্তিদান করিলেন :  
তাঁহার মুক্তিতে দেশে আবার আনন্দের বন্যা প্রবাহিত হইতে  
থাকে। ১৯৩৭ খৃষ্টাব্দের ৬ই এপ্রিল তারিখে শ্রদ্ধানন্দ-পার্কে  
এক জন-সভায় দেশবাসী তাঁহাকে তাহাদের সাদর অভিনন্দন  
জ্ঞাপন করে।

মুক্তিলাভের পর তিনি পাঞ্জাবের ডালহৌসী সহরে  
হিমালয়-শিখরে স্বাস্থ্য-লাভার্থ গমন করেন। ১৯৩৭ খৃষ্টাব্দের  
অক্টোবর মাসে তিনি কলিকাতায় ফিরিয়া আসেন। ২৮শে  
নভেম্বর তারিখে তিনি পুনরায় চিকিৎসার্থ আকাশ-পথে  
ইয়োরোপ যাত্রা করেন। তিনি ইয়োরোপে অষ্ট্রিয়ার বাদগাস-  
ফটাইন নামক স্থানে অবস্থিতি করিয়া চিকিৎসিত হইতে  
থাকেন।

১৯৩৮ খৃষ্টাব্দের জানুয়ারী মাসে তিনি ইংলণ্ডে গমন  
করেন।



## ভারতীয় জাতীয় মহা-সমিতির সভাপতি

‘হরিপুরা’-কংগ্রেস ১৯৩৮—‘ত্রিপুরী’-কংগ্রেস ১৯৩৯—প্রতি-  
যোগিতা—জয়লাভ—মহাত্মার ক্ষোভ—হলওয়েল মনুমেণ্ট অপ-  
সারণ—সুদীর্ঘ হাজত-বাস—মুক্তি—নিকরদেশ ।

ইংলণ্ডে অবস্থিতি-কালে সুভাষচন্দ্র ভারতীয় জাতীয় মহা-  
সমিতির এক-পঞ্চাশত্তম ‘হরিপুরা’-অধিবেশনের সভাপতি  
নির্বাচিত হইলেন ।

ভারতীয় জাতীয় মহা-সমিতির সভাপতিরূপে তিনি যে  
অভিভাষণ প্রদান করেন, তাহাতে তাঁহার দূরদৃষ্টি, সূক্ষ্ম  
বিশ্লেষণ-শক্তি ও পাণ্ডিত্য পূর্ণমাত্রায় প্রকটিত । এই অভিভাষণে  
তিনি প্রথমেই সাম্রাজ্যের উত্থান-পতন লইয়া আলোচনা  
করিয়াছেন । তিনি বলিতেছেন—

“মানবের ইতিহাসের প্রতি প্রাথমিক দৃষ্টিপাতেই সাম্রাজ্যের উত্থান-  
পতন আমাদের আকর্ষণ করে । কি প্রাচ্যে, কি পাশ্চাত্যে, সর্বত্রই  
সাম্রাজ্য প্রথমে বৃদ্ধি প্রাপ্ত হইতে থাকে ; পরে উন্নতির সর্বোচ্চ শিখর  
অধিগত করিয়া ধীরে ধীরে হীনাবস্থায় নিপতিত হয় এবং কখনো  
কখনো মৃত্যুর আলিঙ্গনে লুপ্ত হইয়া যায় । পাশ্চাত্যে প্রাচীন রোম-  
সাম্রাজ্য এবং বর্তমান কালের তুর্কী-সাম্রাজ্য ও অষ্ট্রো-হাঙ্গেরীয় সাম্রাজ্য  
এই নিয়মের জলন্ত দৃষ্টান্ত ; ভারতবর্ষেও মৌর্য্য, গুপ্ত এবং মোগল-  
সাম্রাজ্য ইহার ব্যতিক্রম নহে । ইতিহাসের এই সমস্ত বাস্তব ঘটনার  
প্রতি লক্ষ্য করিয়া কেহ কি সাহসের সহিত বলিতে পারেন যে, ব্রিটিশ  
সাম্রাজ্যের ভাগ্যে অন্তরূপ বিধান রহিয়াছে ? \*

\* “In the face of these objective facts of history, can any  
one be so bold as to maintain that there is in store a differ-  
ent fate for the British Empire ?”

—The Calcutta Municipal Gazette, Vol. XLII, No. 16, P. ১৫৯

\* \* \* \* \*

একথা সত্য যে প্রত্যেক সাম্রাজ্যই ভেদনীতির আশ্রয় গ্রহণ করিয়া শাসন-কার্য চালাইয়া থাকে ; কিন্তু পৃথিবীর মধ্যে গ্রেট ব্রিটেনের মত এই নীতি এমন কৌশলপূর্ণ, ধারাবাহিক এবং নিষ্ঠুরভাবে অন্য কোন সাম্রাজ্য অনুসরণ করিয়াছে কি না সন্দেহ । \*

\* \* \* \* \*

বর্তমানে ব্রিটিশ সাম্রাজ্য কয়েকটি বিষয়ে বিশেষ বিব্রত হইয়া পড়িয়াছে । ব্রিটিশ সাম্রাজ্যের মধ্যে পশ্চিমে আয়ারল্যান্ড এবং পূর্বে ভারতবর্ষ রহিয়াছে ; মধ্যভাগে প্যালােটাইন, মিসর ও ইরাক-সহ বিরাজমান ; দূর প্রাচ্যে জাপান ও ভূমধ্যসাগরে ইতালী চাপ দিতেছে ; পটভূমিকায় সোভিয়েট রুশিয়া প্রত্যেক সাম্রাজ্যবাদী জাতির হৃদয়ে ভীতির উদ্রেক করিতেছে । এই সমস্ত বিষয়ের চাপ ও কঠোর শ্রম-স্বীকারের সম্মিলিত ফল ব্রিটিশ সাম্রাজ্য কতদিন সহ করিতে সমর্থ হইবে ? \* \* \* পরিশেষে বলা চলে যে, আকাশ-সৈন্য আধুনিক যুদ্ধে যুগান্তর সংসাধিত করিয়াছে ; ইহাতে শক্তি-সাম্য পৃথিবীর রাষ্ট্রনীতি হইতে তিরোহিত হইয়াছে, এবং বিশাল সাম্রাজ্যের মৃত্তিকা-নির্মিত চরণ যুগল বর্তমানে বেকরূপ উন্মুক্ত হইয়া পড়িয়াছে, পূর্বে কখনও সেরূপ হয় নাই । †

কিন্তু এই বিশ্বশক্তির মধ্য হইতে ভারতবর্ষ পূর্বোপেক্ষা অধিকতর শক্তিশালী হইয়া উঠিবে । আমাদের এই বিশাল দেশে ৩৫ কোটি লোকের বাস ; এক সময়ে এই দেশের বিশালতা এবং জনশক্তির বিপুলতা আমাদের দুর্বলতাই প্রকাশ করিত ; কিন্তু বর্তমানে উহা শক্তির

\* "But I doubt if any Empire in the world has practised this policy so skilfully, systematically and ruthlessly as Great Britain."  
—*Ibid.* P. 445

† "The clay feet of a gigantic empire now stands exposed as never been before".—*Ibid.*, P. 446.

আধার—বদি আমরা সম্মিলিত হইয়া আমাদের শাসনকর্তার সম্মুখে সাহসের সহিত দাঁড়াইতে পারি।

১৯৩৯ খৃষ্টাব্দে সুভাষচন্দ্র পুনরায় নিখিল-ভারতীয় জাতীয় মহাসমিতির ত্রিপুরী-অধিবেশনের সভাপতি নির্বাচিত হন ; কিন্তু নির্বাচিত হইলেও, নির্বাচন-প্রতিদ্বন্দ্বিতায় তাঁহার বিজয়-গৌরব-লাভ জাতীয় ইতিহাসের এক ব্যথা-বিমণ্ডিত মসীলিপ্ত ইতিহাস।

এবার নির্বাচন-প্রার্থী ছিলেন তিনজন—মৌলানা আবুল কালাম আজাদ, ডাঃ পটুভি সীতারামিয়া ও সুভাষচন্দ্র। মৌলানা আবুল কালাম আজাদ তাঁহার ভগ্নস্বাস্থ্যের জ্ঞে ডাঃ সীতারামিয়ার অনুকূলে প্রতিদ্বন্দ্বিতা হইতে সরিয়া আসিলেন ; সুতরাং শেষ পর্যন্ত প্রতিদ্বন্দ্বী রহিলেন দুইজন— ডাঃ সীতারামিয়া ও সুভাষচন্দ্র।

মহাত্মা গান্ধী ও তাঁহার অনুবর্তীগণ ডাঃ সীতারামিয়ার অনুকূলে ছিলেন, তাঁহারা সুভাষচন্দ্রের সম্পর্কে বিরুদ্ধ মত পোষণ করিতেন। ইহার কারণ,—ব্রিটিশ গভর্নমেন্টের ইচ্ছা ছিল, তাঁহারা দেশীয় রাজ্য ও ব্রিটিশ-শাসিত অংশ লইয়া এক যুক্তরাষ্ট্র গড়িয়া তোলেন। মহাত্মা-প্রমুখ নরমপন্থী রাজনীতিক-গণ ব্রিটিশ গভর্নমেন্টের এই আকাঙ্ক্ষার স্বপক্ষে ছিলেন ; কিন্তু সুভাষচন্দ্র ও তাঁহার অনুবর্তীগণ মহাত্মার দলীয় এই দুর্বলতাকে আপোষ-মীমাংসার প্রচেষ্টা বলিয়া মনে করিতেন। তাঁহাদের অভিমত ছিল, আপোষ-মনোবৃত্তিতে কোনদিনই স্বাধীনতা আসিবে না। স্বাধীনতা অর্জন করিতে হইলে

আপোষ-বিরোধী মনোভাব লইয়া, তাহা জোর করিয়া আদায় করিতে হইবে।

দৃষ্টিপথের এই পার্থক্য-হেতু মহাত্মা গান্ধী ইত্যাদি ব্যক্তিগণ সুভাষচন্দ্রের নির্বাচন পছন্দ করিলেন না, তাঁহারা নানাভাবে সুভাষচন্দ্রের বিরুদ্ধাচরণে কুণ্ঠিত হন নাই। কিন্তু তাঁহাদের বিরুদ্ধাচরণ সত্ত্বেও গণভোটে সুভাষচন্দ্রই নির্বাচিত হইলেন। তাঁহার এই নির্বাচনে ইহাই প্রতীয়মান হইল যে, তিনি মহাত্মা গান্ধী অপেক্ষাও ব্যাপকভাবে দেশবাসীর হৃদয়-জয়ে সমর্থ হইয়াছিলেন।

নির্বাচন এত তীব্র হইয়াছিল যে, সুভাষচন্দ্র জয়লাভ করিলে মহাত্মা গান্ধী বলিয়াছিলেন, “ডাঃ পটুভির পরাজয়ে আমার পরাজয় হইয়াছে!”

কেবল তাহাই নহে, তিনি এমন ইঙ্গিতও করিলেন যে, যাহাতে মনে হয়, ওয়ার্কিং কমিটির সদস্যদিগের এখন পদত্যাগ করা সঙ্গত। ইহার ফলে ত্রিপুরীতে কংগ্রেস-অধিবেশনের পূর্বেই প্রাক্তন ওয়ার্কিং কমিটির সভ্যগণ সুভাষচন্দ্রের নিকট পদত্যাগ-পত্র দাখিল করিয়া পরিপূর্ণ অসহযোগিতা প্রদর্শন করিলেন!

কংগ্রেসের এই জঘন্য ষড়যন্ত্র সম্পর্কে ও মহাত্মা গান্ধী-সম্পর্কে—শ্রদ্ধাভাজন সাহিত্যিক শ্রীযুক্ত বিজয়রত্ন মজুমদার মহাশয় যাহা লিখিয়াছেন, তাহার কিছু-কিছু নিম্নে উদ্ধৃত হইল।—

“১৯১৯ এবং তৎপরবর্তী, কালে—আজ পর্য্যন্ত, কংগ্রেস বলিতে গান্ধীজী এবং গান্ধীজী বলিতে কংগ্রেসকেই বুঝাইত

এবং বুঝায় ; সুতরাং এই পরাজয়ে উভয়েরই পরাজয় ইহা বুদ্ধিতে বিলম্ব হয় না। তথাপি গান্ধীজী কেন যে 'ব্যক্তিগত পরাভব' শব্দ-সমষ্টির উপর জোর দিয়াছিলেন, তাহাও সহজেই অনুধাবন করিতে পারা যায়।

গান্ধীজীর অভভেদী প্রভাব যে ধৰ্ব্ব হইতে চলিয়াছে, এই সত্য সুস্পষ্টরূপেই অনুভূত হইয়াছিল।...একমাত্র সর্বশক্তিমান্ ব্রিটিশ গভর্নমেন্ট ব্যতিরেকে এই ভারতবর্ষে গান্ধীজীর ব্যক্তিত্ব ও প্রভাবকে, কোনও দিন কোনও লোকই দ্বন্দ্ব আহৃত করিতে সাহস পায় নাই।...সুদীর্ঘকাল পরে একজন শক্তিমান্ ভারতীয় সেই গান্ধীকেই চ্যালেঞ্জ করিয়া বসিল।

চ্যালেঞ্জ করাই ত অপরাধ—যুদ্ধে জয়লাভ করা মহা অপরাধ—অমার্জনীয় অপরাধ! গান্ধী-ভারতবর্ষ যেন বিহারের ভূমিকম্পে আলোড়িত হইয়া উঠিল!...ইদানীং কালের কংগ্রেসে এমন কাদা ছোঁড়া-ছুঁড়ির দৃষ্টান্ত আদৌ বিরল, একথা আমি অসঙ্কোচে লিখিয়া রাখিতে পারি।”

বিজয়বাবুর এই মন্তব্যের পর আমাদের আর কোন মন্তব্য নিষ্প্রয়োজন। যা হোক, কংগ্রেসের ওয়ার্কিং কমিটির সভ্যগণ যখন পদত্যাগ করিয়া সুভাষচন্দ্রকে একেবারে অসহায় করিয়া তুলিতেছিলেন, সুভাষচন্দ্র তখন কঠিন রোগে শয্যাশায়ী—তাঁহার ব্রকো-নিমোনিয়া। কিন্তু এই অবস্থায়ই তিনি ৬ই মার্চ তারিখে 'এম্বুলেন্স' গাড়ী করিয়া ত্রিপুরীতে প্রবেশ করিলেন।

অধিবেশনের সময় তাঁহার দেহের উত্তাপ এত বেশী হইল যে, ডাঃ হেনেসী তাঁহাকে পরীক্ষা করিয়া জব্বলপুর হাসপাতালে যাইবার পরামর্শ দিলেন। পণ্ডিত জওহরলালও সুভাষচন্দ্রকে সেই অনুরোধই করিলেন; কিন্তু সুভাষচন্দ্র তখন জাতীয় চিন্তায় উন্মাদ! ব্যক্তিগত চিন্তা-ভাবনা তাঁহার কাছে তখন তুচ্ছ। দৃপ্ত সিংহের ন্যায় তিনি গর্জন করিয়া উঠিলেন, “আমি জব্বলপুর হাসপাতালে যাইবার জন্ম এখানে আমি নাই। অধিবেশন শেষ হইবার পূর্বে অত্র স্থানান্তরিত হওয়ার অপেক্ষা আমি মৃত্যু বরণ করিতে চাই।”

কিন্তু আশ্চর্যের বিষয়, সুভাষচন্দ্রের শারীরিক অবস্থা যখন এইরূপ এবং যে অবস্থার সাক্ষীদের মধ্যে ডাঃ হেনেসি এবং পণ্ডিত জওহরলালের নামোল্লেখ করা যাইতে পারে, সেই অবস্থাও গান্ধীজীর অনুবর্তিগণ বিশ্বাস করিতে পারেন নাই—তাঁহারা ইহাকে পীড়ার ভান মনে করিয়াছিলেন! এ বিষয়ে বিজয়বাবু বলিয়াছেন :—

“ইহাকে রাজনৈতিক অসুস্থতা বোধে হাসি-ঠাট্টার বিষয়ীভূত করা হইয়াছিল।”

ত্রিপুরী-কংগ্রেসের অধিবেশন শেষ হইয়া গেল। সুভাষচন্দ্র মহাত্মাজীর আশীর্ব্বাদ ভিক্ষা করিলেন, তাঁহার সহযোগিতা প্রার্থনা করিলেন, তাঁহাকে কলিকাতায় আসিয়া ওয়ার্কিং কমিটির সদস্য নিযুক্ত করিতে অনুরোধ করিলেন; মোট কথা, তিনি কংগ্রেসের ঐক্য রক্ষার নিমিত্ত যথাসাধ্য চেষ্টা করিলেন; কিন্তু যখন কিছুতেই কিছু হইল না, ব্যক্তিগত

মান-অভিমান ও ঈর্ষ্যা-বিদ্বেষই যখন জাতীয় ঐক্যবোধকে অভিভূত করিয়া রাখিল, সুভাষচন্দ্র তখন পদত্যাগ করাই সমীচীন মনে করিয়া পদত্যাগ-পত্র দাখিল করিলেন। সঙ্গে-সঙ্গে তাঁহার স্থলে সভাপতি নির্বাচিত হইলেন ডাঃ রাজেন্দ্রপ্রসাদ।

সুভাষচন্দ্র বুঝিলেন, জাতীয় জীবনের মূর্ত্ত বিকাশ কংগ্রেসকে বিপ্লবী প্রতিষ্ঠানরূপে গড়িয়া তুলিবার যে কল্পনা এতদিন তিনি করিয়া আসিতেছিলেন, তাহা চূর্ণ হইয়া গিয়াছে! মহাত্মাজী যতদিন অসহযোগ-আন্দোলনের পক্ষপাতী ছিলেন, সুভাষচন্দ্র কেবল ততদিনই তাঁহার সহিত মিশিয়া চলিতে পারিতেছিলেন! কিন্তু মহাত্মাজী ও তাঁহার অনুবর্ত্তী কংগ্রেস এখন আর কোন সংগ্রামের পক্ষপাতী নহেন; অথচ তিনি নিজে বিশ্বাস করেন, আপোষ-বিহীন সংগ্রাম ব্যতীত কখনও স্বাধীনতা লাভ হইবে না। সুতরাং তিনি নিজ্জীব ও নিষ্কর্ম্মার গায় বসিয়া না থাকিয়া 'ফরওয়ার্ড ব্লক' (Forward Block) নামে এক সংগ্রাম-পন্থী কমিউনিটি গঠন করিলেন।

আজ মনে হয়, ত্রিপুরী-অধিবেশন উপলক্ষে কংগ্রেসের উদ্ধতন কর্তৃপক্ষ সুভাষচন্দ্রকে ভুলুগিত করিবার জন্য যে সঙ্ঘবদ্ধ জঘন্য আয়োজন করিয়াছিলেন, যাহার ফলে সুভাষচন্দ্রের 'ফরওয়ার্ড ব্লক' সৃষ্টি এবং অব্যবহিত পরেই কংগ্রেস-কর্তৃপক্ষ-কর্তৃক কংগ্রেস হইতে তিন বৎসরের জন্য তাঁহাকে বহিষ্কারের ব্যবস্থা,—এ সমস্তই বুঝি দেশের মঙ্গলের জন্যই হইয়াছিল!

কংগ্রেসে সুভাষচন্দ্রের স্থান হইল না—সহানুভূতি দূরে থাক্, অপমান ও লাঞ্ছনা তাঁহার মস্তকে আবণের ধারার ন্যায় বর্ষিত হইল,—তাই না সুভাষচন্দ্রের বিদ্রোহী-হৃদয় তাঁহার চিরদিনের স্বপ্ন সার্থক করিবার জন্ত দূর-দূরান্তে ছুটিয়া গিয়াছিল !

যা হোক, বিদ্রোহী সুভাষচন্দ্র অনন্তর ১৯৪০ সালের ২৪শে মার্চ তারিখে রামগড়ে আপোষ-বিরোধী সম্মেলনে সভাপতির পদ গ্রহণ করেন।

জুন মাসে সুভাষচন্দ্র ডালহৌসী স্কোয়ারের উত্তর-পশ্চিম কোণে অবস্থিত হলওয়েল মনুমেন্টে অপসারণের জন্ত আন্দোলন আরম্ভ করিলেন। কারণ, হলওয়েল মনুমেন্টে বাংলার শেষ স্বাধীন রাজা—নবাব সিরাজউদ্দৌলাকে দুর্গপণেয় কলঙ্ক-কালিমায় মণ্ডিত করিয়াছে; সুতরাং এই ঐতিহাসিক অসত্যের অপপ্রচারকে—একটা জাতীয় কলঙ্কে—ধ্বংস করিবার নিমিত্ত তিনি হলওয়েল মনুমেন্টে অপসারণের দাবী করেন, এবং তাহাই ক্রমে এক সজ্জবন্ধ ব্যাপক আন্দোলনে পরিণত হয়। সুভাষচন্দ্রের পরম কৃতিত্ব যে, সরকারকে অবশেষে সেই প্রস্তরীভূত জমাট মিথ্যার স্তম্ভকে অপসারিত করিতে হইয়াছে।

এই আন্দোলন সম্পর্কে ২রা জুলাই তাঁহাকে গ্রেপ্তার করা হয় এবং মহম্মদ আলী পার্কে বক্তৃতা প্রদান ও ফরওয়ার্ড-ব্লক পত্রিকায় 'হিসাব-নিকাশের দিন' শীর্ষক প্রবন্ধ প্রকাশের জন্ত ২৮শে আগষ্ট তারিখে কারা-প্রাচীরের অন্তরালে—হাজতে



অবস্থিতি-কালে, তিনি অভিযুক্ত হন ; কিন্তু জেলে তিনি অনশন-ব্রত আরম্ভ করায় ৫ই ডিসেম্বর তারিখে তাঁহাকে মুক্তি দেওয়া হয় ।

কারাগারে অবস্থিতিকালে ১৯৪০ খৃষ্টাব্দের ২৮শে অক্টোবর তারিখে, তিনি কেন্দ্রীয় পরিষদের সদস্য নির্বাচিত হন, এবং তিনি পুনরায় সগৌরবে কলিকাতা-কর্পোরেশনের অল্ডারম্যানও নির্বাচিত হইয়াছিলেন ।

তৎপর তাঁহার মুক্তি উপলক্ষে তাঁহাকে অভিনন্দন জানাইয়া ‘কলিকাতা মিউনিসিপ্যাল গেজেট’ লিখিয়াছিলেন, “আমরা জানি না কতদিন তিনি কারা-প্রাচীরের বাহিরে অবস্থান করিতে সমর্থ হইবেন । বর্তমান বর্ষের বিভিন্ন সময়ে ও বিভিন্ন স্থানে বক্তৃতা প্রদান করায়, ভারতরক্ষা-আইনের দুইটি অভিযোগে তিনি অভিযুক্ত ; এতদ্বিধা তাঁহার ইংরেজী দৈনিক ‘ফরওয়ার্ড রক’ পত্রিকায় ‘হিসাব-নিকাশের দিন’ (The Day of Reckoning) শীর্ষক প্রবন্ধের জন্মও তাঁহাকে অভিযুক্ত করা হইয়াছে ।”

৫ই ডিসেম্বর তারিখে মুক্তিলাভ করিয়া সুভাষচন্দ্র কলিকাতা এল্‌গিন্ রোড নিজের গৃহে ফিরিয়া আসিলেন ; কিন্তু গভর্নমেন্টের সদা-সতর্ক প্রহরীর দল দিন-রাত তাঁহার বাটীর সম্মুখে ও চতুর্দিকে তাঁহাকে ঘিরিয়া রহিল ! তথাপি ১৯৪১ খৃষ্টাব্দের ২৬শে জানুয়ারী তারিখে সহসা সংবাদ রটিল, তিনি স্বীয় গৃহ হইতে অতি রহস্যজনক ভাবে নিরুদ্দেশ হইয়াছেন ! কলিকাতা পুলিশ-কোর্টে তাঁহার বিরুদ্ধে যে

মোকদ্দমা চলিতেছিল, দিনের পর দিন আজও তাহা কেবলই মূলতুবী রাখা হইতেছে; কারণ, তাঁহাকে আদালতে হাজির করানো সম্ভব হয় নাই।

তিনি মিরুদ্দিষ্ট হওয়ায়, গভর্নমেন্ট তাঁহার এল্‌গিন্‌ রোডের বাড়ীর অংশ ক্রোক করেন; এবং ক্রোকের ছয় মাসের মধ্যে তিনি উপস্থিত না হওয়ায় ১৯৪৫ খৃষ্টাব্দের ১৬ই আগস্ট তাহা নিলামে বিক্রয় হইবে বলিয়া ঘোষণা করা হয়; কিন্তু নির্দ্ধারিত দিবসে কোন খরিদার উপস্থিত না হওয়ায়, পুনরায় নিলামের দিন ধার্য করা হয়। সেদিনও কোন ক্রেতা উপস্থিত হইল না; তখন চব্বিশ-পরগণার কালেক্টর বাহাদুর, কর্তব্য-নির্দ্ধারণের জন্ত কমিশনার বাহাদুরের নিকট সমস্ত কাগজপত্র পাঠাইয়া দিয়াছেন।



## চাঞ্চি অন্তর্দান

অন্তর্দান—নানা জনরব—সুভাষচন্দ্রের রেডিও-বার্তা—  
অন্তর্দানের কারণ—সুভাষচন্দ্রের স্বপ্ন—মহাজাতি-সদনের  
ইতিহাস—সাময়িক আকর্ষণ—অন্তর্দানের সর্বপ্রথম বিশ্বাস-  
যোগ্য বিবরণ।

১৯৪১ সালের ২৬শে জানুয়ারী।—

২৬শে জানুয়ারী প্রতি বৎসরই ‘স্বাধীনতা-দিবস’ নামে  
কীর্তিত হইয়া আসিতেছে; সুতরাং সেদিনও ছিল জাতীয়  
আন্দোলনের ইতিহাসে এক বিশিষ্ট স্মরণীয় দিন; কিন্তু  
সেই স্মরণীয় দিনে সহসা এক বিস্ময়কর সংবাদে সকলেই  
চমকিত হইয়া উঠিল—সকলেই শুনিল, সুভাষচন্দ্র তাঁহার  
গৃহে নাই!

কোথায় সুভাষচন্দ্র? এলগিন্ রোডের সমস্ত প্রবেশ-পথ,  
আশে-পাশে চতুর্দিক, সবই যে গোয়েন্দা-বিভাগের নথ-দর্পণে!  
সুভাষচন্দ্র জেলখানা হইতে মুক্তিলাভ করিয়া গৃহেই  
আসিয়াছিলেন বটে, কিন্তু সে তো সম্পূর্ণভাবে মুক্তি নহে!  
সরকারী অনুগ্রহে তিনি জেলখানায় আবদ্ধ না থাকিয়া, তখন  
কার্যতঃ গৃহে আবদ্ধ ছিলেন মাত্র! সুতরাং মি. আই. ডি.  
বিভাগের গোয়েন্দাগণ তখনও তাঁহাকে সুতীক্ষ্ণ দৃষ্টিতে চোখে-  
চোখে রাখিয়াছিল। হিংস্র শিকারী কুকুরের ন্যায় তীক্ষ্ণদৃষ্টি  
গোয়েন্দাদের সদা-সতর্ক চক্ষুকে ফাঁকি দিয়া, অসুস্থ সুভাষচন্দ্র

কোথায় যাইতে পারেন? না, তাহা কখনও সম্ভব?—  
কাজেই সম্ভব-অসম্ভব কত স্থানেই সুভাষচন্দ্রের অন্বেষণ আরম্ভ  
হইল।

চতুর্দিকে কড়া পাহারা—তাহার মধ্য হইতে একটা লোক  
বেমানুষ অদৃশ্য হইয়া গেল! এলগিন্ রোডের বাড়ীর ভিতর,  
বাড়ীর বাহিরে, সমগ্র পাড়ায় এবং অবশেষে সারা কলিকাতায়  
ও ভারতের সর্বত্র—সুভাষচন্দ্রের অন্বেষণ আরম্ভ হইল;  
গোয়েন্দা-বিভাগ ও বিশাল পুলিশ-বিভাগ, সকলেই কন্ম-তৎপর  
হইয়া উঠিল।

পুলিশের পক্ষে, তথা সারা শাসন-যন্ত্রের পক্ষে—ইহা যে  
কত বড় লজ্জা ও পরাজয়, সকলেই তাহা মর্মে-মর্মে বুঝিতে  
পারিল। কিন্তু মর্মে-মর্মে অনুভব করিলেও তখন আর  
উপায় কি ছিল? সুভাষচন্দ্রের আত্মীয়-স্বজন ও অন্যান্য  
যাঁহারা সেই এলগিন্ রোডের বাড়ীতেই অবস্থান করিতে-  
ছিলেন, তাঁহারা সরকারী পুলিশী লাঞ্চার শত আশঙ্কায়ও  
বিশেষ কোন খবরই দিতে পারিলেন না।

কেবল এইটুকু জানা গেল যে, ঘটনার কিছুকাল পূর্ব  
হইতেই সুভাষচন্দ্র নিঃসঙ্গ জীবন অতিবাহিত  
করিতেছিলেন। সুভাষচন্দ্র বিশেষ ভাবে সকলকেই তখন  
জানাইয়া দিয়াছিলেন, কেহই যেন তাঁহার কক্ষে প্রবেশ না  
করে; কাহারও নিতান্ত প্রয়োজন হইলে, তিনি সুভাষচন্দ্রের  
সঙ্গে টেলিকোনে আলাপ করিতে পারেন; কিন্তু কখনও  
কোন কারণেই তাঁহার সঙ্গে কাহারও সাক্ষাৎ হইবে না।



উপরে : স্ত্রীভাষচন্দ্র । কংগ্রেস প্রেসিডেন্টের স্বেচ্ছাসেবক-বাহিনীর জি. ও. সি.র  
বেশে । মাঝখানে ( বায়ে ) : ক্যাপ্টেন বুরহান উদ্দিন । ( ডাইনে ) কর্ণেল  
ভৌসলে । নীচে : জেনারেল মোহন সিং ।



আহার্য পরিবেষণ সম্পর্কেও কয়েক দিন পূর্বে তিনি নির্দেশ দিয়াছিলেন যে, তাঁহার আহার্য লইয়া কেহ ভিতরে আসিবে না,—কক্ষের বাহিরে একটি টেবিলের উপর আহার্য রাখিয়া চলিয়া যাইবে, তিনি প্রয়োজন মত নিজেই তাহা আনিয়া লইবেন।

যেটি কথা, সুভাষচন্দ্র তাঁহার গৃহমধ্যেই নির্জনে আধ্যাত্মিক জীবন অতিবাহিত করিতেছিলেন, কেবল এইটুকু সংবাদই সংগৃহীত হইল, তাঁহার পলায়নের পন্থা-সম্পর্কে কোন সংবাদই পাওয়া গেল না।

সুভাষচন্দ্রের এই রহস্যজনক নিরুদ্দেশের পর কিছুকাল তাঁহার কার্যাবলী সম্বন্ধে কোনরূপ জ্ঞান আহরণ করা একে-বারেই সম্ভব হয় নাই। তবে জনশ্রুতি, বৈদেশিক রেডিও এবং সাংবাদিকগণের নিকট হইতে তাঁহার জীবন ও কার্যাবলী সম্বন্ধে যাহা জানা গিয়াছিল, আজ সেগুলি উন্মাদ জনরব বলিয়া প্রমাণিত হইলেও, কিছু-কিছু এখানে লিপিবদ্ধ হইল।—

অ্যাসোসিয়েটেড প্রেসের বোম্বাইয়ের সংবাদাতা তৎকালে লিখিয়াছিলেন,—

“তিনি ১৯৪১ খৃষ্টাব্দে কলিকাতায় তাঁহার নিজ গৃহে অন্তরীণাবস্থায় ছিলেন। তথা হইতে সহসা একদিন তিনি অন্তহিত হন। তিনি ভারতবর্ষ ত্যাগ করিয়া, গরুর গাড়ীতে লুকাইয়া আফগানিস্থানে যান।

১৯৪২ খৃষ্টাব্দে তিনি বালিগ হইতে বেতার-বক্তৃতা করেন বলিয়া শোনা যায়। উক্ত বৎসরেই তিনি জাপানের টোকিও সহরে উপনীত হন। এই স্থানে জাপানীরা একদল ভারতীয় সৈন্তের সেনাপতি-পদে

তাঁহাকে বরণ করিতে প্রতিশ্রুত হয়। এই সৈন্যদল ভারতবর্ষ হইতে ইংরাজদিগকে তাড়াইয়া দিবার অগ্র প্রস্তুত হইয়াছিল।” \*

বোম্বাইয়ের ভূতপূর্ব মেয়র মিঃ ইউসুফ মেহেরালি বলিয়াছিলেন,—

“যখন দেশে ব্যক্তিগত আইন-অমান্য-আন্দোলন চলিতেছিল, তখন সমগ্র দেশ হঠাৎ এই সংবাদে চমকিত হইয়া উঠিল যে, সুভাষ অন্তহিত হইয়াছেন। কেহই জানে না যে তিনি কোথায় আছেন! কেহ কেহ বলেন যে, তিনি সংসারাত্মক পরিত্যাগ করিয়া হিমালয়ে সন্ন্যাসাত্মক আছেন—যৌবনের প্রারম্ভেও তিনি একবার অনুরূপ কার্য্য করিয়াছিলেন। কেহ কেহ বলেন যে, তিনি পাতালে গমন করিয়াছেন! আবার কাহারও মত,—তিনি কোন বৈদেশিক রাজ্যে পলায়ন করিয়াছেন! সুভাষ কোথায়? অনরথ তাঁহাকে একই সময়ে কলিকাতা, বেঙ্গল, উত্তর-পশ্চিম সীমান্ত-প্রদেশ, মস্কো, বার্লিন, রোম, টোকিও প্রভৃতি স্থানে অবস্থিতি করিতেছেন বলিয়া প্রকাশ করিল।”

রয়টার এইসঙ্গে কিছু যোগ করিয়া বলিয়াছিলেন যে, সুভাষচন্দ্র জার্মানিতে যাইয়া হিটলারের সঙ্গে সাক্ষাৎ করিয়াছেন। হিটলার তখন সুভাষকে ‘ফুরার অব্ ইণ্ডিয়া’ (‘Führer of India’) নামে সম্বোধন করিয়াছিলেন। পরে জানা গিয়াছে যে, সুভাষ ভারতীয় জাতীয় বাহিনী গঠন করিয়া তাহার সর্বনাধ্যক্ষ-রূপে স্বাধীন ভারতে প্রবেশ করিবেন।

\* “In 1942, he was reported broadcasting from Berlin and later in that year, he appeared in Tokyo, when the Japanese promised to put him at the head of the Army of Indians ready to march back into India and drive the British out.”—*Ibid*, P. 442(g).



সুভাষচন্দ্র ভারতবর্ষ ছাড়িয়া বিদেশে চলিয়া গিয়াছেন, এই সংবাদ একদিন সত্য বলিয়া প্রমাণিত হইল সুভাষচন্দ্রের নিজের কথায়। তিনি একদিন রেডিও-বার্তায় ঘোষণা করিলেন,—

“বিগত ২০০ বৎসরের বৈদেশিক ইতিহাস আমি গভীর অভিনিবেশ-সহকারে পাঠ করিয়াছি—বিশেষতঃ স্বাধীনতা-সংগ্রামের ইতিহাস। কিন্তু কোথাও বৈদেশিক সাহায্য ব্যতিরেকে কোন দেশ স্বাধীনতা অর্জন করিয়াছে, এইরূপ একটি দৃষ্টান্তও পাই নাই; এবং ব্রিটেনও শুধু যে স্বাধীন জাতির সাহায্য গ্রহণ করিতেছে এমন নয়, পরন্তু ভারতের মত পরাধীন দেশের সাহায্যও গ্রহণ করিতেছে। যদি ব্রিটেনের সাহায্য ভিক্ষার কোন দোষ না থাকে, তবে সাহায্য গ্রহণে ভারতের পক্ষে তো কোন দোষই নাই; এবং আমরা ব্রিটিশ সাম্রাজ্যবাদের বিরুদ্ধে আমাদের যুদ্ধে সর্বপ্রকার সাহায্যই দাদরে বরণ করিব।”\*

সুভাষচন্দ্রের এই রেডিও-বার্তায় স্পষ্টই বুঝিতে পারা গিয়াছিল যে, স্বাধীনতার উদ্যোগ বেশায় উন্নাদের ঋণ আত্মহারা হইয়া, বিপদ-সঙ্কুল বিশ্বের পথে অতি রহস্যজনক ভাবে তিনি যে অন্তর্হিত হইয়াছিলেন, তাহার মূলে ছিল, বিদেশী শক্তির সাহায্যে ভারতবর্ষের স্বাধীনতা আনয়নের আকাঙ্ক্ষা; কিন্তু পরাধীন দেশের এক পলাতক বন্দীর পক্ষে এমন আকাঙ্ক্ষা—ইহা কি সঙ্গ নহে?

\* “If there is nothing wrong in Britain begging for help, there can be nothing wrong in India accepting an offer of assistance which she needs, and we shall welcome any help in India in our struggle against British Imperialism.”—*Ibid*, P. 442(r).

হয়তো স্বপ্ন—যথার্থই স্বপ্ন! কিন্তু সুভাষচন্দ্র তাঁহার সারাজীবনই যে এরূপ স্বপ্ন দেখিয়া কাটাইয়াছেন! তিনি নিজেই বলিয়াছেন:—

“ওরা বলে, আমি স্বপ্নচাৰী। আমি স্বীকার করছি, আমি স্বপ্নচাৰীই বটে। সারাজীবন আমি স্বপ্ন দেখেছি; শিশুকাল থেকেই এ আমার এক রোগ। কত স্বপ্নই না আমি দেখেছি! কিন্তু আমার স্বপ্নের সেরা স্বপ্ন—আমার জীবনের সব চাইতে প্রিয় স্বপ্ন—ভারতের স্বাধীনতার স্বপ্ন!”

১৯৩৭ সালে—সুভাষচন্দ্র যখন শাস্ত্রাভ্যাস ডালহৌসী পাহাড়ে অবস্থান করিতেছিলেন, আমরা জানি, তখনও তিনি একবার স্বপ্ন দেখিয়াছিলেন! সুভাষচন্দ্র ও তাঁহার বন্ধু শ্রদ্ধের সাহিত্যিক শ্রীযুক্ত বিজয়রত্ন মজুমদার মহাশয় তখন ডক্টর ধরমবীরের অতিথি।

সুভাষচন্দ্র সেই সময় একদিন বিজয়বাবুকে যাহা বলিয়াছিলেন, স্বপ্ন হইলেও, আমরা তাহা নিম্নে উদ্ধৃত করিলাম।

“কাউকে এখনও বলিনি, আজ আপনাকেই প্রথম বলছি, কলকাতার আমার একটা কংগ্রেস-ভবন গড়বার ইচ্ছা আছে। ‘কংগ্রেস হাউস’ নাম হলেও তাতে শুধু যে কংগ্রেসের কাজই হবে, তা নয়! আসলে হবে সেটা জাতীয় বাহিনীর প্রধান শিবির! তার সঙ্গে থাকবে লাইব্রেরী, ষ্টেজ, জিমনেসিয়াম; কংগ্রেস-অফিসও থাকবে বটে; কিন্তু প্রতিষ্ঠানটি মূলতঃ সৈনিক-কেন্দ্র হবে। অনেক দিন থেকেই প্ল্যানটা মাথার আছে, এইবার কলকাতায় গিয়ে কাজ আরম্ভ করবো।”\*

\* আজাদ-হিন্দের অকুর (শ্রীবিজয়রত্ন মজুমদার)

কাজ তিনি আরম্ভও করিয়াছিলেন—তাঁহার স্বপ্নকে বাস্তবে পরিণত করিতে তিনি উद्यোগীও হইয়াছিলেন। ১৯৩৮ সালে কলিকাতা কর্পোরেশনের সভায় সুভাষচন্দ্রের স্বপ্নে-দেখা এই রকম একটি জাতীয় ভবনের কথা আলোচিত হয়।

কলিকাতা কর্পোরেশন বার্ষিক একটাকা মাত্র খাজনায়, চিত্তরঞ্জন এভিনিউর উপর অবস্থিত বৃহৎ একখণ্ড ভূমি সুভাষচন্দ্রকে প্রদান করেন। কিন্তু জমি পাওয়া গেলেই তো প্রাসাদ নির্মাণ সম্ভব হয় না! সুতরাং সুভাষচন্দ্রের গুণমুগ্ধ ভক্তগণ—যাঁহারা কর্পোরেশনের অভ্যন্তরে ছিলেন—তাঁহারা নির্মাণ-কার্যের জন্য কর্পোরেশন হইতে একলক্ষ টাকা অর্থ-সাহায্যও মঞ্জুর করাইয়াছিলেন।

কিন্তু ব্যাপারটা সমাপ্ত হইল ঐখানেই! ১৯৩৯ সালের ত্রিপুরী কংগ্রেসের বাঁশী তখনও করুণ সুরে বাজিয়া যাইতেছিল! ডাঃ পটুভি সীতারামিয়ার পরাজয়ে মহাত্মা গান্ধী স্বয়ং পরাভব স্বীকার করিয়া এবং ওয়ার্কিং কমিটির সদস্যদিগকে একে-একে নিজের কোলে টানিয়া লইয়া নব-নির্ব্বাচিত রাষ্ট্রপতি সুভাষচন্দ্রকে হস্তপদ-বিহীন ‘স্ট্রটো জগন্নাথে’ পরিণত করিয়াছিলেন! আর রাষ্ট্রপতি সুভাষচন্দ্র তখন পুনঃ পুনঃ কংগ্রেসের ঐক্য-সাধনের চেষ্টা করিয়া, অবশেষে হতাশ হইয়া, পদত্যাগ করিয়া নিষ্কৃতি পাইয়াছিলেন।

দেশের আবহাওয়া তখন এইরূপ—বাংলা ও বিহারের দন্দ, প্রাচীন ও তরুণের দন্দ। কিন্তু প্রাচীন ও তরুণের এই দন্দে,

জগৎ সম্ভাবতঃই প্রাচীনের চরণে শ্রদ্ধানত হইয়া পড়ে।  
সুতরাং কর্পোরেশনেও অতি অল্প দিনের মধ্যে তাহাই  
আত্মপ্রকাশ করিল। শ্রীযুক্ত বিজয়বাবু লিখিয়াছেন :—

“কর্পোরেশনে একদল লোক ধূয়া ধরিয়া ফেলিল। বলিল, রাধাও  
নাচিবে না, তেলও পুড়িবে না, অর্থাৎ লক্ষ টাকায় জাতীয় ভবনও  
হইবে না, ভারতীয় জাতীয় বাহিনীও হইবে না,—টাকাগুলি গান্ধী-মার্ল  
যজ্ঞে ঘতাহতি দিতেই শেষ হইয়া যাইবে।”

সুতরাং তাহারা আইনের প্যাঁচে ফেলিয়া কর্পোরেশনের  
প্রধান কর্মকর্তাকে আটকাইয়া ফেলিলেন, আর শেষ মুহূর্তে  
আমিল হাইকোর্টের ইঞ্জাংশন্! কাজেই লক্ষ টাকার চেক আর  
কোনদিনই সুভাষচন্দ্রের হস্তগত হইল না—আর তাহার ফলে  
সেই কংগ্রেস-ভবন বা জাতীয় ভবন—শুরুদেবের প্রদত্ত নামে  
যাহা ‘মহাজাতি-সদন’ নামে পরিচিত হইয়াছিল,—আজও  
তাহা অসমাপ্ত ও অবজ্ঞাত অবস্থায় কলিকাতা মহানগরীর  
বুকে জাতীয় ‘ঈর্ষ্যা-বিদেষ ও ষড়যন্ত্রের মূর্ত্ত জাঙ্ক্যার ন্যায়  
দণ্ডায়মান!

বিগত যুগের ‘মহাজাতি-সদনের’ এই মর্মানভেদী করণ  
ইতিহাস এস্থলে অপ্রামাঙ্গিক হইলেও আমাদের বলিবার  
উদ্দেশ্য এই যে, সুভাষচন্দ্র চিরদিনই কত স্বপ্ন দেখিয়া  
আসিয়াছেন!

বাংলার বুকে একটা জাতীয় ভবন হইবে, জাতীয় বাহিনী  
গড়িয়া উঠিবে, সামরিক শিক্ষাকেন্দ্র হইবে, ইহাই না তাঁহার  
সেদিনের স্বপ্ন ছিল?

১৯২৮ সালেও বৃষ্টি সুভাষচন্দ্র এমনই এক স্বপ্ন দেখিয়া-  
ছিলেন! সেবার কলিকাতায়ই ছিল কংগ্রেসের অধিবেশন,  
আর সভাপতি নির্বাচিত হইয়াছিলেন পণ্ডিত মতিলাল  
নেহেরু।

জানি না, সুভাষচন্দ্র সেদিনও কোন সাময়িক চিত্র বা  
জাতীয় বাহিনীর স্বপ্ন দেখিয়াছিলেন কি না! সম্ভবতঃ সেরূপ  
কোন স্বপ্নে উদ্ভূত হইয়াই তিনি সেদিন কংগ্রেস-মণ্ডপে  
উপস্থিত ছিলেন স্বেচ্ছাসেবক-বাহিনীর অধিনায়ক-রূপে!  
তাঁহার সুদর্শন বনিষ্ঠ বপু সেদিন তরুণের অগ্রদূত-রূপে  
সকলের চক্ষুর সমক্ষে উদ্ভাসিত হইয়া উঠিয়াছিল!

কিন্তু হৃৎভাগ্য সুভাষচন্দ্র! সেদিনও তিনি ঈর্ষ্যা-বিদ্বেষের  
হীন মনুষ্য হইতে আত্মরক্ষা করিতে পারেন নাই। সুভাষচন্দ্র  
স্বেচ্ছা-সেবক-বাহিনীর ‘জেনারেল-অফিসার-কম্যান্ডিং’ বা  
G. O. C. নির্বাচিত হইয়াছিলেন। এই পদ-মর্যাদার অপভ্রংশ  
‘গক’ (GOC) শব্দটিকে লইয়াই কত না ব্যঙ্গ-বিদ্রূপ হইয়াছিল!  
এমন কি মহাত্মা গান্ধীও সেদিন তাহাতে হীন দৌর্বল্যই  
প্রকাশ করিয়াছিলেন!

“স্বেচ্ছাসেবক-বাহিনীর ও বাহিনীর অধিনায়কের বোদ্ধবেশ ও  
যোদ্ধাসম্ভব কুচকাওয়াজ দর্শনে সার্কাসের অভিনয়ের সহিত ব্যঙ্গাত্মক  
তুলনা গান্ধীজীই করিয়াছিলেন।”\*

কিন্তু যিনি যতই তুলনা করুন বা যিনি যতই বিদ্রূপাত্মক  
মন্তব্য করুন না কেন, আজ পৃথিবীতে সুস্পষ্ট হইয়া উঠিয়াছে

\* আজাদ-হিনের অধঃর।

যে, সুভাষচন্দ্র স্বপ্ন দেখিতেন বটে, কিন্তু সে স্বপ্ন বাস্তবে পরিণত করিবার উদগ্র প্রচেষ্টাও তাঁহার ছিল।

সামরিক চিত্র যে তাঁহার কত আকাঙ্ক্ষিত, সে বিষয়ে তিনি শ্রদ্ধেয় শ্রীযুক্ত বিজয়বাবু নিকট কথা-প্রসঙ্গে একদিন বলিয়াছিলেন। তিনি বলিয়াছিলেন,—

“দাদা, সামরিক বেশভূষা ও আদব-কায়দার ওপর আমাদের মত হুর্কল, নিরস্ত্র ও পরাধীন দেশের লোকদেরও যে কতখানি সম্মম ও সমীহ, তা বোধহয় আপনারা কল্পনা করতেও পারেন না। অত্রে পরে কা কথা! মহাত্মা গান্ধী যখন সামনে দিয়ে যান, তখন লোকের মনে শুধু ভক্তিই জেগে ওঠে, পায়ের ধূলো নেবার অত্রে ছড়োছড়ি পড়ে যায়—এই মাত্র! কিন্তু আমাদের স্বেচ্ছাসেবক-বাহিনী যখন নিয়মবদ্ধ সারিবদ্ধ হয়ে কদমে-কদমে চলে যায়, তখন জনতা ছ’ধারে স্তব্ধ হয়ে দাঁড়িয়ে, শ্রদ্ধাশ্রিত অন্তরে কি ভাবে, জানেন? ভাবে, আমিও কেন স্বেচ্ছাসেবক হই নি? হালে আমিও ত অমনি বীরদর্পে কদমে-কদমে গাঁটতে পারতুম! দাদা, এর মূল্য আমার কাছে অনেক—অনেক; অমূল্য, মহামূল্য!”

কথাটা খুবই সত্য, আমরাও তাহা স্বীকার করি। স্বাধীন ভারতের সামরিক চিত্রই যদি তাঁহার সম্মুখে সর্গ-কিরীটী নবাবরণের উজ্জ্বল নিভায় ফুটিয়া না উঠিত, তাহাহইলে কি এমন উন্মাদের মত সর্বসম্ম পরিভ্যাগ করিয়া, চূড়ান্ত বিপদের ঝুঁকি কাঁধে লইয়া, রাষ্ট্রশক্তিকে ফাঁকি দিবার জন্য তিনি মারাঠা-বীর চতুর শিবাজীর অভিনয়ে সাহসী হইতেন?

সুভাষচন্দ্রের অন্তর্দান-বাহিনী, স্বাধীনতার জাতীয় ইতিহাসে চিরদিনই রক্ত-অক্ষরে লিখিত থাকিবে, আর



উপরে : আজাদ হিন্দ ফৌজের বান্ধির রাণী রেজিমেণ্টের কতিপয় নারী ভলান্টিয়ার। মাঝখানে : নেতাজী সুভাষচন্দ্র। নীচে : নেতাজী ও ক্যাপ্টেন লক্ষ্মী নারী-সৈন্য পরিদর্শন করিতেছেন।





কর্তব্যপরায়ণ দায়িত্বশীল পুলিশ কর্মচারীদের স্মৃতিপটে ইহা গভীর কলঙ্ক ও ব্যর্থতার ইতিহাস-রূপে চিরদিনই তাহাদিগকে নিশ্চয় কশাঘাত করিবে !

নিরুদ্দিষ্ট সুভাষচন্দ্র সম্পর্কে কিছুকাল নানা জনরব ও নানা গবেষণাই চলিতেছিল ; কিন্তু কেমন করিয়া, কোন উপায়ে তিনি তাঁহার প্রহরী-বেষ্টিত গৃহ হইতে নিজস্ব হইয়াছিলেন, অনেক-কিছু সে সম্পর্কে প্রচারিত হইলেও, আমাদের দৃঢ় বিশ্বাস—সুভাষচন্দ্রের নিজ মুখ হইতে তাঁহার অন্তর্কানের পরিপূর্ণ বিবরণ যদি কখনও শুনিবার সৌভাগ্য আমাদের হয়, তবে তাহাই হইবে প্রামাণ্য ; এবং তাহা এতাবৎকালে প্রকাশিত যাবতীয় বিবরণ, এমন কি,— অনেক চমকপ্রদ গোয়েন্দা-কাহিনীর শিহরণ এবং কোতূহলকেও তুচ্ছ ও নিপ্প্রভ করিয়া দিবে !

সুবিখ্যাত আকালী নেতা, মাফটার তারা সিং তাঁহার “শান্ত্, সিপাহী” নামক মাসিক কাগজে সুভাষচন্দ্রের অন্তর্কান-সম্পর্কে যে বিবরণ প্রকাশ করিয়াছিলেন, সম্ভবতঃ তাহাই আমাদের সর্বপ্রথম বিশ্বাসযোগ্য বিবরণ।

তিনি লিখিয়াছিলেন যে, সুভাষচন্দ্রের নিরুদ্দেশ-সংবাদ ২৬শে জানুয়ারী প্রকাশিত হইলেও, প্রকৃতপক্ষে তিনি তাঁহার এল্‌গিন্ রোডের গৃহ হইতে বাহির হইয়াছিলেন তাহার বহু পূর্বে,—১৯৪০ মালের ১৩ই ডিসেম্বর তারিখে।

সম্ভবতঃ তিনি তাহারও অনেকদিন আগে হইতেই পলায়নের সঙ্কল্প করিয়াছিলেন, এবং সেই উদ্দেশ্যে নির্জন

সাধনায় অবস্থানের হলে, লোক-লোচনের অন্তরালে কক্ষমধ্যে আবদ্ধ থাকিয়া তাঁহার শ্মশ্রু ও কেশরাশি সুদীর্ঘ হইবার সুযোগ গ্রহণ করিয়াছিলেন ।

সুতরাং ১৩ই ডিসেম্বর যখন তিনি পেশোয়ারী পোষাকে গৃহ হইতে নিষ্ক্রান্ত হন, তখন তাঁহার সুদীর্ঘ কেশ ও শ্মশ্রু-রাশিতে তাঁহাকে যথার্থই পেশোয়ারী বলিয়া মনে হইতেছিল !

এইরূপ ছদ্মবেশে তিনি একখানি মোটরযোগে বর্দ্ধমান পর্য্যন্ত যান ; সেখানে পূর্ব-নির্দিষ্ট বন্দোবস্ত অনুসারে তিনি ট্রেনে একখানি দ্বিতীয় শ্রেণীর কক্ষে আরোহণ করিয়া পেশোয়ার গমন করেন ।

পেশোয়ার হইতে তিনি কাবুল চলিয়া যান, এবং সেখান হইতে দৈবযোগে সুবিধা পাইয়া বিমানে তিনি বার্লিনে হিটলারের দরবারে উপস্থিত হন ।

মাফটার তারা সিংএর এই বিবরণ যে আংশিক সত্য, তাহা কাবুলের এক বেতার-ধন ব্যবসায়ী—লালা উত্তমচাঁদের লিখিত বিবরণেও অনেকটা প্রমাণিত হইয়াছে । তাঁহার লিখিত বিবরণে যাহা প্রকাশ পাইয়াছে, আমরা পরবর্তী অধ্যায়ে তাহার আলোচনা করিব ।

---

পাঁচ

## অন্তর্দানের বিবরণ

মোলবীর বেশে মোটরে—টুংগে পেশোয়ার—সঙ্গী রহমৎ খাঁ—  
জামরুদের পথে—‘গাঢ়ি’ গ্রামে—লালপুরা—কাবুল-নদী  
অতিক্রম—‘ঠাণ্ডী’তে বাসের অপেক্ষায়—কাহোরী-দরওয়াজা  
—এক সরাইখানায়—সি. আই. ডি.র পালায়।

মাফটার তারা সিং বলিয়াছেন—সুভাষচন্দ্র ১৩ই ডিসেম্বর  
তারিখে গৃহ হইতে নিষ্ক্রান্ত হন; কিন্তু লালা উত্তমচাঁদ যাহা  
বলিয়াছেন, তাহাতে দেখা যায় সুভাষচন্দ্রের গৃহ হইতে  
নিষ্ক্রান্ত হইবার তারিখ ১৫ই জানুয়ারী অর্থাৎ তাঁহার  
অন্তর্দানের সংবাদ কলিকাতায় প্রকাশিত হইবার ১১ দিন  
পূর্বেই তিনি কলিকাতা পরিত্যাগ করিয়াছিলেন।

সুভাষচন্দ্র ১৯৪১ সালের ১৫ই জানুয়ারী তারিখে রাত্রি  
৮টার সময় তাঁহার এলগিন রোডের বাড়ী হইতে একজন  
মুসলমান মোলবীর বেশে বাহির হইয়া, পূর্ব-নির্দিষ্ট বন্দোবস্ত  
অনুসারে একখানি মোটর-গাড়ীতে আরোহণ করেন।

গোয়েন্দা-পুলিশের বাহ ভেদ করিয়া গাড়ী নক্ষত্র-বেগে  
ছুটিয়া চলিল। তাঁহাকে কেহ দেখিল, কেহ দেখিল না;  
কিন্তু সন্দেহ করিল না কেহই। কারণ, সুভাষচন্দ্র পূর্ব  
হইতেই লোক-লোচনের অন্তরালে অবস্থান করিয়া তাঁহার  
গুপ্ত ও শ্মশ্রুতাজি সুদীর্ঘ করিবার সুযোগ লইয়াছিলেন।

কলিকাতা হইতে চল্লিশ মাইল দূরে এক রেলওয়ে স্টেশন পর্য্যন্ত তিনি এই ভাবে মোটরে চলিয়া যান। তারপর একখানি দ্বিতীয় শ্রেণীর টিকিট—পেশোয়ার পর্য্যন্ত—কিনিয়া লইয়া তিনি ট্রেনে উঠিয়া বসেন।

রাত্রিটা বেশ নির্বিঘ্নেই কাটিয়া গেল; কিন্তু পরদিন একজন শিখ আরোহী ঐ দ্বিতীয় শ্রেণীর কামরায় উঠিয়া, সূভাষচন্দ্রের প্রায় মুখোমুখি হইয়া বসিলেন।

কয়েকবার বেশ তীক্ষ্ণভাবে সূভাষচন্দ্রের দিকে দৃষ্টিপাত করিয়া তিনি জিজ্ঞাসা করিলেন, “আপনি কোথায় যাইতেছেন? আর কি আপনার পরিচয়?”

সূভাষচন্দ্র কহিলেন, “আমার নাম জিয়াউদ্দিন, আমি একজন জীবন-বীমা কোম্পানীর অর্গানাইজার। আমি লক্ষ্মী হইতে আসিতেছি, রাওয়ালপিণ্ডি যাইব।”

শিখ ভদ্রলোক তাঁহার সেই কৈফিয়ৎ শুনিলেন বটে, কিন্তু বিশ্বাস করিলেন কিনা, কে জানে? যাহা হউক, সূভাষচন্দ্র অনেকটা সন্তুষ্টভাবেই রহিলেন; এবং গাড়ী যখনই কোন স্টেশনে উপস্থিত হইতেছিল, সূভাষচন্দ্র জনতার দৃষ্টি হইতে নিজেকে যথাসাধ্য গোপন করিবার জন্ত, সংবাদপত্র পড়িবার ছলে, তাহারই পশ্চাতে নিজের মুখমণ্ডল ঢাকিয়া রাখিতেছিলেন।

এইভাবে বাকি পথটা কাটিয়া গেল। অবশেষে ১৭ই জানুয়ারী রাত্রি ৯টার সময় তিনি পেশোয়ার পৌঁছিলেন।

পূর্ব-বন্দোবস্ত অনুসারে একখানি মোটরগাড়ী তাঁহার জন্ত

ফেশনে অপেক্ষা করিতেছিল ; তিনি ফেশনে পৌঁছিলেই গাড়ীখানি তাঁহাকে লইয়া নির্দিষ্ট গন্তব্য স্থানের দিকে ছুটিয়া চলিল ।

এই সময় সুভাষচন্দ্রের বেশভূষা ছিল, একটি আঁটা পায়জামা, একটি শেরওয়ানী ও ফেজটুপী । মোট কথা, তাঁহাকে দেখিয়া একজন মৌলবী ব্যতীত আর কিছুই বুঝিবার উপায় ছিল না ।

পেশোয়ারে তাঁহাকে দুইদিন অবস্থান করিতে হইল । তাঁহার নির্দিষ্ট বন্ধুবান্ধবগণ এরূপ সানখানেই তাঁহাকে রাখিয়াছিলেন যে, কেহই কোন সন্দেহ করিতে পারিল না । অনন্তর তাঁহারা পরামর্শ করিলেন, “এখন কাবুল যাইতে হইলে, পেশোয়ার হইতে তাঁহার কোন্ বেশে যাওয়া উচিত হইবে ?”

স্থির হইল, যুক্তপ্রদেশের মৌলবীর সাজ এখন আর সুবিধাজনক হইবে না । আফগানিস্থানে যাতায়াত করিতে পাঠান বেশভূষাই স্বাভাবিক ও সহজ । সুতরাং ১৯শে জানুয়ারী তারিখে, যাত্রার পূর্বক্ষণে সুভাষচন্দ্র পাঠানের পরিচ্ছদে সজ্জিত হইলেন ।

পূর্বেই ঠিক ছিল, নওজোয়ান ভারত-সভার সেক্রেটারী শ্রীযুক্ত ভগৎরাম ও অপর একজন বন্ধু তাঁহার সঙ্গে যাইবেন । সুতরাং জিয়াউদ্দিনের সহচর-রূপে তাঁহাদেরও মুসলমান এবং পাঠান হওয়া সঙ্গত । কাজেই তাঁহারাও পাঠানী পোষাকে সজ্জিত হইলেন, এবং ভগৎরামের নূতন নাম হইল, রহমৎ খাঁ ।

এইভাবে সুভাষচন্দ্র ও ভগৎরাম, উভয়েই ছদ্মবেশে—

জিয়াউদ্দিন ও রহমৎ খাঁ নাম ধারণ করিয়া অপর এক বন্ধুর সহিত মোটরে চড়িয়া বসিলেন; মোটরও তৎক্ষণাৎ তাঁহাদিগকে লইয়া পেশোয়ার পরিত্যাগ করিয়া জামরুদের পথে কাবুলের দিকে ছুটিয়া চলিল।

জামরুদ কেলা তাহার অনতিদূরেই। পাছে ধরা পড়িয়া যান, এই আশঙ্কায় তাঁহারা ঠিক সেই পথে না যাইয়া, একটা কাঁচা রাস্তা ধরিয়া চলিলেন। কিন্তু 'গাটি' নামে এক গ্রামে আসিয়াই তাঁহাদের রাস্তা বন্ধ হইয়া গেল, মোটর চলিবার মত রাস্তা ইহার পরে আর নাই।

অগত্যা সকলকেই নামিতে হইল, এবং রহমৎ ব্যতীত অপর যে বন্ধুটি পেশোয়ার হইতে এতটা পথ তাঁহাদের সঙ্গে আসিয়াছিলেন, তিনি এইখান হইতে মোটর লইয়া পুনরায় পেশোয়ারে ফিরিয়া গেলেন। স্থির হইল, সুভাষচন্দ্র ও রহমৎ খাঁ দুইজন রাইফেলধারী পাঠান প্রহরীসহ পদব্রজে অগ্রসর হইবেন। আর ইহাও স্থির হইল যে, সুভাষচন্দ্র এখন হইতে বোবা ও কালার অভিনয় করিয়া যাইবেন! কারণ, মেদেশী ভাষায় তিনি একেবারেই খনভিষ্ট!

পরদিন তাঁহারা ভারত-সীমান্ত পার হইয়া গেলেন এবং পার্বত্য জাতি-সমূহের এক ক্ষুদ্র গ্রামে—আদা-শরীফের তীর্থস্থানে উপস্থিত হইলেন। আদা-শরীফের মসজিদে যে পীরসাহেব ছিলেন তিনি তাঁহাদের সুখ-সুবিধার দিকে বিশেষভাবে দৃষ্টি রাখিয়াছিলেন।

এই সময় তাঁহাদের সঙ্গী প্রহরী দুইজন চলিয়া গেল,

তৎপরিবর্তে অপর তিনজন সশস্ত্র প্রহরী তাঁহাদের সঙ্গী হইল। পরদিন পুনরায় যাত্রা শুরু হইল এবং রাত্রি প্রায় ৯টার সময় যেখানে পৌঁছিলেন, তাহার নাম লালপুরা।

লালপুরায় আসিবার ব্যবস্থা তাঁহাদের পূর্ব হইতেই নির্দিষ্ট ছিল। তদনুসারে তাঁহারা লালপুরার সর্দার ও জমিদার, প্রকাণ্ড এক খাঁ-সাহেবের অতিথি হইলেন। খাঁগান-সরকারে এই খাঁ-সাহেবের ক্ষমতা ছিল অসীম।

কঠোর পথশ্রমে ও উদ্বেগে সুভাষচন্দ্র এই সময় বীতিমত ক্লান্ত হইয়া পড়িয়াছিলেন। খাঁ-সাহেব তাহা লক্ষ্য করিয়া কহিলেন, “আর সামান্য কয়েক মাইল গেলেই আপনারা কাবুল-নদীর তীরে উপস্থিত হইবেন। সে নদী পার হইলেই ওপারে বাঁধানো রাস্তা পাওয়া যাইবে। সেই পথে বাস-চলাচল করে; তাহারই কোন বাসে চাপিয়া আপনারা কাবুলে পৌঁছিতে পারিবেন।”

লালপুরা পরিত্যাগ করিবার কালে তিনি সুভাষচন্দ্র ও রহমৎ খাঁকে একটি পরিচয়-পত্র লিখিয়া দিয়া বলিলেন, “পথে কেউ আপনাদের কোন সন্দেহ করিলে বা কোন বিপদের আশঙ্কা দেখিলে এই পরিচয়-পত্র দেখাইবেন—তাহা হইলে কেহই আর কোন বাধা সৃষ্টি করিতে সাহস পাইবে না।”

পরিচয়-পত্রখানি পারসী ভাষায় লেখা। তাহাতে লিখিত ছিল :—

“এই পত্র-বাহক রহমৎ খাঁ ও জিয়াউদ্দিন পার্শ্বত্যা প্রদেশের অধিবাসী। ইঁহারা সাখি-সাহেবের দরগায় যাইতে-

ছেন। ইহাদের চরিত্রের জন্য আমি নিজে দায়ী। কেহই যেন ইহাদিগকে কোনভাবে বিরক্ত করিতে না পারে, এই ভরসায় আমি এই সার্টিফিকেট লিখিয়া দিতেছি।”

লালপুরা হইতে দুইটি সশস্ত্র প্রহরী সঙ্গে লইয়া সুভাষচন্দ্র ও রহমৎ খাঁ কাবুলের পথে, কাবুল নদীর দিকে অগ্রসর হইলেন। কিন্তু কাবুল-নদীর তীরে পৌঁছিয়া তাঁহারা একেবারেই হতাশ হইয়া পড়িলেন। কারণ, নৌকা—নৌকা কোথায়? নৌকার কোন চিহ্নও সেখানে নাই। এক অপরূপ উপায়ে সেদেশে সকলে পারাপার হইয়া থাকে!

কতকগুলি ভিস্তির মশক একসঙ্গে বাঁধিয়া তাহার উপরে জেলেদের একখানি জাল বিছাইয়া দেওয়া হইয়াছে। পারাপারের সময় লোকজন ঐ জালের উপর বসিয়া থাকে।

সুভাষচন্দ্র ও রহমৎ ইহাতে অভ্যস্ত নহেন; সুতরাং এই বন্দোবস্তে তাঁহারা প্রথমে শিহরিয়া উঠিলেন। যাহা হউক, সাহসে নির্ভর করিয়া অগত্যা ঐ ভাবেই তাঁহাদিগকে কাবুল-নদী অতিক্রম করিতে হইল।

কাবুল-নদীর পরেই আফগান-রাজ্য। আফগান-রাজ্যের প্রবেশ-পথে পদে-পদে অসংখ্য বাধা। কেহ সেখানে সশস্ত্র ভাবে প্রবেশ করিতে পারে না; সুতরাং নদীর অপর তীরেই সশস্ত্র প্রহরী দুটিকে তাঁহাদের বিদায় দিতে হইল। ইহা ছাড়া, এখানে-সেখানে খানাতল্লাসীর বন্দোবস্তও রহিয়াছে; কিন্তু খানাতল্লাসীর কোন ব্যাপারই তাঁহাদের পক্ষে নিরাপদ নহে।





আজাদ ফৌজের কতিপয়  
ভট্টাচার্য্য

বামদিক হইতে প্রথমে রেব সন, তৃতীয় সিপ্রা সেন, পঞ্চম মিস  
কর্ণেল লক্ষ্মী ।



সুভাষচন্দ্র তখন ছদ্মবেশে জিয়াউদ্দিন ; রহমৎ খাঁও প্রকৃতপক্ষে ভগৎরাম । সুতরাং দুইটি ছদ্মবেশী লোকের পক্ষে কি খানাতল্লাসীর সম্মুখীন হওয়া চলে ? কাজেই তাঁহারা চিন্তিত হইলেন ।

পেশোয়ার হইতে ৫০ মাইল দূরবর্তী এক গ্রামের নাম 'ডাকা' । 'ডাকা'য় তল্লাসীর হিড়িকটা খুব বেশী, অবশ্য মাঝপথে—পেশোয়ার ও ডাকার মাঝখানেও কয়েক স্থানে যাত্রীদিগকে তল্লাসী করা হয় । সুভাষচন্দ্র ও ভগৎরাম অনেকটা যুরপথে চলিতেন, অনেকটা বেশী পথ হাঁটিতেন, তথাপি তাঁহারা সহজে খানাতল্লাসীর সম্মুখীন হইতেন না ।

'ঠাণ্ডী' নামক এক জায়গায় আসিয়া তাঁহারা কাবুল যাইবার জগু বাসের অপেক্ষা করিতে লাগিলেন । সুভাষচন্দ্র ক্লান্ত ও পরিশ্রান্ত দেহে এক গাছের তলায় বিশ্রাম করিতে লাগিলেন, আর রহমৎ খাঁ যখনই যে বাস দেখিতেন— ছিলেন, তখনই তাহার দৃষ্টি আকর্ষণ করিবার জগু হাত নাড়িতেছিলেন ।

বল চেম্টায়, অবশেষে এক লরীতে তাঁহাদের স্থান হইল— তাঁহারা উঠিয়া বসিলেন ।

জানুয়ারী মাস—শীত তখন নিদারুণ । বিশেষতঃ আফগান-রাজ্যের সেই শীত,—তাহার কল্পনা করাও কঠিন ! সারা মাঠ তখন তুষারে সাদা হইয়া গিয়াছে ! তবু—তাহারই মধ্য দিয়া, সেই তুষার-রাজ্য ভেদ করিয়া, সারা দিন, সারা রাত লরী ছুটিয়া চলিল ।

নীতে তাঁহাদের হাত-পা জমিয়া যাইবার মত হইল—  
তাঁহারা মাঝে-মাঝে চা পান করিয়া দেহের রক্ত উষ্ণ রাখিবার  
প্রয়াস পাইতেছিলেন।

দ্বিতীয় দিন তাঁহারা যে স্থানে উপস্থিত হইলেন, তাহার  
নাম 'বাটখাক'। এখানে যাত্রীদের পাসপোর্ট ইত্যাদি পরীক্ষা  
করা হয়, তাহাদিগকে নানারকম প্রশ্ন জিজ্ঞাসা করা হয়।

সুভাষচন্দ্র ও রহমৎ খাঁকে অনুরূপ ভাবে প্রশ্ন জিজ্ঞাসা  
করা হইলে, রহমৎ খাঁ বলিলেন, "ইনি আমার বড় ভাই;  
ইনি কালা ও বোবা। আমি ইঁহাকে লইয়া ধর্ম্ম-কর্ম্মের জন্ত  
সাধি-সাহেবের দরগায় যাইতেছি। আমরা স্বাধীন পার্শ্বভ্য  
প্রদেশের অধিবাসী।"

এই বলিয়া তিনি লালপুরার খাঁ-সাহেবের দেওয়া সেই  
সার্টিফিকেটখানা দেখাইলেন। সঙ্গে-সঙ্গে প্রশ্নকর্তা একেবারে  
নীরব হইয়া গেলেন।

সুভাষচন্দ্র ও রহমৎ খাঁ অনন্তর সেইখানে কিছু চা পান  
করিয়া পুনরায় লরীতে উঠিলেন, লরীও আবার পূর্ণ বেগে  
ছুটিয়া চলিল।

অপরাহ্ন ৪টা কি ৫টার সময় লরী আসিয়া খামিল আফ-  
গানিস্থানের রাজধানী কাবুল সহরে। তাঁহারা এইখানে  
নাশিয়া পড়িলেন এবং লরীওয়ালাকে তাহার প্রাপ্য ভাড়া  
মিটাইয়া দিলেন।

আফগান-রাজ্যে ভারতবর্ষীয় মুদ্রার প্রচলন নাই। সুতরাং  
পেশোয়ার হইতেই তাঁহাদিগকে আফগানী মুদ্রার ব্যবস্থা

করিতে হইয়াছিল। নতুবা আফগানিস্থানে আসিয়া তাঁহাদিগকে বিশেষ বিপদে পড়িতে হইত।

সুভাষচন্দ্র ও রহমৎ খাঁ কাবুলে আসিলেন বটে, কিন্তু কাবুল হইলেও ইহা কাবুলের একটা সীমান্ত-অংশ মাত্র। ইহার নাম 'লাহোরী-দরওয়াজা'।

এক উন্মুক্ত প্রান্তরের উপর লাহোরী-দরওয়াজা অবস্থিত। বাস ও লরীর ডাইভারগন এইখানে আসিয়া, তাহাদের বাস ও লরীতে নির্দিষ্ট সংখ্যার অতিরিক্ত আরোহী থাকিলে তাহাদিগকে নামিয়া যাইতে বলা, এবং এই ভাবে তাহারা পুনিশের দৃষ্টিকে ফাঁকি দেয়।

সুভাষচন্দ্র ও রহমৎ খাঁ এইখানে নামিলেন; কিন্তু নামিয়া এখন তাঁহারা কোথায় যাইবেন? একটা আশ্রয় চাই তো! নিকটে কোথায়ও আশ্রয়-স্থান আছে কি না, তাহা কে জানে? রহমৎ খাঁ বাজার পর্যন্ত পৌঁছিয়া একজনকে জিজ্ঞাসা করিলেন।

সে অদূরে একখানি বাড়ী দেখাইয়া কহিল, “ঐ একটা সরাই আছে। খুঁজিয়া দেখিতে পার সেখানে কোন জায়গা খালি আছে কিনা।”

সুভাষচন্দ্র ও রহমৎ খাঁ একটু হাঁটিয়া গিয়া সেই সরাইখানায় উপস্থিত হইলেন। রহমৎ পুস্তভাষায় একজনকে জিজ্ঞাসা করিলেন, “এখানে একটু আশ্রয় পাইতে পারি কি?”

লোকটি পুস্তভাষা বুঝিল না। কিচির-মিচির করিয়া

ক্রুদ্ধ ভাবে কি জবাব দিল! আফগানীদের মাতৃভাষা যে পুস্ত্র নহে, এই সর্বপ্রথম তাঁহাদের সেই অভিজ্ঞতা হইল। ইতোমধ্যে আর একটি লোককে দেখিতে পাইয়া রহমৎ তাহাকেও পুস্ত্র ভাষায় জিজ্ঞাসা করিলেন, “মশাই, আপনি বলিতে পারেন, এই সরাইএর মালিক কে? আমরা আশ্রয়-প্রার্থী হইয়া এখানে আসিয়াছি।”

ভাগ্যক্রমে সে তাঁহার পুস্ত্রভাষা বুঝিল। সে দূরে একখানি ঘর দেখাইয়া কহিল, “এখানে সরাইয়ের চৌকীদার আছে; আপনারা তাহার কাছে যান, সে সমস্ত বন্দোবস্ত করিয়া দিবে।”

সুভাষচন্দ্র ও রহমৎ তখন সেই ঘরের সম্মুখে উপস্থিত হইয়া দেখিলেন, গুর্খা-ধরনের একটি লোক দিব্যি লেপ গায়ে দিয়া শুইয়া আছে।

রহমৎ তাহাকে আশ্রয়ের কথা জিজ্ঞাসা করিলে, সে উঠিয়া আসিল এবং একখানি ক্ষুদ্র কক্ষ দেখাইয়া কহিল, “আপনারা এইখানে থাকিতে পারেন। এক টাকা করিয়া ভাড়া লাগিবে।”

কক্ষটি অতি ক্ষুদ্র ও জানালা-দরজা শূন্য। দরজা বন্ধ করিয়া দিলে তাহা গুদামে পরিণত হইয়া যায়। তবু তাহাই তখন তাঁহাদের নিকট স্বর্গ বলিয়া মনে হইল! তাঁহারা সেইখানেই নিজেদের জিনিষ-পত্র আনিয়া স্বস্তির নিঃশ্বাস ফেলিলেন।

সেই সরাইটির প্রধান অধিবাসী ছিল কতকগুলি উট,

খচ্চর ও গাধা-ঘোড়া এবং তাহাদের সহিসদের দল। ভাগ্যের বিড়ম্বনায় সুভাষচন্দ্র ও ভগৎরাম ওরফে রহমৎ খাঁকেও আজ সেইখানেই আশ্রয় লইতে হইল।

দিন পাঁচ-ছয় ভাল ভাবেই কাটিয়া গেল। ইহার পরে একদিন রহমৎ আসিয়া সুভাষচন্দ্রকে কহিলেন, “সাদা পোষাকে একটা লোক কাছেই রুটির দোকানে বসিয়া থাকে। সে সর্বদাই আমার দিকে কটমট করিয়া তাকায়। তাহাকে দেখিয়া আফগান মি. আই. ডি.র লোক বলিয়া মনে হয়।”

কথার সঙ্গে-সঙ্গেই সেই কনফেটবলটি তাঁহাদের দরজার সম্মুখে উদয় হইল।

সে এক মুহূর্ত্ত ভীক্ষুভাবে তাঁহাদের দিকে তাকাইয়া রহিল ; তারপর পরিচিত পুস্তুভাষায় সতেজে জিজ্ঞাসা করিল, “আপনারা কে ? আর এখানে আসিয়াছেন কেন ?”

রহমৎ খাঁ সুভাষচন্দ্রকে দেখাইয়া কহিলেন, “ইনি আমার বড় ভাই, বোবা ও কালা, এবং অসুস্থ। আমি ইঁহাকে লইয়া সাখি-সাহেবের দরগায় যাইতেছি ; কিন্তু অতিরিক্ত ভ্রমারপাত হওয়ায়, সাখি-সাহেবের পথ-ঘাট এখন বন্ধ হইয়া গিয়াছে, কাজেই আমরা এখানে অপেক্ষা করিতেছি।”

কনফেটবলটি কহিল, “আপনাদের কথা সত্য বলিয়া আমার বিশ্বাস হয় না। যাহোক, আপনারা আমার সঙ্গে কোতোয়ালীতে চলুন।”

সুভাষচন্দ্র ও রহমৎ খাঁর সমস্ত শরীর ঘামিয়া উঠিল। তাঁহারা ভাবিলেন,—এত পরিশ্রম, এত যত্ন, সবই কি বিফল

হইল ? যাহোক, রহমৎ খাঁ যেন ঝানিকটা গরম হইয়াই কহিলেন, “বেশ, চলুন আমি যাইতেছি ; কিন্তু আমার দাদা খুবই অসুস্থ, তিনি যাইতে পারিবেন না।”

কনফেটবলের গলার সুর কতকটা নরম হইয়া গেল ; সে ভাবিল, “সত্যই তো একটা রুগ্ন লোককে খানায় লইয়া গেলে কি লাভ হইবে ? বরং তাহা না করিয়া যদি—”

সে কহিল, “বেশ, তাহা হইলে থাক, কাহারও যাইবার দরকার নাই। কিন্তু সাবধান, খুব শীগ্গির এখান হইতে চলিয়া যাইবেন—ইহার যেন অণুখা না হয়। তবে—যাওয়ার আগে চা খাওয়ার জন্য আপনারা আমাকে কিছু দিয়া যান—ষে শীত পড়িয়াছে।”

রহমৎ খাঁ দ্বিরুক্তি না করিয়া তাহার হাতে একখানি দশ টাকার নোট গুঁজিয়া দিলেন। কনফেটবলটি চায়ের দক্ষিণা, সেই নোটখানি লইয়া আনন্দের সহিত চলিয়া গেল।

সেদিন চলিয়া গেল বটে, কিন্তু তিন দিন পরেই আবার সে আসিয়া উপস্থিত। সেদিনও তাহাকে দক্ষিণা বাবদ পাঁচটি টাকা দিয়া বিদায় করিতে হইল।

সুভাষচন্দ্র এবং রহমৎ বুঝিলেন, পুলিশের এই ভৃত্যটি তাঁহাদের কাঁধে এখন জোঁকের মত আঁটিয়া থাকিবে ! এখন ইহার হাত হইতে অব্যাহতি পাইবার উপায় কি, তাঁহারা ইহা চিন্তা করিতে লাগিলেন।

রহমৎ খাঁ অর্থাৎ ভগৎরামের নিকট সুভাষচন্দ্র শুনিয়া-ছিলেন যে, কাবুল শহরে উত্তমচাঁদ নামে একজন বেডিয়ো-



ব্যবসায়ী আছেন। তিনি এক সময় নওজোয়ান ভারত-সভার জেনারেল সেক্রেটারী ছিলেন এবং সেই সংশ্রবে ১৯৩০ সালে পুলিশ তাঁহাকে গ্রেপ্তারও করিয়াছিল।

সুভাষচন্দ্র ইহা শুনিয়া ভাবিলেন, দেশের কাজে যাঁহারা একবার পুলিশের কোপদৃষ্টিতে পড়িয়া লাস্থিত হইয়াছেন, তাঁহাদের পক্ষে সুভাষচন্দ্রকে আশ্রয় দান করা অসম্ভব না হইতেও পারে। সুতরাং তিনি রহমৎ খাঁ অর্থাৎ ভগৎরামকে কহিলেন, “আপনি একবার সেইখানে যান, দেখুন তিনি আশ্রয় দিতে রাজী হন কি না।”

সুভাষচন্দ্র বলিলেন বটে, কিন্তু রহমৎ খাঁ তখনও ইতস্ততঃ করিতেছিলেন! তিনি ভাবিতেছিলেন, “কি জানি, উত্তমচাঁদ যদিই বা কোন সাহায্য না করেন!”

এই ভাবে হয়তো আরও কিছুকাল কাটিয়া যাইত, কিন্তু পরদিন যখন সেই সি. আই. ডি. কর্মচারীটি আবার দেখা দিল, তখনই ব্যাপারটা খুব জরুরী হইয়া উঠিল।

পুলিশ-কর্মচারীটি কহিল, “খাঁ সাহেব, আপনারা এখনো এখানে আছেন? দেখুন আপনাদের সম্পর্কে আমার এখন নানা রকম সন্দেহ হইতেছে। আমি আজ আমার দারোগা-সাহেবের সঙ্গে এ-বিষয়ে কথা বলিয়াছিলাম; তিনি আপনাদিগকে খানায় লইয়া যাইতে বলিয়াছেন। কাজেই চলুন, এখনই একবার খানায় যাইতে হইবে। আপনার দাদাটি বোবা-কাল হইলেও একটুখানি হাঁটিতে না পারিবার কোন কারণ নাই।”

রহমৎ খাঁ বলিলেন, “নিতান্ত দরকারী মনে করেন তো আমি যাইব ; কিন্তু আমার দাদা অসুস্থ, তাঁহাকে কেন কষ্ট দিবেন ?” এই বলিয়া তিনি একখানি পাঁচ টাকার নোট তাহার হাতে গুঁজিয়া দিলেন ।

কনফেবল সেই নোটখানি পকেটে রাখিতে-রাখিতে বলিল, “না, না, ওসব দু’পাঁচ টাকার যুব আমি গ্রহণ করি না । চলুন, খানায় চলুন !”

রহমৎ খাঁ পুনরায় একখানি পাঁচ টাকার নোট বাহির করিলেন এবং পুলিশটিকে তাহা দিলেন । কনফেবলটি তাহা গ্রহণ করিল বটে, তথাপি দৃঢ় হইয়া রহিল ।

সে কহিল, “আপনারা আমাকে ভুল বুঝিয়াছেন । এই সামান্য গোটা-কয়েক টাকার জন্য আমি আমার দারোগা-সাহেবের অবাধ্য হইতে পারি না ।”

অগত্যা আরও সাতটাকা—খরচ করিতে হইল ; কিন্তু সতেরোটি টাকা হস্তগত করিয়াও সে নিশ্চল ভাবে দাঁড়াইয়া রহিল, তাহার নড়িবার কোন লক্ষণই দেখা গেল না । সুভাষচন্দ্র ও রহমৎ খাঁ বিস্মিতভাবে তাহার দিকে তাকাইলেন ।

রহমৎ খাঁর হাতে ছিল সুভাষচন্দ্রের রিফ্ট্ ওয়াচ্ । তাঁহারা উভয়েই লক্ষ্য করিলেন, কনফেবলের সতৃষ্ণ দৃষ্টি তাহাতেই নিবদ্ধ । মুখ ফুটিয়া সে তখন একবার জিজ্ঞাসা করিয়াও ফেলিল, “এই ঘড়ীটা খুব সুন্দর, বেশ দামী বলিয়া মনে হয় ; ইহার দাম কত ?”

রহমৎ খাঁ কহিলেন, “দাম ?—কত দাম মনে নাই ; তবে—ইহার দাম খুব বেশী নহে ।”

—“বটে ! তাহা হইলে এই ঘড়ীটা আমায় দিন না ? টাকা তো আপনারা আমাকে খুব বেশী কিছু দেন নাই !”

উভয়েই বুঝিলেন, আর উপায় নাই ! একবার যখন বাঘের নজর পড়িয়াছে, তখন আর ইহার রক্ষা নাই । কাজেই ঘড়ীটি তাহাকে দিতে হইল ।

এই ভাবে সেদিন কিছু মোটা মাল আদায় করিয়া সে চলিয়া গেল । রহমৎ খাঁও পরামর্শ অনুসারে উত্তমচাঁদের দোকানের খোঁজে বাহির হইয়া পড়িলেন ।

দোকান পাওয়া গেল বটে, কিন্তু উত্তমচাঁদ ছিলেন না, তাঁহার সঙ্গে দেখা হইল না । সেদিন আরও একবার তাঁহার খোঁজ করা হইল—কিন্তু একবারও তাঁহার দেখা পাওয়া গেল না ।

কনস্টেবলটি পরদিন আবার আসিয়া উদয় হইল । রহমৎকে দেখিয়াই সে কহিল, “খাঁ সাহেব, বড়ই বিপদ হইয়াছে ! আচ্ছা, আপনার সেই ঘড়ীটার দাম কত ছিল বলিতে পারেন ?”

—“তাহা মনে নাই । কেন, কি হইয়াছে ?”

কনস্টেবল কহিল, “না, এমন কিছু নয় ; তবে ঘড়ীটা দেখিতে ছিল বড়ই সুন্দর ; কিন্তু তাহাতেই হইল যত বিপদ ! আমার দারোগা-সাহেব সেটি দেখিয়াই মুগ্ধ হইলেন, তিনি সেটি আমার নিকট হইতে লইয়া গিয়াছেন । যাহোক,

আমি সেটি ফিরাইয়া লইবার চেষ্টা করিব। কিন্তু দাদা, হাত আঘাত একেবারে খালি,—একখানা পাঁচ টাকার নোট যদি ধার দেন! তিনি আপনাদের কথা জিজ্ঞাসা করিয়াছিলেন; আমি তাঁহাকে বলিয়াছি, আপনারা এই সরাই হইতে কোথায় চলিয়া গিয়াছেন! যাহোক—পাঁচ টাকার একখানি নোট যদি—”

উপায় নাই। রহমৎ খাঁ নিঃশব্দে তাঁহাকে একটি পাঁচ টাকার নোট বাহির করিয়া দিলেন। কনফেটবলটি তাঁহা ‘ধার’ লইয়া অদৃশ্য হইয়া গেল।

কনফেটবল অদৃশ্য হইতেই সুভাষচন্দ্র ও রহমৎ খাঁর পরামর্শ-সভা বসিল। স্থির হইল, মুক্তি পাইতে হইলে আজই অস্ত্র ঘাইতে হইবে।

উত্তমচাঁদের সঙ্গে তখনও তাঁহাদের দেখাই হয় নাই! রহমৎ খাঁ সেই উদ্দেশ্যেই বাহির হইয়া গেলেন।



ছয়

## সুদূরের যাত্রী

কাবুলে উত্তমচাঁদের গৃহে—রুশদূতের সাহায্য প্রার্থনা—অক্ষ-  
শক্তির সাহায্য প্রার্থনা—বে-আতিনী পাহার মস্কৌ যাইবার সঙ্কল্প  
—অক্ষশক্তি-কর্তৃক পাসপোর্ট মঞ্জুর—বার্লিং যাত্রা—২৮শে মার্চ  
বার্লিংগে।

সুভাষচন্দ্র কলিকাতা হইতে বাহির হন, ১৯৪১ সালের  
১৫ই জানুয়ারী—রাত তখন ৮টা। তারপর চলিশ মাইল  
দূরবর্তী এক রেলপথে-স্টেশন হইতে ট্রেনে চাপিয়া পেশোয়ার  
পৌঁছান ১৭ই জানুয়ারী রাত ৯টায়। ১৯শে জানুয়ারী  
তাঁহারা পেশোয়ার হইতে কাবুলের উদ্দেশ্যে রওয়ানা হন  
এবং কাবুলে পৌঁছিতে তাহাদের তিনদিন কাটিয়া যায়।

কাবুলে লাহোরী-দরওয়াজার সরাইখানায় ১৩ দিন কোন  
রকমে বাস করিয়া, একদিন প্রাতঃকালে রহমৎ গাঁ অর্থাৎ  
ভগৎরাম পুনরায় উত্তমচাঁদের অনুরোধে তাঁহার দোকানে  
যাইয়া উপস্থিত হইলেন।

সেদিন ৩রা ফেব্রুয়ারী।—

উত্তমচাঁদ তাঁহার দোকানে বসিয়া আছেন, তাঁহার এক  
বালক কর্মচারী অমরনাথও সেখানে উপস্থিত, এমন সময়  
খাকী পেশোয়ারী পোষাকে এক অপরিচিত পাঠান তাঁহার

দোকানে প্রবেশ করিয়া, তাঁহাকে সুভাষায় অভ্যর্থনা করিলেন, “আসসালাম আলাইকুম !”

উত্তমচাঁদ বিস্মিত ও চমকিত হইলেন। তিনি একমুহূর্ত্ত নীরব থাকিয়া, পরক্ষণে জিজ্ঞাসা করিলেন, “বলুন, আপনার কি প্রয়োজন ?”

আগন্তুক কোন কথা কহিলেন না, তিনি দু’ একবার ইতস্ততঃ দৃষ্টিপাত করিয়া অবশেষে অমরনাথের দিকে চক্ষু ফিরাইলেন।

উত্তমচাঁদ বুঝিলেন, আগন্তুক অমরনাথের সম্মুখে কথা বলিতে চাহেন না। তিনি তখন অমরনাথকে স্থানান্তরে সরাইবার অভিপ্রায়ে তাহাকে কহিলেন, “যাও, তুমি দুই কাপ চা লইয়া আইস।”

অমরনাথ চলিয়া গেল—আগন্তুক তখন তাঁহার পরিচয় দিয়া কহিলেন, “আমার নাম ভগৎরাম, মর্দন জেলায় ঘল্লা-ধের গ্রামে আমার বাড়ী। আমারই ভাই পাঞ্জাবের গভর্নর বাহাদুরকে গুলি করিবার চেষ্টা করিয়াছিলেন। নওজোয়ান ভারত-সভার আমিও একজন কর্মী ছিলাম।”

উত্তমচাঁদ এখন তাঁহাকে চিনিতে পারিলেন। যাহোক, তাঁহার কি প্রয়োজন, তিনি তাহা জানিতে চাহিলেন।

ভগৎরাম কহিলেন, “সুভাষবাবুর নাম নিশ্চয়ই জানেন। কয়েক দিন যাবৎ তিনি পলাইয়া কাবুলে আসিয়াছেন, আমরা তাঁহাকে রাশিয়ায় পাঠাইতে চাই; কিন্তু যে সরাইখানায় আমার সঙ্গে তিনি আছেন, সেখানে এক আফগান

সি. আই. ডি. বড়ই উৎপাত শুরু করিয়াছে। তাই তিনি আমাকে আপনার নিকট পাঠাইয়াছেন। তাঁহার জন্য যদি একটি নিরাপদ আশ্রয়-স্থলের ব্যবস্থা করিয়া দেন !”

স্বর্গ হইতে চাঁদ খসিয়া পড়িলেও বুঝি উত্তমচাঁদ ইহা অপেক্ষা বেশী বিস্মিত হইতেন না ! অন্তর্হিত সুভাষচন্দ্রের সহসা কাবুলে আবির্ভাবের সংবাদে তিনি এতই বিস্মিত হইলেন !

উত্তমচাঁদের সমগ্র অন্তঃকরণ আনন্দে ও গৌরবে পরিপূর্ণ হইয়া উঠিল ! স্বদেশপ্রেমের জ্বলন্ত প্রতিমূর্তি, ভারতের জাতীয় মহাসভার ভূতপূর্ব রাষ্ট্রপতি, বাংলার পুরুষসিংহ— সুভাষচন্দ্র বসু আজ নিপন্ন হইয়া তাঁহারই নিকট আশ্রয় প্রার্থনা করিতেছেন ! ইহা যে উত্তমচাঁদের পক্ষে কত বড় মোভাগ্য ও কত বড় গৌরবের কথা, তিনি তাহা সম্পূর্ণভাবে হৃদয়ঙ্গম করিলেন। সুতরাং এই সুযোগ তিনি পরিত্যাগ করিতে পারেন না—তিনি ভগৎরামের এই প্রস্তাব সাদরে গ্রহণ করিলেন।

তিনি কহিলেন, “বোস্ বাবু আমার এখানে থাকিতে পারিবেন, কিন্তু গুটি কয়েক অসুবিধা আছে। আপনারা উভয়েই আছেন মুসলমানের ছদ্মবেশে। আমি আছি হিন্দু বস্ত্রীতে। এখানে হিন্দুর বাড়ীতে, হিন্দুর বস্ত্রীতে দুজন মুসলমানের বাস করা অনেকটা সন্দেহজনক হইয়া উঠে। কেবল তাহাই নহে, আমি থাকি উপর তলায় ; আমার বাড়ীতে নীচের তলায় অন্য একটি ভাড়াটিয়া আছেন। অথচ সেই ভাড়াটিয়ার অজ্ঞাতসারেই আপনাদিগকে বাস করিতে হইবে।

তাহা ছাড়া, আরো একটা অসুবিধা এই যে, আমার স্ত্রী জার্মান মহিলা—তিনি পর্দানশীন নহেন। তাঁহাকে না জানাইয়া আপনাদিগকে বাড়ীতে রাখা—সে এক মহা সমস্যা! কাজেই আমি প্রথমে আমার এক মুসলমান বন্ধুর সাহায্য প্রার্থনা করিব। মুসলমানের বাড়ীতে মুসলমানের অবস্থান, একেবারেই সন্দেহজনক হইবে না।

আমার সেই মুসলমান বন্ধুটিকে আমরা ‘হাজি সাহেব’ বলিয়া ডাকি। তিনি সত্তর বৎসর বয়স্ক এক বৃদ্ধ ব্যক্তি; এক জার্মান মহিলাকে তিনি বিবাহ করিয়াছেন; চীন, জাপান, আমেরিকা, জার্মানী ইত্যাদি বহুদেশ তিনি দেখিয়াছেন—বিষম ব্রিটিশ-বিরোধী মনোভাবাপন্ন। ভারতের জাতীয় আন্দোলনে তাঁহার খুবই সহানুভূতি আছে। আমি তাঁহাকে একবার বলিয়া দেখিব। যদি সেখানে হয় ভালই,—না হইলে অগত্যা আমার এইখানেই ব্যবস্থা হইবে। যাহোক, আপনি বিকাল বেলায় বোস্ বাবুকে লইয়া আসিবেন।”

ভগৎরাম আশ্বস্ত হইয়া চলিয়া গেলেন; তিনি বলিয়া গেলেন, অপরাহ্নে ৪টার সময় তিনি বোস্ বাবুকে লইয়া আসিবেন।

অপরাহ্ন—প্রায় ৪টা, মাত্র দশ মিনিট বাকী আছে, এমন সময় রহমৎ খাঁর ছদ্মবেশে ভগৎরাম পুনরায় উত্তমচাঁদের দোকানে আসিয়া উপস্থিত হইলেন।



উত্তমচাঁদ তাঁহাকে একাকী দেখিয়া বিস্মিতভাবে জিজ্ঞাসা করিলেন, “আপনি একা কেন ? বোস্ বাবু কোথায় ?”

—“ঐ যে তিনি নদীর অপর তীরে দাঁড়াইয়া আছেন।” রহমৎ খাঁ বলিলেন।

উত্তমচাঁদের বাড়ী তাঁহার দোকানের সঙ্গেই। দোকানের সম্মুখ দিয়া কাবুল-নদী প্রবাহিত হইয়াছে। নদীর উপরে একটি সেতু। উত্তমচাঁদ ও রহমৎ সেই সেতুর দিকে অগ্রসর হইলেন।

সেতুর অপর প্রান্তে রহমৎ খাঁ যাঁহাকে বোস্ বাবু বলিয়া দেখাইয়া দিলেন, উত্তমচাঁদ তাঁহাকে দেখিয়া একেবারে বিস্মিত হইয়া গেলেন। তাঁহার বেশ-ভূষা, চেহারা—সম্পূর্ণই পাঠান। তাঁহাকে দেখিয়া পাঠান না ভাবিয়া অন্য কিছু মনে করিতে পারে, এমন সাধ্য কাহারও ছিল না। কে বলিবে ইনিই সুভাষচন্দ্র ? তাঁহার সেই অতি-পরিচিত চশমাটি পর্যন্ত নাই।

যা হোক, পরিপূর্ণ বিশ্বাসে অভিভূত হইয়া, শ্রদ্ধামুগ্ধ অন্তরে উত্তমচাঁদ তাঁহাকে অভ্যর্থনা করিয়া গৃহে লইয়া আসিলেন, এবং উপরে একটি কক্ষে সর্বস্বর্ণ তালানক অবস্থায় তাঁহাদের থাকিবার ব্যবস্থা করিলেন।

হাজি সাহেবের কথা জিজ্ঞাসা করিতেই উত্তমচাঁদ জানাইলেন যে, সেখানে সুবিধা হইল না। ভগৎরাম চলিয়া যাইবার পরক্ষণেই তিনি হাজি সাহেবের নিকট গিয়াছিলেন। তিনি এতদিন অনেক বড়-বড় কথা বলিতেন বটে, কিন্তু সুভাষ বাবুকে বাড়ীতে রাখিতে তিনি নানা আপত্তি ও অসুবিধার কথা তুলিয়াছেন। মোট কথা, একজন পলাতক

নেতাকে গৃহে আশ্রয় দিতে তিনি ভয় পাইতেছেন। সুতরাং বোস্ বাবুর স্থান তাঁহার নিজের বাড়ীতেই করিতে হইয়াছে।

উত্তমচাঁদ প্রথমে ভাবিয়াছিলেন, বোস্ বাবুর পরিচয় তিনি তাঁহার স্ত্রীর নিকটও গোপন করিয়া যাইবেন ; কিন্তু বুদ্ধিমতী মহিলা প্রথম হইতেই সন্দেহ করিয়াছিলেন যে, তাঁহার স্বামী তাঁহার নিকট গোপন করিয়া দুটি অপরিচিত পুরুষকে গৃহে আশ্রয় দিয়াছেন। ইহাতে স্ত্রী-স্বলভ অভিমানে তাঁহার সমস্ত হৃদয় পরিপূর্ণ হইয়া উঠিল এবং তিনি তাঁহাদের পরিচয় জানিবার জন্য পীড়াপীড়ি করিতে লাগিলেন। সুতরাং স্ত্রীর পীড়াপীড়িতে অগত্যা উত্তমচাঁদকে প্রকৃত ঘটনা খুলিয়া বলিতে হইল।

সুভাষচন্দ্রের নাম ও দেশপ্রেমের পরিচয় উক্ত মহিলার অজ্ঞাত ছিল না। তিনি সেই মুহূর্ত্ত হইতে শ্রদ্ধাযুক্ত হৃদয়ে স্বামীর এই মহৎ কাজে তাঁহাকে সাহায্যই করিতে লাগিলেন। সত্য বলিতে কি, উক্ত মহিলার সাহায্য না পাইলে, সুভাষচন্দ্রের গোপনে অবস্থিতি তৎকালে অসম্ভব হইয়া পড়িত !

এই মহাপুরুষকে আত্মগোপনের সম্পূর্ণ সুযোগ দান সম্পর্কে বুদ্ধিমতী মহিলা এত বেশী সতর্ক ছিলেন যে, সুভাষচন্দ্রের কখনও কাশি উঠিলেও পাছে অপর কেহ তাহা শুনিতে পায় এই আশঙ্কায়, তিনি অন্য কোন গোলমালের সৃষ্টি করিয়া অপরকে বিভ্রান্ত করিবার প্রয়াস পাইয়াছেন !

কাবুলে অবস্থানকালে সুভাষচন্দ্রের অনুরোধে ভগৎরাম প্রথমে রাশিয়ার দূতের সঙ্গে কথাবার্তা চালাইবার চেষ্টা করেন। কারণ, সুভাষচন্দ্রের অভিপ্রায় ছিল, তিনি মস্কো

গমন করিবেন। কিন্তু বহু চেষ্টায়ও তাহাতে বিশেষ কোন ফলোদয় হইল না। মস্কোএর দূতকে যেন এ বিষয়ে অনেকটা উদাসীন দেখা গেল !

অবশেষে ইটালীয় রাজদূতকেও সমস্ত ব্যাপার জানানো হইল এবং তাঁহাদের দেশে যাইবার জন্য পাসপোর্ট বা অনুমতি প্রার্থনা করা হইল। ইটালীর রাজদূত মীনর ক্যারনী ও তাঁহার পত্নী মীনরা ক্যারনী, এ বিষয়ে সুভাষচন্দ্রকে ব্যক্তিগত ভাবেও যে শ্রদ্ধা ও সম্মান দেখাইয়াছেন, এবং রোম হইতে তাঁহার পাসপোর্ট মঞ্জুর করাইবার জন্য যে অসাধারণ পরিশ্রম করিয়াছিলেন, তাহা সত্যই অতুলনীয়।

কিন্তু সুদীর্ঘকাল চেষ্টার ফলেও যখন পাসপোর্ট মঞ্জুর হইয়া আসিল না, তখন সুভাষচন্দ্র অস্থির হইয়া পড়িলেন; তাঁহার আশ্রয়দাতা উত্তমচাঁদও তখন অল্প পন্থা চিন্তা করিতে লাগিলেন।

উত্তমচাঁদ সীমান্ত-প্রদেশের অধিবাসী এমন এক ব্যক্তিকে জানিতেন, যে অর্পের জন্য পারদ্রিত না এমন কোন অসাধ্য কর্মই ছিল না। অঞ্চল লোকটিকে তিনি বিখ্যাত বলিয়াই মনে করিতেন। তিনি ভাবিলেন, ঐ লোকটির সাহায্যে কি বোস্ বাবুকে রাশিয়ায় পাঠানো চলে না ?

সে নাকি বহুবার পাসপোর্ট ব্যতীতই রাশিয়ায় গিয়াছে। আফগানিস্থান পার হইয়া কিছুদূর অতিক্রম করিলে 'হাজ্জো' নামে এক নদী আছে। সেই নদীর অপর তীরেই রাশিয়ার সীমান্ত।

উত্তমচাঁদ তাঁহার সহিত ধীরে-ধীরে আলাপ করিলেন, অবশেষে কাজের কথা আরম্ভ হইল।

সে লোকটি বলিল যে, পাসপোর্ট ছাড়াও রাশিয়ায় প্রবেশ করা যায়, তাহা এতদ্বারাই কন্ট্রল নহে। যাহারা সেই ভাবে প্রবেশ করে, তাহারা নৌকায় বা নেতু পার হইয়া যাইবার চেষ্টা করে না। তাহারা নদী পার হইবার জন্য ভিত্তিওয়ালার মশক ব্যবহার করিয়া থাকে।

মশকগুলি বায়ুপূর্ণ করিয়া ফুলাইয়া, তাহার উপরে জেলেদের একখানি জাল বিছাইয়া দেওয়া হয়। যাত্রীরা তখন তাহাতে বসিয়া সচ্ছন্দে নদী পার হইতে পারে। সুভাষচন্দ্র ও রহমৎ খাঁ কাবুল-নদীও এইভাবে পার হইয়াছিলেন।

আর কোন উপায় না দেখিয়া উত্তমচাঁদ অগত্যা এই পন্থাই স্থির করিয়া রাখিলেন। সুভাষচন্দ্রও তখন রাশিয়ায় যাইবার জন্য এত বেশী আগ্রহান্বিত যে, আইনের পন্থায় কি বে-আইনী পন্থায়, তাহা তিনি বিচার করিতে চাহিলেন না। রাশিয়ায় পৌঁছিয়া যদি রাশিয়ার কারাগারেও তাঁহাকে অতিবাহিত করিতে হয়, তিনি তখন তাহাতেও সম্মত। তথাপি আফগানিস্তান পরিত্যাগ করিয়া, রাশিয়ায় যাওয়াই তাঁহার একমাত্র কাম্য হইল। সুতরাং এইভাবে নদীপার হইয়া, বিপজ্জনক পন্থায় যাইতেও তাঁহার আপত্তি হইল না। কেবল ভাবিলেন, তাঁহার সেই 'চালক' লোকটি নির্ভরযোগ্য হইবে কি না!

সেই লোকটির সঙ্গে উত্তমচাঁদ দর-কষাকষি করিলেন, তাহার পারিশ্রমিক নির্ধারণ করিলেন, কিছু অগ্রিমও প্রদান করিলেন; কিন্তু তথাপি আরও নানাভাবে

ব্যাপারটিকে চিন্তা করিবার জন্য তখনও কোন দিনস্থির করা হইল না।

এমনই সময়ে একদিন—১৫ই মার্চ, সীমর ক্যারগীর পত্নী আমিয়া সুভাষচন্দ্রকে একখানি পত্র প্রদান করিলেন।

পত্রে ছিল সুভাষচন্দ্রের বহু-আকাঙ্ক্ষিত সুসংবাদ : অক্ষশক্তির অন্তর্গত ইটালী ও জার্মানী—তঁহার পাসপোর্ট মঞ্জুর করিয়াছেন।

১৮ই মার্চ প্রাতে ৯টার সময় তিনি অক্ষশক্তির সাহায্যে আফগানিস্থান হইতে যাত্রা করিলেন। একজন ইতালীয় ও দুই জন জার্মান—উন্মত্তে একজন অতি তীক্ষ্ণদী ডাঃ ওয়েলার—তঁহার সহযাত্রী হইলেন। পাসপোর্টে সুভাষচন্দ্রের নাম লিখিত হইল 'ক্যারাটাইন্' !

এইভাবে বাংলার, তথা সমগ্র ভারতের সুভাষচন্দ্র, ছদ্মবেশা জিয়াউদ্দিন ও পরবর্তী যাত্রাপথে ক্যারাটাইন্, স্বাধীনতার নেশায় উন্মত্ত হইয়া, স্বদেশ হইতে সূদূরে বিদেশের পথে সাময়িক ভাবে অন্তর্হিত হইলেন।

তঁাহারা প্রথমে একখানি মোটরে চড়িয়া কাবুল হইতে রাশিয়ার সীমান্ত-পথে যাত্রা করেন। রাত্রিটা মধ্যপথে 'পুল খুমডী' নামক স্থানে সকলেই বিশ্রাম করিলেন এবং পরদিন, ১৯শে মার্চ, তঁাহারা রাশিয়ায় প্রবেশ করিলেন।

২০শে মার্চ সুভাষচন্দ্র ট্রেনে গমন করিলেন মস্কো। ২৭শে মার্চ তিনি মস্কো উপস্থিত হইলেন বটে, কিন্তু মাত্র একটি রাত্রির বেশী তিনি সেখানে কাটাইতে পারিলেন না।

সেখান হইতে রওয়ানা হইয়া ২৮শে মার্চ তিনি জার্মানীর রাজধানী বার্লিণে উপনীত হইলেন । \*

সুভাষচন্দ্র কাবুল পরিত্যাগ করিয়া চলিয়া যাইবার মাত্র কয়েক দিন পরেই পুলিশ-বিভাগ জানিতে পারে যে, দুইজন ভারতীয় ( সুভাষচন্দ্র ও ভগৎরাম ) কাবুলে কোন হিন্দুর গৃহে আশ্রয় লইয়াছেন । সুতরাং তখন জোর পুলিশের অনুসন্ধান আৰম্ভ হইল, উভয়টাদের নিকটও অনুসন্ধান করা হইল ।

উভয়টাদকে শুধু প্রশ্ন করিয়াই পুলিশ-বিভাগ ক্ষান্ত রহে নাই ! সুভাষচন্দ্রকে আশ্রয়দান ও তাঁহাকে বিদেশ-গমনে সাহায্য করিবার অপরাধে তিনি দীর্ঘকাল কারাদণ্ড ভোগ করিয়াছেন এবং পুলিশ তাঁহার লক্ষ্যধিক টাকার সম্পত্তি ক্রোক ও নিলাম-বিক্রয় করিয়া তাঁহাকে সর্বস্বান্ত করিয়া দিয়াছে । বস্তুতঃ এই মহাপুরুষের সাহায্য না পাইলে, সুভাষচন্দ্রের যাবতীয় উত্তম সম্ভবতঃ অন্ধুরেই বিনষ্ট হইয়া যাইত !

সুভাষচন্দ্র বার্লিণে পৌঁছিয়া প্রায় মাস-তিনেক পরে হাজি সাহেবের জার্মান পত্রীর নিকট যে পত্র লিখিয়াছিলেন, তাহাতে এই মহাপুরুষের নিকট তাঁহার প্রাণের গভীর কৃতজ্ঞতা জানাইয়া লিখিয়াছিলেন,—

উত্তমটাদ নমস্ते ! আপনি যাহা করিয়াছেন, সেজন্য আমি কৃতজ্ঞ । সারাজীবনেও আমি তাহা কখনও ভুলিতে পারিব না ।

জিয়াউদ্দিন ।

\* পাঠকদের স্মরণ থাকিতে পারে, ইহার মাত্র মাস-কয়েক পরেই—১৯৪১ সালের ২২শে জুন তারিখে রাশিয়া ও জার্মানীর মধ্যে যুদ্ধ বাধিয়া উঠিয়াছিল ।

সাত

## আজাদ-হিন্দ ফৌজ ও আজাদ-হিন্দ গভর্নমেন্ট

১৯৪২ সালে প্রাচ্যের পরিস্থিতি—সিঙ্গাপুরের পতন—ভারতীয়  
সৈন্যগণকে জাপ-হস্তে সমর্পণ—জাপানের উদ্দেশ্যমূলক উদারতা  
—মোহন সিংএর নেতৃত্ব—আজাদ-হিন্দ-ফৌজ ও আজাদ-হিন্দ  
সভ্য গঠন—জাপ গভর্নমেন্টের সহিত সজ্বর্ষ—সুভাষচন্দ্রের  
আগমন—সভাপতি রাধাবিহারীর পদত্যাগ—‘নেতাজী’  
সুভাষচন্দ্র—আজাদ-হিন্দ গভর্নমেন্টের কর্ম-পরিষদ—নারী  
বাহিনী—আত্মঘাতী বাল-সেনা—আজাদ-হিন্দ ব্যাঙ্ক প্রতিষ্ঠা  
—ইক্ষল-অবরোধ—জাপ-গভর্নমেন্টের পতন—আজাদ-হিন্দ  
গভর্নমেন্টের বিলোপ—আজাদ-হিন্দ ফৌজের বিচার।

সুভাষচন্দ্র যখন ভারতবর্ষ হইতে পলায়ন করিয়া, অনশেষে  
বার্লিনে পৌঁছিয়া সেখানে অবস্থান করিতেছিলেন, প্রাচ্য  
ভূখণ্ডে এমিয়া মহাদেশে তখন ক্রমশঃ এক বিপুল পরিবর্তন  
সাধিত হইতেছিল। শেষকালে এমন অবস্থা হইল যে,  
ইংরেজের সুপ্রতিষ্ঠিত সিংহাসন এমিয়া মহাদেশে টলটলায়মান  
হইয়া উঠিল।

১৯৪২ সালের প্রথম ভাগে ব্রিটিশ-শক্তি বিজয়ী  
জাপানীদের নিকট পরাভূত হইয়া দক্ষিণ-পূর্ব এমিয়া হইতে  
সরিয়া আসিতেই বাধা হইল।

১৫ই ফেব্রুয়ারী তারিখে ব্রিটিশ নৌ-ঘাঁটির অন্যতম কেন্দ্র  
সিঙ্গাপুরের পতন হয়। ব্রিটিশ সৈন্যগণ পূর্ববাহুেই পলায়ন

করে। তাহাদের পলায়নের জন্য সকল প্রকার ব্যবস্থা পূর্বেই করা হইয়াছিল; কিন্তু ভারতীয় সৈন্যগণকে কিছু না জানাইয়া তাহাদিগকে অনিশ্চিত ভাগ্যের উপর ফেলিয়া রাখা হয়। ইহার ফলে সিঙ্গাপুরের সমস্ত ভারতীয় সৈন্য বিনা যুদ্ধে আত্মসমর্পণ করে।

সিঙ্গাপুরের পতনের সঙ্গে-সঙ্গেই—১৬ই ফেব্রুয়ারী তারিখে সন্ধ্যাবেলা সমগ্র ভারতীয় বাহিনীর মধ্য হইতে ব্রিটিশ অফিসারদিগকে পৃথক করা হইল এবং ব্রিটিশ কমান্ডিং অফিসার স্বদেশীয় সৈন্যদিগকে নিরাপদে অন্যত্র পাঠাইবার জন্য ব্যস্ত হইয়া পড়িলেন; কিন্তু হতভাগ্য ভারতীয় অফিসার ও সৈন্যদিগকে ১৭ই তারিখে প্রাতঃকালে ফেরার পার্কের দিকে মার্চ করিয়া লইয়া যাওয়া হইল।

লেঃ কর্নেল হান্ট সেখানে হতভাগ্য ভারতীয় সৈন্যদিগকে জাপ-গভর্নমেন্টের প্রতিনিধি মেজর ফুজিয়ারার হস্তে সমর্পণ করিয়া তাহাদিগকে চূড়ান্তভাবে বলিয়া দিলেন, “তোমরা এতদিন আমাদেরকে যেভাবে মানিয়াছ, এখন হইতে জাপ-কর্তৃপক্ষকে সেরূপ মান্য করিয়া চলিও।”

তৎকালীন অবস্থা বর্ণনা-প্রসঙ্গে ক্যাপ্টেন সাইগল বিচার-কালে তাঁহার জবানবন্দীতে বলিয়াছিলেন, “ব্রিটিশের পক্ষ হইতে লেঃ কর্নেল হান্ট ভারতীয় অফিসার ও সৈন্যদিগকে একদল ভেড়ার মতই জাপদের হাতে সঁপিয়া দিলেন!”

মেজর ফুজিয়ারা অসহায় যুদ্ধবন্দী ভারতীয় সৈন্যদের মানসিক অবস্থা স্পষ্টভাবে উপলব্ধি করিতে পারিলেন।



তিনি তাহাদের ব্রিটিশ-বিরোধী মনোভাবের পূর্ণ স্বেচ্ছা গ্রহণ করিবার উদ্দেশ্যে ভারতীয় বাহিনীকে সম্বোধন করিয়া বলেন, “জাপান পূর্ব-এসিয়ার সমস্ত জাতিকে স্বাধীন ও মুক্ত দেখিবার অভিলাষী ; কিন্তু ভারতের স্বাধীনতা ব্যতীত সুদূর প্রাচ্যের পরিস্থিতি কখনও ভাল হইতে পারে না। সুতরাং ভারতের উক্ত উদ্দেশ্য সাধনের জন্ত জাপ-সরকার সকল রকম সাহায্য ও সহযোগিতা করিতে প্রস্তুত। কাজেই আমি আপনাদিগকে যুদ্ধবন্দীরূপে দেখিতে চাহি না। আমাদের পক্ষ হইতে বলিতে পারি, আপনারা স্বাধীন। আমি ক্যাপ্টেন মোহন সিংএর হস্তে আপনাদিগকে সমর্পণ করিতেছি।”

ক্যাপ্টেন মোহন সিং তখন তাহার সেনা-বাহিনীকে সম্বোধন করিয়া বলেন, “বর্তমানে ভারতের স্বাধীনতা অর্জনের জন্ত ভারতীয়দের যুদ্ধ করিবার স্বেচ্ছা আসিয়াছে।”

মেজর ফুজিয়ারার উদ্দেশ্য ছিল, জাপানের তাঁবেদার হিসাবে একটি ভারতীয় সমিতি খাড়া করিতে হইবে ; কিন্তু ভারতীয়গণ মেজর ফুজিয়ারাকে কোনরূপে এড়াইবার জন্ত বলেন যে, এ বিষয়ে তাঁহারা আরও গভীর ভাবে চিন্তা করিবেন এবং প্রয়োজন হইলে মেজর ফুজিয়ারার সহিত সাক্ষাৎ করিবেন।

ইহার পর ৯ই এবং ১০ই মার্চ, ১৯৪২ সালে মালয়ের বিভিন্ন স্থান হইতে আগত ভারতীয় নেতৃবৃন্দ সিঙ্গাপুরে একটি সভা করেন। সিঙ্গাপুরের সভায় স্থির হয় যে, টোকিওতে একটি শুভেচ্ছা দল-পাঠান হইবে।

ইহার পর রাসবিহারী বসুর সভাপতিত্বে টোকিওতে একটি সম্মেলন হয়। এই সম্মেলনে উল্লিখিত শুভেচ্ছা-দলের প্রতিনিধিবৃন্দ ছাড়াও হংকং, সাংহাই ও জাপান-প্রবাসী ভারতীয় প্রতিনিধিবৃন্দ উপস্থিত ছিলেন।

এই সম্মেলনে প্রস্তাব গৃহীত হয় যে, পূর্ব-এসিয়া-প্রবাসী ভারতীয়গণের পক্ষে স্বাধীনতা-আন্দোলন আরম্ভ করিবার ইহাই প্রকৃষ্ট সময় ; এই স্বাধীনতা হইবে পূর্ণ স্বাধীনতা এবং সকল প্রকার নৈদেশিক শাসন ও নিয়ন্ত্রণ হইতে সম্পূর্ণ মুক্ত ; ভারতের বিরুদ্ধে সামরিক অভিযান এবং ক্রিয়া-কলাপের অধিকারী হইতে পারিবে একমাত্র ভারতীয়গণের নেতৃত্বে এবং ভারতীয় স্বার্থে চালিত 'স্বাধীন ভারত-বাহিনী' বা 'আজাদ-হিন্দ ফৌজ' ; সকল ক্ষমতা আজাদ-হিন্দ সঙ্ঘ পরিচালিত করিবে ; আজাদ-হিন্দ সঙ্ঘের একটি কর্ম-পরিষদ থাকিবে ; এই কর্ম-পরিষদ সামরিক প্রয়োজনে জাপানের নিকট হইতে নৌবল, বিমানবল প্রভৃতি চাহিতে পারেন, ইত্যাদি।

এই সম্মেলন আরও একটি উল্লেখযোগ্য প্রস্তাব করেন যে, ভারতের ভবিষ্যৎ শাসন-তন্ত্র রচনা করিবার অধিকার ভারত-ভূমিতে স্বয়ং ভারতীয় নেতৃবৃন্দের উপরই বর্তিবে ; ভারতের জাতীয় কংগ্রেসই এই অধিকারের মালিক।

১৯৪২ সালের ১৫ই ইইতে ২৩শে জুন পর্য্যন্ত ব্যাঙ্ককে একটি প্রতিনিধি-সম্মেলন বসে। জাপান, মাঞ্চুকুও, হংকং, বোর্নিও, জাভা, মালয় ও শ্যাম হইতে ১০০ জন প্রতিনিধি

সমবেত হন। ভারতীয় বাহিনী হইতেও প্রতিনিধি আসেন। ইহার সকলেই যুদ্ধবন্দী ছিলেন। এই সম্মেলনে আজাদ-হিন্দ আন্দোলনের মূলনীতি নির্ধারিত হয়—

(১) ভারতবর্ষের স্বাধীনতার জন্ত পূর্ব-এসিয়ার প্রবাসী ভারতীয়-গণকে লইয়া একটি আজাদ-হিন্দ সঙ্ঘ গঠন করিতে হইবে।

(২) আজাদ-হিন্দ সঙ্ঘের আদর্শ, কার্যক্রম ও সকল প্রকার পরিকল্পনা ভারতের জাতীয় কংগ্রেসের আদর্শ, কার্যক্রম ও উহার পরিকল্পনা অনুযায়ী অনুমত হইবে। ভারতের জাতীয় কংগ্রেসের নেতৃত্ব মানিয়া চলিবে হইবে; কংগ্রেসের আন্দোলনের সহিত যোগ-সূত্র স্থাপন করিতে হইবে।

(৩) পূর্ব এসিয়ার ভারতীয় বাহিনী হইতে এবং ভারতীয় বেসামরিক জনসাধারণের মধ্য হইতে সৈন্য সংগ্রহ করিয়া একটি আজাদ-হিন্দ ফৌজ গঠন করিতে হইবে।

(৪) ভারতবর্ষের প্রতি এবং নবগঠিত আজাদ-হিন্দ সঙ্ঘের প্রতি জাপানীদের নীতি কি, তাহা স্পষ্টভাবে ঘোষণা করার জন্ত জাপানী কর্তৃপক্ষের নিকট দাবী জানাইতে হইবে।

এইরূপে ব্যাপক-সম্মেলন হইতে গণতান্ত্রিক প্রতিনিধিদের ভিত্তিতে আজাদ-হিন্দ সঙ্ঘ গঠিত হইল। ইহার সভাপতি হইলেন শ্রীরামবিহারী বসু। সিঙ্গাপুরে উক্ত সঙ্ঘের প্রধান কার্যস্থল হইল এবং পূর্ব-এসিয়ার প্রত্যেক দেশে ইহার শাখা-সঙ্ঘ স্থাপিত হইল। এই সময় গান্ধীজির নেতৃত্বে কংগ্রেস ১৯৪২ সালে ৮ই আগস্ট 'ভারত ত্যাগ কর' প্রস্তাব গ্রহণ করিলেন। সমগ্র ভারতবর্ষ দুইটি মন্ত্রে দীক্ষিত হইল—  
“করেঙ্গে ওর মরেঙ্গে।”

ভারতব্যাপী দাবানল জ্বলিয়া উঠিল, ভারতবর্ষের সমস্ত কংগ্রেস-নেতাকে তড়িৎ আক্রমণ হানিয়া ব্রিটিশ শক্তি কারারুদ্ধ করিল ; সহস্র-সহস্র কংগ্রেসকর্মী ও জনগণ ব্রিটিশের গুলিতে প্রাণ বিসর্জন দিতে লাগিলেন ; ব্রিটিশ বিমান হইতে নোমাবর্ষণ করিয়া গ্রাম, নগর ধ্বংস করিতে লাগিল ।

এই সকল সংবাদে পূর্ব-এসিয়ার সর্বত্র অভূতপূর্ব চাঞ্চল্য এবং অদম্য ক্রোধসাহ চূড়ান্ত সীমায় ঠেলিয়া উঠিল । এই চাঞ্চল্যকর পরিস্থিতিতে এইবার সর্বপ্রথম ক্যাপ্টেন মোহন সিংএর অধিনায়কত্বে আজাদ-হিন্দ ফোর্সের গঠন-কার্য আরম্ভ হইল । মালয়ে যে সকল ভারতীয় সৈন্য আত্মসমর্পণ করিয়াছিল, তাহাদের লইয়াই বাহিনী গঠনের প্রাথমিক কর্মসূচী অনুসৃত হইতে লাগিল ; মালয়-প্রবাসী ভারতীয়গণের নিকট আবেদন জানাইলে আশাতিরিক্ত সাড়া পাওয়া যাইতে লাগিল ।

ভারতীয়গণের এই স্বাধীন প্রচেষ্টা জাপান কিছুতেই প্রীতির চক্ষে দেখিতে পারে নাই । ইহাতে বরং সাম্রাজ্যবাদী জাপানের মনেও আতঙ্ক এবং ভীতির সঞ্চার হইয়াছিল । সুতরাং জাপানী কর্তৃপক্ষের সহিত আজাদ-হিন্দ ফোর্সের কর্ম-পরিষদের সঙ্ঘর্ষ বাধিয়া উঠিল । প্রধানতঃ দুইটি কারণে তিক্ততা চরম হইয়া পড়িল—

(১) কর্ম-পরিষদ দাবী জানাইয়াছিলেন যে, ভারতবর্ষ, পূর্ব-এসিয়া এবং আজাদ-হিন্দ সঙ্ঘের প্রতি জাপানের নীতি কি, ইহা জাপান অবিলম্বে ঘোষণা করুক ।

জাপান উত্তরে কতকগুলি মামুলী জবাব জানাইয়াছিল ; কিন্তু কন্স-পরিষদ জাপানী গভর্নমেন্টের ঐ মামুলী জবাব সম্ভোষণক বলিয়া গণ্য করিতে পারেন নাই ।

(২) সম্পূর্ণভাবে জাপানীগণ-কর্তৃক পরিচালিত 'ইয়াকুরো-কিকান' নামক 'লায়াসন' ডিপার্টমেন্টের অফিসারগণ আজাদ-হিন্দ ফৌজের কাব্য-কলাপে হস্তক্ষেপ করিতে আসিতেন, সুতরাং ১৯৪২ সালের ডিসেম্বর মাসেই চরম সঙ্কট ঘনাইয়া উঠিল । মালয়ে গঠিত আজাদ-হিন্দ ফৌজকে জাপানী সমর-কর্তাদের আদেশ অনুসারে বাধ্যয় স্থানান্তরিত করিতে কন্স-পরিষদ অসীকার করিল ; জাপানীদের অন্যান্য অনেক দাবীও দরাসরি অগ্রাহ্য করা হইল ।

কন্স-পরিষদকে না জানাইয়া জাপানীরা ৮ই ডিসেম্বর আজাদ-হিন্দ ফৌজের কর্নেল এন. এস. গিলকে গ্রেপ্তার করিলে অবস্থা চরমে গিয়া পৌঁছে ।

এই সম্পর্কে জেনারেল য়োহন সিং নিজে বলিয়াছেন : একদিন রাত্রে কয়েকজন জাপ সামরিক কন্সচারী তাঁহার নিকট আসেন এবং কর্নেল নিরঞ্জন সিংহ গিলকে গ্রেপ্তার করিতে চাহেন ; কিন্তু তিনি তাঁহাকে তাহাদের নিকট সমর্পণ করিতে অসম্মত হন । তিনি বলেন, তাঁহার কোন অফিসার কোন অপরাধ করিলে তিনি সামরিক আদালতে তাঁহার বিচার করিবেন, কিন্তু তাঁহাকে তাহাদের নিকট সমর্পণ করিবেন না । ইহাতে জাপ সামরিক কর্তৃপক্ষ বিরক্ত হন

এই সময় মালয়-শাখাও প্রস্তাব করেন যে, শ্রীরামবিহারী বসুকে এতদ্বারা অনুরোধ করা যাইতেছে যে, তিনি প্রধান-প্রধান বিষয়ে টোকিও-গভর্নমেন্টের মতামত ও নীতি কি, তাহা জানিতে সম্ভাব্য চেষ্টা করুন, এবং টোকিও-গভর্নমেন্টে ঘোষণা, বিরূতি বা অন্য যে-কোন উপায়ে তাহা যত শীঘ্র সম্ভব প্রকাশ করুক। ইতিমধ্যে সঙ্ঘের কাজ পূর্নবর মতই চলিতে থাকিবে, কিন্তু টোকিও-গভর্নমেন্টের ঘোষণা বা বিরূতির পরই নূতনভাবে অগ্রসর হওয়া যাইবে।

এই যখন অসম্মা, তখন ইয়াকুরো-কিকান আজাদ-হিন্দ সঙ্ঘকে হীনবল করিবার জন্য একটি প্রতিদ্বন্দ্বী দল গঠন করিল। উহার অফিসারগণ আজাদ-হিন্দ সঙ্ঘের বিরুদ্ধে গুপ্ত যুব-আন্দোলন গঠন করিতে লাগিলেন এবং নিজেরাও তাঁবেদার অনুচর হইয়া আজাদ-হিন্দ সঙ্ঘের বিরুদ্ধে বাপক-ভাবে প্রচার কার্য এবং মিথ্যা রটনা শুরু করিলেন।

১৯৪৩ জালের ফেব্রুয়ারী মাসে মালয়-শাখা-কমিটি তিন দিন মিটিং ও আলোচনার পর শ্রীরামবিহারীর নিকট একটি স্মারক-লিপি পাঠাইতে মনস্থ করেন; এই স্মারক-লিপি যথাস্থানে পৌঁছিবার পূর্বেই জাপানীরা গোপনে তাহা হস্তগত করিয়া লয়। তাহার মালয়-শাখার সভাপতি শ্রী এন্. রাঘবনকে পদত্যাগ করিতে বাধ্য করার জন্য শ্রীযুত রামবিহারী বসুর উপর চাপ দিতে লাগিল। ফলে শ্রীরাঘবন পদত্যাগ করেন।

উক্ত শাখার অন্যান্য সভ্যগণ বুঝিলেন যে, পদত্যাগই

জাপানীদের কাষা ; কেননা, তাহা হইলে জাপানের তাঁবেদারগণকে লইয়া সঙ্ঘ পুনর্গঠিত করা যাইবে, আর ইহাতে আজাদ-হিন্দ সঙ্ঘ সম্পূর্ণভাবে জাপানীদের 'পুত্রলিকা' হইবে। এই সকল বিবেচনা করিয়া আর কোন সভাই পদত্যাগ করিলেন না।

এরূপ শোনা যায় যে, শ্রীরাসবিহারী বসুর কার্যকলাপ এবং নেতৃত্বে যোগ্যতার অভাব ঘটিয়াছে, এরূপ ধারণা ভারতীয়গণের মনে বদ্ধমূল হইয়াছিল। উৎসাহের অভাবও পরিলক্ষিত হইতেছিল। ১৯৪৫ সালের এপ্রিল মাসে সিঙ্গাপুরে আর একটি প্রতিনিধি-সম্মেলন হয়। ইহাতে পূর্ব-এসিয়ার সমস্ত দেশের ভারতীয় প্রতিনিধিবৃন্দ উপস্থিত ছিলেন। এখানে কার্যকলাপের কঠোর সমালোচনা করা হয়। এই সভায় শ্রীরাসবিহারী বসু জানান যে, শ্রীসুভাষচন্দ্র বসু আসিতেছেন এবং আন্দোলনের গুরু দায়িত্ব-ভার তাঁহার গায় একজন যোগ্যতম জননেতার উপর অর্পিত হইলে তিনি পদত্যাগ করিতে সম্মত আছেন।

১৯৪৩ সালের ২০শে জুন শ্রীযুক্ত হাসান নামক এক মুসলমান যুবকের সঙ্গে সুভাষচন্দ্র সাবমেরিণ যোগে জাপানে উপস্থিত হন। ২রা জুলাই তারিখে তিনি সিঙ্গাপুরে পৌঁছেন এবং ৪ঠা জুলাই আহৃত এক প্রতিনিধি-সম্মেলনে সর্ব-সম্মতিক্রমে আজাদ-হিন্দ সঙ্ঘের 'নেতাজী' অর্থাৎ সভাপতি নির্বাচিত হন এবং সকল আন্দোলনের দায়িত্ব গ্রহণ করেন। শ্রীরাসবিহারী পদত্যাগ করেন।

বাংলার তথা ভারতের একজন জনপ্রিয় কংগ্রেস-নেতাকে লাভ করিয়া আজাদ-হিন্দ সঙ্ঘ এবং তদীয় বাহিনী নবপ্রাণ-সঞ্চারে চঞ্চল হইয়া উঠিল। এই জুলাই সিন্ধাপুরে আজাদ-হিন্দ ফৌজের কার্য-বিবরণী গৃহীত হয় এবং ঐ তারিখে উক্ত বাহিনীর গঠন-সংবাদ প্রকাশ্যভাবে জগতে ঘোষণা করা হইল। উক্ত বিরাট জনসঙ্ঘকে সম্বোধন করিয়া সুভাষচন্দ্র সেদিন বলিয়াছিলেন—

“ভারতের স্বাধীনতার সেনাদল! আজ আমার জীবনের সবচেয়ে গর্বের দিন। আজ ঈশ্বর আমাকে এই কথা ঘোষণা করার অপূর্ব সুযোগ এবং সম্মান দিয়েছেন যে, ভারতকে স্বাধীন করার জন্য সেনাদল গঠিত হয়েছে।

হে আমার সতীর্থগণ, সেনাদল! তোমাদের রণধ্বনি হোক—‘দিল্লী চলো, দিল্লী চলো!’ প্রাচীন দিল্লীর লাল কেল্লায় বিজয়োৎসব সম্পন্ন না করা পর্যন্ত আমাদের কর্তব্য শেষ হবে না। মনে রেখো যে তোমাদের মধ্য থেকেই স্বাধীন-ভারতের ভাবী সেনানায়ক-দল গড়ে উঠবে।

আজ আমার জীবনের সবচেয়ে বেশী গর্বের দিন—একথা আমি বলেছি। পরাধীন জাতির পক্ষে স্বাধীনতা-সংগ্রামের সৈনিক হওয়ার চেয়ে বড় সম্মান এবং গৌরবের বিষয় অন্য কিছুই নাই। কিন্তু এই সম্মানের সঙ্গে সমপরিমাণ দায়িত্বও রয়েছে এবং সে দায়িত্ব সম্বন্ধে আমি সম্পূর্ণ সচেতন।

আমি দৃঢ়তার সঙ্গে ঘোষণা করছি—আলোকে এবং অন্ধকারে, দুঃখে এবং সুখে, পরাজয়ে এবং বিজয়ে আমি



সর্বদা তোমাদের পাশে-পাশে থাকব ; বর্তমানে তোমাদের আমি ক্ষুধা-তৃষ্ণা, দুঃখ-কষ্ট, দুর্গম অভিযান এবং মৃত্যু ছাড়া অন্য কিছু দিতে অসমর্থ ।”

সুভাষচন্দ্রের নেতৃত্ব গ্রহণের পর হইতে ঘটনাবলী দ্রুত অগ্রসর হইতে থাকে। নারীগণও দলে-দলে আজাদ-হিন্দ সঙ্ঘের সভ্য হইতে থাকে। লাহাদের যথা হইতে স্বেচ্ছা-সেবিকা বাছাই করিয়া শ্রীমতী লক্ষ্মীর নেতৃত্বে ‘রাণী অফ্‌ বাঙ্গা রেজিমেন্ট’ গঠিত হইল। অনেক মহিলা রেড-ক্রসের সভ্য হইলেন। ১৯৪৩ সালের অক্টোবরে সিঙ্গাপুরে এবং পরে রেঙ্গুণেও নারীদিগকে সামরিক শিক্ষায় শিক্ষিত করিবার জন্য দুইটি সামরিক শিক্ষা-নিষ্ঠালয় স্থাপিত হইল।

সুভাষচন্দ্র বাঙ্গার রাণী-বাহিনীর প্রতিষ্ঠা করেন ১৯৪৩ সালের ২২শে অক্টোবর। ২২শে অক্টোবর ভারতের ইতিহাসে এক স্মরণীয় দিবস। কারণ ১৮৫৭ সালে, প্রথম যে স্বাধীনতা-সংগ্রাম সিপাহী-যুদ্ধ হইয়াছিল, ভারত অধিনায়িকা বাঙ্গার রাণী লক্ষ্মীবাইএর জন্ম-জারিখ হিগ ২২শে অক্টোবর। সুভাষচন্দ্র সেই জন্ম-জারিখ হিগ ২২শে অক্টোবর প্রতিষ্ঠা-দিবসও ২২শে অক্টোবর বাছিয়া লইয়াছিলেন।

সুভাষচন্দ্র সোদিন বলিয়াছিলেন, “বাঙ্গার রাণী-বাহিনীর শিক্ষাকেন্দ্রের উদ্বোধন বিশেষ তাৎপর্যপূর্ণ ঘটনা। পূর্ব-এশিয়ায় আমাদের আন্দোলনের অগ্রগতির পথে ইহা একটি স্মরণীয় কাহিনী। ইহার গুরুত্ব উপলব্ধি করিতে হইলে আমাদের একথা স্মরণ রাখিতে হইবে যে,



উপরে ( বাঁয়ে ) : মেজর ছেনারেল শাহ নওয়াজ খান। ( ডাইনে ) : ক্যাপ্টেন  
ডাঃ লক্ষী স্বামিনাথন। মাঝখানে : সুভাষচন্দ্র ও আত্মা হিন্দের অফিসারগণ  
সৈন্য পরিদর্শন করিতেছেন। নীচে ( বাঁয়ে ) : ক্যাপ্টেন গুরুবক্স ধীলন।  
( ডাইনে ) : ক্যাপ্টেন প্রেমকুমার সাইগল।



আমাদের আন্দোলন শুধু রাজনৈতিক আন্দোলন নয়, আমরা আমাদের দেশের পুনর্জীবনের মহান কাজে অবতীর্ণ হইয়াছি। আমরা ভারতের জন্য এক নবযুগ আনয়ন করিতেছি। কাজেই আমাদের নূতন জীবনের ভিত্তি হইবে সুদৃঢ়। স্মরণ রাখুন যে, ইহা চক্কা-নিবাদ নয়, আমরা ভারতের পুনর্জীবন আসন্ন দেখিতেছি। এই নবজাগরণ ভারতের নারীদের মনোও স্বাভাবিক।

আজ যে শিক্ষা-শিবিরের উদ্বোধন করা হইতেছে, তাহাতে আমাদের ১৫৬ জন ভগ্নী শিক্ষালাভ করিতেছেন। আমি আশা করি, শোনানে (অর্থাৎ সিঙ্গাপুরে) তাহাদের সংখ্যা শীঘ্রই এক হাজার হইবে। থাইল্যান্ড এবং ব্রহ্মদেশেও নারী-শিক্ষা-শিবির স্থাপিত হইয়াছে; কিন্তু শোনানে হইতেছে কেন্দ্রীয় শিবির! আমার বিশ্বাস, এই কেন্দ্রীয় শিবিরে এক হাজার 'বাল্মীকী রানী' প্রস্তুত হইবে।”

নেতাজী সুভাষচন্দ্র কেবল নারী-বাহিনী গঠন করিয়াই ক্ষান্ত ছিলেন না, সমগ্র দেশে শুধন স্বাধীনতার জন্য একরূপ বিপুল চাক্ষুণ্য লক্ষিত হইল যে, বালক-বালিকাদের সমন্বয়ে একটি বাল-সেনাদলও গঠিত হইয়া উঠিল। ইহারা আত্মধাতী সেনাদল হিসাবে কাণ্ড করিত।

ব্রহ্ম-বরণাঙ্গনে এই কিশোর-কিশোরীগণ যে অদ্ভুত আয়োৎসর্গের পরিচয় দিয়াছে, তাহা স্বাধীনতার ইতিহাসে চিরদিনই স্মরণীয় লিখিত থাকিবে।

এই বাল-সেনাদলের প্রধান কাজ ছিল শত্রুর ট্যাঙ্ক ধ্বংস করা। তাহারা নিজেদের পিঠে মাইন বাধিয়া মহা শত্রুর

ট্যাক্কের তলায় শুইয়া পড়িত। ট্যাক্কগুলি ধ্বংস হইত বটে, কিন্তু সেই সঙ্গে তাহাদের দেহও চূর্ণ-বিচূর্ণ ও পিষ্ট হইয়া যাইত, এবং তাহাদের নিষ্পাপ সাহসী আত্মা অমর-ধামে চলিয়া যাইত।

১৯৪২ সালে আজাদ-হিন্দ ফৌজে স্বেচ্ছা-সৈন্য সংগ্রহ করিবার জন্য আহ্বান জানান হইয়াছিল। অগণিত লোক সৈন্যদলে নাম লিখিয়াছিল, কিন্তু জাপানীদের অস্পষ্ট নীতির ফলে সৈন্যদের শিক্ষাদান-কার্য্যে বেশীদূর অগ্রসর হওয়া যায় নাই। এইবার সুভাষচন্দ্রের নেতৃত্বে অবস্থা পরিবর্তিত হইল। তিনি স্পষ্ট ভাষায় এই মতামত ব্যক্ত করিলেন যে,—

এই আজাদ-হিন্দ ফৌজই ভাবতবর্ষের প্রতিনিধিদলমূক জাতীয় বাহিনী। জাপানীদের সহিত ইহার কোনরূপ সংশ্রব থাকিলে ইহা বিভীষণ-বাহিনী বলিয়া কুখ্যাত হইবে। ইহার নীতি, কার্য্যকলাপ ও নেতৃত্ব ভারতীয় দেশ-প্রেমিকগণ-কর্তৃকই চালিত হইবে; কোনরূপ বৈদেশিক কর্তৃত্ব, অথবা একজনও বৈদেশিক সৈন্যকে ভারতভূমিতে স্বীকার করা চলিবে না। জাপানীদের ভারত আক্রমণের অধিকার নাই। জাপানীগণ যদি বলেন যে, তাঁহারা ভারতকে ব্রিটিশ-শক্তির কবল হইতে মুক্ত করিয়া স্বাধীনতা দান করিতে যাইতেছেন, তথাপি আজাদ-হিন্দ ফৌজ তাহাদিগকে অগ্রায় আক্রমণকারী হিসাবেই গণ্য করিবে। ভারতবর্ষকে যদি ব্রিটিশের কবল হইতে মুক্ত করিতে হয়, তবে একমাত্র ভারতের নিজস্ব বাহিনীই তাহা করিতে পারে। জাপানীদের সামরিক কৌশল ও নীতির দ্বারা এই ভারতীয় বাহিনী কখনই চালিত হইতে পারিবে না; জাপানীদের নীতির সহিত ইহার কোনরূপ সংশ্রব থাকিলে ইহা 'পঞ্চম বাহিনী' বলিয়া ইতিহাসে কলঙ্কভাগী হইবে।

এই নীতিগত স্পষ্ট ঘোষণার ফলে আজাদ-হিন্দ সঙ্ঘ এবং আজাদ-হিন্দ ফৌজ নবশক্তিতে উজ্জীবিত হইল। দেশপ্রেমিক ভারতীয়গণ এই প্রতিষ্ঠান এবং এই বাহিনীকে সর্ববাস্তুরূপে স্বীকার করিয়া ইহাকে আরও শক্তিশালী করিবার জন্য সকল শক্তি-সামগ্র্য প্রয়োগ করিলেন। মাঝে একটি সামরিক শিক্ষাকেন্দ্র খোলা হইল। ইহাতে পালানক্রমে একই সময়ে ৭০০০ জনকে করিয়া সামরিক শিক্ষাদানের ব্যবস্থা হইয়াছিল। ৭০০০ ব্যক্তি লইয়া একটি দল গঠিত হইত। এইরূপে দলে-দলে দেখা-সৈন্য শিক্ষিত হইতে লাগিল। ভারতীয় বাহিনী ও এন্-কমিশন অফিসারগণের মধ্য হইতে উৎকৃষ্ট অফিসার বাছাই করিয়া শিক্ষাদানের ব্যবস্থা হইয়াছিল।

নেতাজী স্মৃতিচন্দ্রের পরিচালনায় আজাদ-হিন্দ ফৌজ সমগ্র প্রাচ্যখণ্ডে এক বিরাট চাপল্যের ও উদ্দীপনার সৃষ্টি করিল। ভারতীয়গণ দেখা-প্রণোদিত হইয়া অকাতরে অর্থদান করিতে লাগিলেন। অর্থভাণ্ডার, মৈত্র্যবাহিনী, নানাপ্রকার জনহিতকর কার্য-কলাপ প্রভৃতি ক্রমশঃ ব্যাপকতা লাভ করায় একটি গভর্নমেন্ট স্থাপনের প্রয়োজনীয়তা অনুভূত হইল।

সুতরাং স্মৃতিচন্দ্র একটি অস্থায়ী গভর্নমেন্ট গঠন করিলেন। ইহার নাম হইল 'স্বাধীন-ভারত অস্থায়ী গভর্নমেন্ট'। তাহাকেই রাষ্ট্রের সর্বপ্রধান অধিনায়ক করা হইল। ইহা ইংলণ্ডের বিরুদ্ধে যুদ্ধমান সকল রাষ্ট্র-কর্তৃক স্বীকৃত হইল। ঐ বৎসর ২৫শে অক্টোবর স্বাধীন-ভারত অস্থায়ী গভর্নমেন্ট

যথাযথ নিয়ম ও রীতি অনুযায়ী ইংলণ্ড ও আমেরিকার বিরুদ্ধে যুদ্ধ-ঘোষণা করিল।

আজাদ-হিন্দ সঙ্ঘ ও স্বাধীন-ভারত অস্থায়ী গভর্নমেন্টের কর্মসূচল ভারতের নিকটবর্তী কোন স্থানে হওয়া আবশ্যিক বিবেচনায় ১৯৪৪ সালের ৭ই জানুয়ারী উহার কর্মসূচল বাম্বায় স্থানান্তরিত হয়। বাম্বায় স্থানান্তরিত হওয়ার পর হইতে অস্থায়ী গভর্নমেন্টের কার্য-কলাপ আরও ব্যাপক হইয়া উঠিল।

স্বাধীন-ভারত অস্থায়ী গভর্নমেন্ট যথাযথ ভাবে মন্ত্রী নিয়োগ করিয়াই বিভিন্ন রাষ্ট্রিক কার্য চালাইতেন, কাহারও খুসীমত বা নীতিশূন্য ভাবে কিছুই ঘটতে পারিত না। এই সকল মন্ত্রী ছিলেন আজাদ-হিন্দ সঙ্ঘের ভারপ্রাপ্ত মন্ত্রী। রেসুগই ছিল অস্থায়ী গভর্নমেন্টের রাজধানী এবং প্রধান কর্মসূচল। এখানে ১৯টি বিভিন্ন ডিপার্টমেন্ট ছিল। প্রত্যেকটি ডিপার্টমেন্টেরই রীতিমতভাবে রেকর্ড-বুক্‌স্, নথিপত্র, হিসাব প্রভৃতি বিষয়ের সংরক্ষিত ব্যবস্থা ছিল। যোগ্যতাসম্পন্ন ব্যক্তিগণকেই এই সকল কাৰ্যে নিয়োগ করা হইত। উচ্চতন কর্মচারীর নিকট তাঁহাদের জবাবদিহি করিতে হইত।

এই সঙ্ঘের রিয়ার হেড্-কোয়ার্টার্স ছিল সিন্ধাপুরে : এখান হইতেই মালয়, সুমাত্রা, জাভা, বোর্নিও প্রভৃতি অঞ্চলের তদারক করা হইত। আজাদ-হিন্দ সঙ্ঘের শাখা কেবল মালয়েই ছিল ৭০টি ; মালয়-শাখার সভ্য-সংখ্যা দুই লক্ষেরও উপর ; বাম্বায় ছিল ১০০টি শাখা, শ্যামে ছিল ২৪টি। ইহা

হাড়া আন্দামান দ্বীপপুঞ্জ, সুমাত্রা, জাভা, বোর্নিও, নেলিবিস দ্বীপপুঞ্জ, চীন, মালুকুয়ো এবং জাপান প্রভৃতি স্থানেও ইহার অসংখ্য শাখা এবং অভ্যন্তরীণ প্রভাব বৃদ্ধি পাইয়াছিল।

আজাদ-হিন্দ ফৌজের জন্য মৈত্র্য এবং মিথিল সার্ভিসের জন্য অফিসার সংগ্রহ করা হইত ; কিন্তু ইহাতে কোন প্রকার জোর-জুলুম ছিল না।

আজাদ-হিন্দ গণসংঘের অন্যতম সদস্য, মেজর ক্যাপ্টেন এ. সি. চাটার্জি মুক্তিলাভান্তে কলিকাতায় আসিয়া দেশপিয়-পার্কে সমবেত জনতার সম্মুখে বলিয়াছেন,—

“ব্যতীক অফিসার, মৈত্রিক ও মেচ্ছাসেবক স্ব-ইচ্ছায়, নিজের হাধীন সম্মতিতে ইহাতে যোগদান করিয়াছেন। এই সংগঠনে কোন প্রাদেশিকতা বা সম্পূর্ণ ধর্মতাব পূর্ণাঙ্গ একটুক ছিল না। এই সংগঠনে ব্যক্তিগত উন্নতির মানদণ্ড ছিল, শুধু তাহার কর্মদক্ষতা ও যোগ্যতা—সে যে-কোন পাদেশবর্জিত হউক বা যে-কোন ধর্মাবলম্বী হউক না কেন!

সিঙ্গাপুরে যখন একবার টাকা তুলিবার কথা হয়, তখন সেগানকার চেটিয়ার সম্প্রদায় নেতাজীকে বলিয়া পাঠাইলেন—তাহারা টাকা দিতে রাজী আছেন, কিন্তু তাহাদের মন্দিরে গিয়া সেজ্ঞ নেতাজীকে বলিতে হইবে।

তখন নেতাজী বলিলেন—সে-কোন ধর্মাবলম্বী হউক, মানুষ ভগবানকে ডাকিতে পারে ; কিন্তু কর্মক্ষেত্রে, রাজনৈতিক ব্যাপারে, দেশের ব্যাপারে ধর্মের সঙ্গে কোন সম্পর্ক নাই। তিনি মন্দিরে যাইতে রাজী আছেন, যদি তাহারা হিন্দু, মুসলমান, খৃষ্টান, শিখ-নির্বিশেষে সকলকে তাহাদের মন্দিরে যাইতে অনুমতি দেন।



তাহা যদি না দেওয়া হয়, তাহা হইলে তিনি তাঁহাদের টাকা চাহেন না।

তাঁহারা বলিয়া পাঠাইলেন—যাহাকে খুসী তাহাকে লইয়া নেতাজী তাঁহাদের মন্দিরে যাইতে পারেন—তাঁহার কোন রকম আপত্তি করিবেন না।

সেদিন নেতাজীর সঙ্গে মুসলমান, হিন্দু, খৃষ্টান, শিখ সব জাতীয় অফিসার ও সৈনিক—চেট্টিয়ার মন্দিরে একত্র করিয়াছিল। সিঙ্গাপুরের ইতিহাসে ইহা তিনি প্রথম প্রবর্তন করেন। তাঁহার আগে সে মন্দিরে হিন্দু ছাড়া কেহ ঢুকে নাই এবং ব্রাহ্মণ ছাড়া কেহ মন্দিরের ভিতরে যাইতে পারে নাই। শুধু তাহাই নহে—মন্দিরের পূজারী ব্রাহ্মণ আসিয়া সকলের কপালে বিভূতি আঁকিয়া দিয়াছিল আর মুসলমান ও খৃষ্টান অফিসার পর্যন্ত।”

সামরিক শিক্ষাদানের জন্ত নয়টি কেন্দ্র ছিল, সিঙ্গাপুর এবং রেঙ্গুনে অফিসার-ট্রেনিংএর জন্ত দুইটি কেন্দ্র ছিল ; কোন কেন্দ্রেই বিভিন্ন সম্প্রদায়ের জন্ত ভিন্ন রকমের ব্যবস্থা প্রবর্তন করা হয় নাই। শিক্ষার্থীগণই পালানক্রমে সে ভার গ্রহণ করিয়াছিলেন ; অফিসার ও এন্. সি. ও. গণ হিন্দুস্থানী ভাষায় শিক্ষাদান করিতেন। যুদ্ধে আদেশ-দানের রীতিও ছিল হিন্দুস্থানীতে। এক খাত মতেই ২০ হাজার বে-সামরিক ব্যক্তিগণকে শিক্ষাদান করিয়া আজাদ-হিন্দ ফৌজের অন্তর্ভুক্ত করা হইয়াছিল। ইহা ছাড়া, বিভিন্ন অঞ্চল হইতে হাজারে-হাজারে শিক্ষার্থী শিক্ষালাভ করিতে আসিয়াছিল, ইহাদের অনেককেই আজাদ-হিন্দ ফৌজের অন্তর্ভুক্ত করা হইয়াছে।

আজাদ-হিন্দ সঙ্ঘের সমগ্র আন্দোলনে একমাত্র

ভারতীয়গণের অর্থই ব্যয় করা হইত। বার্মায় ভারতীয়গণের নিকট হইতে কিছুদিনের মধ্যে ৮ কোটি টাকা সংগৃহীত হইয়াছিল। ১৯৪৫ সালের জানুয়ারী মাসে নব-বৎসরের উপহার হিসাবে ভারতকে মালয় ৪০ লক্ষ টাকা দান করিয়াছিল। আজাদ-হিন্দ ফৌজ নিজ প্রয়োজনের জন্য যাবতীয় অস্ত্রপাতি গোলাবারুদ নিজ অর্থ দিয়াই ক্রয় করিত।

আজাদ-হিন্দ সঙ্গ ছিল একটি রাষ্ট্রিক প্রতিষ্ঠান। সুতরাং ইহাকে সমাজ-সেবার গুরু দায়িত্বভারও গ্রহণ করিতে হইয়াছিল। যুদ্ধ-পীড়িতদের সাহায্যকল্পে ইহার ভাণ্ডার হইতে অল্প অর্থ ব্যয় করা হইত। মালয়ের শ্রমিকগণ এক সময় চরম দুর্দশায় পড়িয়াছিল; উক্ত সঙ্গ তখন মজুরদিগের জন্য চিকিৎসালয়, ডাক্তার, ঔষধ, পথ্য, খাদ্য প্রভৃতি ব্যাপারে প্রচুর অর্থব্যয় করিয়াছে।

কুয়ালালামপুরে ছিল সর্বাপেক্ষা বৃহৎ সাহায্য-কেন্দ্র। এখানে প্রত্যহ এক হাজারের উপর, নারী, শিশু ও দুর্গত-জনকে নানাবিধ সাহায্য দেওয়া হইত। ইহার মাসিক খরচ ছিল ৭৫ হাজার ডলার।

এই সঙ্গ বার্মাতে অনেকগুলি দাতব্য চিকিৎসালয় চালাইত, শ্যামেও একটি আধুনিক ধরনের উচ্চাঙ্গের হাসপাতাল খুলিয়াছিল; তা ছাড়া, দুর্গত ভারতীয়গণের বসতি স্থাপনের জন্য উক্ত সঙ্গ ভূমি-সংগঠনের কার্যও গ্রহণ করিয়াছিল। বিশেষ করিয়া মালয়ের জঙ্গল অপসারিত করিয়া প্রায় ২০০০ হাজার একর জমি বাসোপযোগী করা হইয়াছে।



- ( ৭ ) লেফ্‌টেণ্যান্ট কর্নেল গুলজারা সিং  
 ( ৮ ) " এম্. প্লেড্. স্কিয়ানি  
 ( ৯ ) " এ. ডি. লোকনাথন  
 ( ১০ ) " ট্রেশান কার্ভার  
 ( ১১ ) " আজিভ আমে  
 ( ১২ ) " শা নওয়ারাজ—সেনাবাহিনীর প্রতিনিধি  
 ( ১৩ ) মিঃ এ এন্. সহায়—সম্পাদক ( মদীর পদমর্যাদাসম্পন্ন )  
 ( ১৪ ) শ্রীযুক্ত রামবিহারী বসু—( পরোক্ষ পরামর্শদাতা )  
 ( ১৫ ) মঃ করিম গনি  
 ( ১৬ ) শ্রীদেবনাথ দাস  
 ( ১৭ ) মঃ ডি. এম. শান  
 ( ১৮ ) মিঃ এ. ইয়েলাপ্পা  
 ( ১৯ ) মিঃ আই. গিবি  
 ( ২০ ) সর্দার ঈশ্বর সিং  
 ( ২১ ) মিঃ এ. এন্. সরকার—আইনবিধায়ক পরামর্শদাতা

} —পরামর্শদাতাগণ

উল্লিখিত ব্যক্তিবর্গকে লইয়া আজাদ-হিন্দ গভর্নমেন্ট গঠিত হইয়াছিল।

আজাদ-হিন্দ ফৌজের মৈনিকগণ কুচ-কাওয়ালের সময় যে সামরিক সঙ্গীত করিত, তাহা নিম্নে উদ্ধৃত হইল—

কদম্ কদম্ বাড়ায়ে জা  
 খুসীতে গীত গায়ে জা  
 এ জিন্দগী হায় কোন্ কী  
 (তো) কোম্ পৈ লুটায়ৈ জা ॥

তুঁ শেরে হিন্দ আগে বাঢ়  
 মরণেসে ফিরতি তু ন ডর  
 আমমান তক্ উঠাকে শির  
 ধোঁশে বতন বঢ়ায়ে জা ॥

তেরী হিন্মত বাঢ়তি রয়ে  
 খুদা তেরে শুনতা রয়ে  
 জো সামনে তেরে চঢ়ে  
 ভো থাক্‌মে মিলায়ে জা ॥

চলো দিল্লী পুকারকে  
 কোমী নিশান্ সামালকে  
 লান কিল্লে পৈ গাডকে  
 লহ্‌রায়ে জা লহ্‌রায়ে জা ॥

আজাদ-হিন্দ ফৌজের ভারতে প্রবেশের পূর্বে বাস্ত্যার  
 পরিস্থিতি খুব আশাপ্রদ ছিল না। সুভাষচন্দ্রের সর্বাপেক্ষা  
 কৃতিত্ব এই যে, তাঁহারই অনমনীয় নীতির ফলে জাপানীরা  
 ভারত-আক্রমণের নীতি পরিত্যাগ করিতে বাধ্য হয়।

হকোয়াং উপত্যকায় ব্রিটিশের আক্রমণ এবং তাহাদের  
 চিন্দুইন নদী অতিক্রমের সম্ভাবনায় জাপানীরা অধীর হইয়া  
 পড়িল। তাহারা তাড়াহুড়া করিয়া একটা পরিকল্পনা করিয়া  
 ফেলিল। ইফল দখল করার জন্য অবিলম্বে অগ্রসর হওয়া  
 প্রয়োজন, কিন্তু আজাদ-হিন্দ ফৌজ জাপানীদের ভারত-  
 আক্রমণের অধিকার কিছুতেই স্বীকার করিবে না। সুতরাং  
 সুস্পষ্টভাবে জাপানীদের নীতি ঘোষণা করিতে হইল যে,  
 উহারা কেবল ইফলই দখল করিতে চায়; অতঃপর ভারত-

আক্রমণের সমস্ত সামরিক কাব্য-কলাপ আজাদ-হিন্দ ফৌজের উপর ছাড়িয়া দেওয়া হইবে।

আজাদ-হিন্দ ফৌজ পরিস্থিতি সম্যক বুঝিতে পারিলেন, তথাপি ইক্ষল দখলের যুদ্ধে তাঁহারাি প্রধান অংশ গ্রহণ করিতে মনস্থ করিলেন। ১৯৪৪ সালের ৪ঠা জানুয়ারী আজাদ-হিন্দ ফৌজ আক্রমণাত্মক কার্য শুরু করে. এবং ১৮ই মার্চ তাঁহাদের বাহিনী ভারত-ব্রহ্ম সীমান্ত অতিক্রম করিয়া ভারতভূমিতে পদার্পণ করে।

এই বাহিনীতে প্রধানতঃ তিনটি ব্রিগেড ছিল :—(১) কর্নেল শা' নওয়াজের নেতৃত্বে ৬২০০ সৈন্য লইয়া গঠিত 'সুভাষ-ব্রিগেড'।

(২) কর্নেল ইনার্থ কয়ানির নেতৃত্বে 'গান্ধী ব্রিগেড' ; ইহার সৈন্য-সংখ্যা ২০০০ জন।

(৩) কর্নেল মোহন সিংএর নেতৃত্বে 'আজাদ ব্রিগেড', ইহাতে দুই নম্বর ব্রিগেডের প্রধান-সংখ্যক সৈন্য ছিল।

ইহা ছাড়া তিন শত বাহাদুর-দলের কোষ ছিল ; সাত শত বেসামরিক সাহায্যকারীও ইহাদের সঙ্গে ছিলেন। কর্নেল গুরুদাস সিং ধীমনের নেতৃত্বে তিন হাজার সৈন্য লইয়া গঠিত 'নেহেরু ব্রিগেড'—ইহাদের পিছনে ছিল।

তাঁহারা মোরাই, কোহিমা ও অন্যান্য স্থান দখল করিয়া ইক্ষলে উপস্থিত হন এবং ইক্ষল অবরোধ করেন। কিন্তু এই সময় ভীষণ বর্ষা আরম্ভ হইল এবং ইক্ষল আক্রমণ ও অধিকার অসম্ভব হইয়া দাঁড়াইল।

প্রকৃতির এই দুর্যোগময়ী অবস্থায় আক্রমণ পরিহার করা হইল এবং আক্রমণ পরিহারের পর সংযোগসূত্র রক্ষা করা চরু হইয়া পড়িল ; সুতরাং আজাদ-হিন্দ ফৌজ পশ্চাদপসরণে বাধ্য হয় ।

অনন্তর আজাদ-হিন্দ ফৌজ কেবল আত্মরক্ষাগুলক যুদ্ধে লিপ্ত থাকেন । ব্রিটিশ শক্তি যখন বাঙ্গা আক্রমণ করিল, তখন এই বাহিনীর অনেক ‘স্টাফ অফিসার’ ব্রিটিশ পক্ষে যোগ দেন । ব্রিটিশের হস্তে মিণ্ডিলার পতন হইলে যখন পরিষ্কার নোকা গেল যে, জাপানীরা ব্রিটিশ অগ্রসরকে আর বেশীদিন ঠেকাইতে পারিবে না, তখন রেঙ্গুন পরিত্যাগের পরিকল্পনা করা হইল ।

১৯৪৫ সালে ২৩শে এপ্রিল জাপানী প্রধান সেনাপতি ও বাঙ্গা-গভর্নমেন্ট রেঙ্গুন ত্যাগ করিল । তাহাদের সহিত একত্রে রেঙ্গুন ত্যাগ করিতে সুভাষচন্দ্রের অস্থায়ী গভর্নমেন্ট অঙ্গীকার করিয়াছিলেন ।

এই সময় সর্বাধিনায়ক শ্রীবুদ্ধ সুভাষচন্দ্র বঙ্গ আজাদ-হিন্দ ফৌজের প্রতি তাঁহার শেষ নির্দেশনামা প্রচার করেন !  
উহা নিম্নরূপ—

আজাদ-হিন্দ ফৌজের অফিসার ও সৈন্যদের প্রতি—

১৯৪৪ সালের ফেব্রুয়ারী মাস হইতে আপনারা যেখানে বীরোচিত সংগ্রাম চালাইয়াছেন এবং এখনও চালাইতেছেন, আজ গভীর বেদনার সহিত আমি সেই

ব্রহ্মদেশ ত্যাগ করিয়া যাইতেছি। ইক্ষল ও ব্রহ্মদেশে আমাদের স্বাধীনতা-সংগ্রামের প্রথম চেফটা ব্যর্থ হইয়াছে : কিন্তু উহা প্রথম চেফটাই মাত্র। আমাদিগকে আরও বহু চেফটা করিতে হইবে। আমি চির-আশাবাদী। কোন অবস্থাতেই আমি পরাজয় মানিয়া লইব না। ইক্ষলের সমতলভূমিতে, আরাকানের অরণ্য-গপলে, ব্রহ্মদেশের তৈলখনি ও অগ্ন্যাণ্ড অংশে শত্রুদের বিরুদ্ধে বীরদের কাহিনী আমাদের স্বাধীনতা-সংগ্রামের ইতিহাসে চির-কাল লিখিত থাকবে।

ইনক্লাব জিন্দাবাদ! আজাদ-হিন্দ জিন্দাবাদ! জয় হিন্দ!

২১শে এপ্রিল,  
১৯৪৫ সাল

}

(স্বাক্ষর) সুভাষচন্দ্র বসু

আজাদ-হিন্দ ফৌজের সর্দারিনাথক

শ্রীযুক্ত সুভাষচন্দ্র ও তাঁহার অস্থায়ী গভর্ণমেন্ট ১৯৪৫ সালের ২৪শে এপ্রিল রেশূণ ত্যাগ করিয়া আসেন; কিন্তু ভারতীয়গণের ধন-প্রাণ রক্ষার জন্য মেজর-জেনারেল লোকনাথনের অধিনায়কত্বে দুই হাজার আজাদ-হিন্দ ফৌজের সৈন্য রাখিয়া এবং সজের সহকারী সভাপতি শ্রীযুক্ত ডে. এন. ভাদুড়ীর উপর সজের সকল দায়িত্বভার অর্পণ কারিয়া চলিয়া আসা হইয়াছিল।

রেশূণ ত্যাগের পূর্বেই স্বাধীন-ভারত অস্থায়ী গভর্ণমেন্টের দেনা-পাওনা পরিশোধ করা হইয়াছিল। জাপানীদের



পশ্চাদপসরণ ও ব্রিটিশ-কর্তৃক পুনরধিকারের সুদীর্ঘ সময়ের মধ্যে রেঙ্গুণে একটিও রাহাজানি বা অন্য কোনরূপ বিশৃঙ্খল অরাজক অবস্থা ঘটে নাই।

১৯৪৪ সালের এপ্রিলে রেঙ্গুণে আজাদ-হিন্দ গ্যাম্বাল ব্যাঙ্ক প্রতিষ্ঠিত হইয়াছিল। ১৯৪৫ সালের মে মাস পর্যন্ত এই ব্যাঙ্ক বাবতীয় কাজ-কর্ম চালাইতেছিল। ১৯শে মে ব্রিটিশ সামরিক কর্তৃপক্ষ উহা (আজাদ-হিন্দ গ্যাম্বাল ব্যাঙ্ক) অধিকার করিবার বসে। ফিল্ড-সিকিউরিটি সার্ভিসের কর্তৃপক্ষ ২৮শে মে শ্রীযুক্ত ভাদুড়ীকে গ্রেপ্তার করেন এবং তখন হইতে আজাদ-হিন্দ সঙ্ঘের কার্য-কলাপ বন্ধ হইয়া যায়। তখন হইতেই আজাদ-হিন্দ সঙ্ঘের কর্মীগণ ও তাঁহাদের সহিত সংশ্লিষ্ট ব্যক্তিগণকে দলে-দলে গ্রেপ্তার করা হইতে লাগিল।

বর্তমানে আজাদ-হিন্দ গভর্নমেন্ট বিলুপ্ত হইয়াছে এবং জাপানের আত্মসমর্পণের ফলে আজাদ-হিন্দ ফৌজকেও আত্ম-সমর্পণ করিতে হইয়াছে। আজাদ-হিন্দ ফৌজের অনেককেই ভারতে আনিয়া মুক্তিদান করা হইয়াছে। তাঁহাদের কয়েক-জনের বিচার হইতেছে, কাহারও বা বিচার-পর্ব সমাপ্ত হইয়া গিয়াছে।

১৯৪৫ সালের ৫ই নভেম্বর আজাদ-হিন্দ ফৌজের প্রথম তিন জনের বিচার আরম্ভ হয়। ক্যাপ্টেন শা নওয়াজ, ক্যাপ্টেন পি. কে. সাইগল ও ক্যাপ্টেন গুরুবক্স সিং খীলনের বিরুদ্ধে যথারীতি চার্জসিট দাখিল করা হইল এবং অবশেষে

কয়েক সপ্তাহ পরিপূর্ণ উত্তেজনার মধ্যে তাঁহাদের এই বিচার-পর্ব শেষ হইয়া গিয়াছে।

ভারতীয় বাহিনীর নিম্নলিখিত সাত জন অফিসারকে লইয়া সামরিক আদালত গঠিত হইয়াছিল।

- (১) মেজর-জেনারেল এ. বি. ব্র্যাকলাও
- (২) ব্রিগেডিয়ার এ. এইচ. হার্ক
- (৩) লেফটেন্যান্ট কর্নেল সি. আর. স্টু
- (৪) " " টি. আই. ষ্টিভেনসন
- (৫) " " নাসির আলি খান
- (৬) মেজর বি. প্রীতম সিংহ
- (৭) " বনোয়ারীলাল

সরকারপক্ষে মামলা পরিচালনা করিয়াছিলেন অ্যাড-ভোকেট জেনারেল সার এন্. সি. ইঞ্জিনিয়ার ও মেজর ওয়াল্‌স্। সার তেজবাহাদুর সফ ও শ্রীযুক্ত ভূলাভাই দেশাই অভিব্যক্তদিগের পক্ষ-সমর্থন করিয়াছিলেন।

দিল্লীর লালকেলাকে সংরক্ষিত অঞ্চল ঘোষণা করিয়া তন্মধ্যে সামরিক আদালতের কর্মক্ষেত্র নির্দিষ্ট হইয়াছিল।

ক্যাপ্টেন শা নওয়াজ, ক্যাপ্টেন সাইগল ও লেফটেন্যান্ট দীলন সামরিক আদালতে সম্রাটের বিরুদ্ধে বুদ্ধ করিবার অভিযোগে অভিযুক্ত হইয়াছিলেন। লেফটেন্যান্ট দীলনের বিরুদ্ধে নরহত্যার অভিযোগ এবং অপর দুই জনের বিরুদ্ধে নরহত্যার সহায়তার অভিযোগও আনা হয়।

সামরিক আদালত সাব্যস্ত করিলেন যে, তিন জনই

সম্রাটের বিরুদ্ধে যুদ্ধ করিবার অভিযোগে অপরাধী। ক্যাপ্টেন শা নওয়াজ তদুপরি নরহত্যার সহায়তার অভিযোগেও অপরাধী সাব্যস্ত হইয়াছেন। ক্যাপ্টেন সাইগলকে নরহত্যার সহায়তা ও লেফ্টেন্যান্ট ধীলনকে নরহত্যার অভিযোগ হইতে অব্যাহতি দেওয়া হইয়াছে।

বিচারে সামরিক আদালত তাঁহাদের সকলকেই যাবজ্জীবন দ্বীপান্তর দণ্ডে দণ্ডিত করেন এবং তাঁহাদিগকে চাকুরী হইতে বরখাস্ত করিবার ও তাঁহাদের প্রাপ্য বেতন ও ভাতা বাজেয়াপ্ত করিবার আদেশ প্রদান করেন; কিন্তু সামরিক আদালত-কর্তৃক প্রদত্ত দণ্ড বা রায় জঙ্গীলাট-কর্তৃক অনুমোদিত না হইলে কাব্যকরী হয় না। সুখের বিষয়, জঙ্গীলাট বাহাদুর অফিসারত্রয়ের প্রতি যাবজ্জীবন দ্বীপান্তর দণ্ডের আদেশ মার্জনা করিয়াছেন; শুধু চাকুরী হইতে বরখাস্ত ও ভাতা বাজেয়াপ্তের আদেশই বলবৎ রহিয়াছে

দুঃখের বিষয়, প্রথম বিচার-পর্বের গায় অপর বিচার-পর্বগুলি শাসকবর্গের দূরদৃষ্টির পরিচায়ক বলিয়া মনে হয় নাই। দৃষ্টান্ত-স্বরূপ বলা যাইতে পারে, আজাদ-হিন্দ ফৌজের অগ্রতম অভিযুক্ত সৈন্যদল ক্যাপ্টেন রসিদ সাত বৎসর কারাবাসের আদেশে দণ্ডিত হইয়াছেন। তাঁহার এই কর্তার দণ্ডে সমগ্র দেশব্যাপী—হিন্দু-মুসলমান সকলের হৃদয়েই যে ক্ষোভের সঞ্চার হইয়াছে, তাহা আত্মপ্রকাশ করায় স্থানে-স্থানে অতি চরম পরিণতি ও শোচনীয় দুর্ঘটনার সৃষ্টি করিয়াছে। সম্প্রতি ক্যাপ্টেন বুরহানউদ্দিনের

কঠোর দণ্ডের কথা শুনিয়াও সমগ্র ভারতবর্ষ স্তব্ধ হইয়াছে।

পর্যায়ীন ভারতবর্ষের এক বাঙালী অধিনায়ক সম্পর্কে অজ্ঞাত স্বাধীন দেশের অধিনায়কগণ যে কি গভীর শ্রদ্ধা পোষণ করেন, তাহা সুপ্রসিদ্ধ জাপানী সাংবাদিক মিঃ হাগিওয়ারার বিবৃত পাঠ করিলেই স্পষ্ট সন্দেহহীন হইবে।

ইউনাইটেড হোস্ অফ আমেরিকার প্রতিনিধির নিকট তিনি সুভাষচন্দ্র সম্পর্কে যে বিবৃতি দিয়াছেন, তাহাতে প্রকাশ যে, ১৯৩৩ খৃষ্টাব্দে ম্যানিলায় এক সাংবাদিক-সম্মেলনে সুভাষচন্দ্র বহু তাঁহার বক্তব্য ও গাঙ্গীর মতবাদকে একই লক্ষ্যে পৌঁছানোর সত্ত্ব লক্ষ্য বিনিময় করিয়াছিলেন; বহু একথা সুস্পষ্টভাবে ঘোষণা করিয়াছিলেন যে, তিনি বিশ্বাস করেন, সামরিক জাতি-কমান্ড, তাঁহার সহকারী এবং ভারতীয় জনসাধারণের সঙ্গে উন্নত মতাদর্শে পরিচয় ও তাহাদের হৃদয়ে আত্মোৎসাহ সৃষ্টি করিবে। তাঁহার প্রচেষ্টা হয়ত বারং হইতে পারে এবং তাহাদের নৈরাশ্যে শোচনীয় ভাবে হয়ত তাঁহাকে মারতে হইতে পারে, কিন্তু তবুও তিনি বিশ্বাস করেন যে, ভারতের মুক্তি-সংগ্রামের চরম সফলোৎসর্গে সশস্ত্র শক্তি-প্রয়োগ আবশ্যিক

মিঃ হাগিওয়ারা বলিয়াছেন, “চারিদিক আশি পূর্ব-এশিয়ার বিভিন্ন স্থানে অনুষ্ঠিত সাংবাদিক-সম্মেলনে সুভাষচন্দ্রকে দেখিয়াছি—রেন্সনে, ব্যাঙ্কে, মিল্লাপুরে ও ম্যানিলায়। তাঁহাকে দেখিয়া আমার মনে হইয়াছে যে, তিনি অত্যন্ত তীক্ষ্ণবী।”

সময় হিটলার পর্যন্ত সুভাষচন্দ্রকে যে সম্মান প্রদর্শন করিয়াছিলেন, তাহাতে স্পষ্টই প্রমাণিত হইয়াছে যে, নীরের মর্যাদা সর্বদাই স্মীকৃত হইয়া থাকে। তিনি তাঁহার সৈন্য-দিগকে সম্বোধন করিয়া বলিয়াছিলেন, “মনে রাখিও খামি এক ক্ষুদ্র দেশের ‘ফ্রান্স’ বা অধিনায়ক, কিন্তু তিনি এক বিশাল দেশের ‘ফ্রান্স’। সুতরাং তাঁহাকে তদ্রূপ সম্মান প্রদর্শনে কার্পণ্য করিও না।”

এস্থলে ইহা বর্ণিত অপ্রাসঙ্গিক হইবে না যে, প্রাচ্য রণাঙ্গনে এশিয়া মহাদেশে তখন ক্রীযুক্ত রাসবিহারী বসু ও ক্যাপ্টেন মোহন সিংএর নেতৃত্বে ভারতের মুক্তিকামী একদল আজাদ-হিন্দ ফৌজ গড়িয়া উঠিতেছিল, সুভাষচন্দ্রের নেতৃত্বে পাশ্চাত্যে ইয়োরোপের রণাঙ্গনেও তখন অপর একদল আজাদ-হিন্দ ফৌজ গঠিত হইয়াছিল। জার্মানগণ তাহাদিগকে “ফ্রী ইণ্ডিয়ান” নামে অভিহিত করিয়াছিলেন।

ভারতীয় যুদ্ধবন্দীদের মধ্য হইতেই এই মুক্তিকামী সৈন্যদল গড়িয়া উঠিয়াছিল। ইহাদের মোট সংখ্যা ছিল ৩,৫০০ এবং ১৫টি কোম্পানীতে বিভক্ত ছিল।

নেতাজী সুভাষচন্দ্র জার্মান গভর্নমেন্টকে সুস্পষ্ট ভাবে এই নির্দেশ দিয়াছিলেন যে, আজাদ-হিন্দ ফৌজকে যেন কেবল ইংরেজ ও আমেরিকানদের বিরুদ্ধেই নিয়োজিত করা হয়, রুশ বা অপর কোন জাতির বিরুদ্ধে যেন তাহাদিগকে ব্যবহার করা না হয়। নেতাজীর এই নির্দেশ অক্ষরে-অক্ষরে প্রতিপালিত হইয়াছিল।

ভারতবর্ষে আজাদ-হিন্দ ফৌজের প্রথম বিচার-পর্বের পূর্ব পর্যন্ত স্বদেশে ও বিদেশে সুভাষচন্দ্র সম্মুখে হয় তো বা একটা বিরুদ্ধ অভিযুক্ত বর্তমান ছিল! তখন পর্যন্ত কেহ হয় তো মনে করিতেন, সুভাষচন্দ্র এক শত্রুকে বিভাড়িত করিবার জন্য অপর এক বিদেশী শত্রুকে আমন্ত্রণ করিয়া আনিতেছিলেন; সুতরাং জয়গাঁদের সঙ্গেই তিনি তুলনীয়, এবং তাঁহার নেত্র-বাহিনী বিভীষণ-বাহিনী ছাড়া আর কিছুই নহে। সুভাষচন্দ্রের বিষয়, ক্যাপ্টেন শা নওয়াজ, ক্যাপ্টেন সাহগল ও লেফটেন্যান্ট ধীলনের বিচারকাজেই প্রমাণিত হইয়াছে যে, সুভাষচন্দ্রের আজাদ-হিন্দ গভর্নমেন্ট ও আজাদ-হিন্দ ফৌজ একেবারেই জাপানের তাবদার ছিল না,—এবং সেইজন্য সুভাষচন্দ্রকে জাপানীদের সঙ্গে অবিরতই দৃঢ় ভাবে ও স্ত্রকোণে দৃঢ় করিতে হইয়াছে। সুতরাং আজাদ-হিন্দ ফৌজের বিচারে এইটুকুই দেখানার দায়।

সমগ্র অগৎ আজ বুঝিয়া লইয়াছে, সুভাষচন্দ্রের দ্বিতীয় ব্যক্তি পৃথিবীতে অত্যাধিক জন্মগ্রহণ করেন নাই। পলায়নের অপমান-পঙ্কিল কালিমার মধ্য হইতে তিনি যে বিজয়-গৌরব অর্জন করিয়াছেন, সেই অনুভূতি আজ পরাধীনতার শৃঙ্খলে আবদ্ধ, জরাজীর্ণ ভারতবর্ষকে স্বাধীনতার স্বপ্ন-জলুবে মহিমোজ্জ্বল করিয়া তাহার লাঞ্চিত নত মস্তকে তারণের কিরাট পরাইয়া দিয়াছে!



## আট বজ্রপাত

নেতাজীর মৃত্যু-সংবাদ- বিভিন্ন ব্যক্তির শ্রদ্ধাজলি ।

হৃৎকেন্দ্র বিষয়, সমগ্র গৌরবের যিনি অধিকারী,—না জানি তিনি আজ কোথায় ! জীবিত কি মৃত, এই প্রশ্ন সকলেরই বুকে আজ খুব বড় আকারে দেখা দিচ্ছে ! এই অশুভ প্রশ্নের একমাত্র কারণ, বিগত ১৯৪৫ সালের ২৩শে আগস্ট জাপানী নিউজ এজেন্সী সুভাষচন্দ্রের মৃত্যু-সংবাদ ঘোষণা করিয়াছেন ।

১৯৪২ সালের মার্চ মাসেও অনুরূপ এক গুজব রটনাছিল তখন প্রকাশ হইয়াছিল যে, 'স্বাধীন-ভারত কংগ্রেসে' যোগদানের জন্য টোকিও যাইবার পথে সুভাষচন্দ্র বিমান-দুর্ঘটনায় নিহত হইয়াছেন ।

মহাত্মা গান্ধীও এই সংবাদে মন্বাহত হইয়া সুভাষচন্দ্রের আত্মীয়-স্বজনের নিকট সমবেদনা-পূর্ণ এক বাণী প্রেরণ করিয়াছিলেন । পরে যখন প্রতিপন্ন হইল যে এই সংবাদ মিথ্যা, তখন মহাত্মা তাঁহার বাণী প্রত্যাহার করেন; কিন্তু এইবার আর জাপানী নিউজ এজেন্সীর সংবাদ সঠিক ভাবে মিথ্যা প্রতিপন্ন হইতেছে না, দেশবাসীর গঞ্জে ইহাই পরম বেদনার বিষয় ।

১৯৪৫ খৃষ্টাব্দের ২৩শে আগস্ট তারিখে জাপানী নিউজ এজেন্সী সুভাষচন্দ্র বঙ্গের মৃত্যু-সংবাদ প্রচার করিয়াছেন ।

তিনি আকাশ-যান দুর্ঘটনায় আহত হইয়া এক জাপানী হাসপাতালে মারা গিয়াছেন বলিয়া জাপানী নিউজ এজেন্সী জানাইয়াছে।

জাপান-গণপরিষদের সহিত আলোচনা করিবার জন্য অস্থায়ী আজাদ-হিন্দ গণপরিষদের প্রধান কর্তা সুভাষচন্দ্র বসু ১৯৪৩ সালের ১৬ই আগস্ট তারিখে বিমানযোগে সিঙ্গাপুর গন্তে টোকিও যাত্রা করেন; ১৮ই আগস্ট বেলা ২টার সময় ভারত-হোকু বিমানক্ষেত্র তাঁহার বিমানখানি এক দুর্ঘটনায় পতিত হয় এবং তিনি গুরুতররূপে আহত হন। এক জাপানী হাসপাতালে তাঁহার চিকিৎসা হয়—কিন্তু সেখানে মরাতকভাবে তিনি মারা যান। একটুকুতে জেনারেল সুনামাশা চিকিৎসা সুপ্রাথমে পতিত হন এবং সুভাষচন্দ্র বসুর এডভোকাট হবার হবার সহমান ও অপর জাতি জন জাপানী অফিসার উপাচার ফলে আহত হন।

জাপানী সূত্র সুভাষচন্দ্র বসুর সম্পর্কে সবলশেষ সংবাদে ইতঃপূর্বের জানা গিয়াছিল, জাপানীদের বেঙ্গল পরিভাগের শেষ দিনে তিনি বেঙ্গল ছাড় করেন এবং তাঁহার গণপরিষদ ব্যাককে স্থানান্তরিত হয়।

কিন্তু এখনও বহুলোক তাঁহার মৃত্যু-সংবাদ বিশ্বাস করেন না। নিম্নলিখিত কারণে—কমিটির সভায় সে সমস্ত বিবৃতি নর-নারী গত অধিবেননের পর পরলোক গমন করিয়াছেন, শোক-প্রকাশের জন্য তাঁহাদের নামের দীর্ঘ তালিকার মধ্যেও সুভাষচন্দ্র বসুর নাম ছিল না। ইহা দেখিয়া জনৈক সদস্য ঐ



বিষয়ে প্রশ্ন করিলে সভাপতি বলেন—“সুভাষবাবুর নাম অন্তর্ভুক্ত না করার কারণ এই যে, তাঁহার মৃত্যু-সংবাদ এখনও নিশ্চিতরূপে সমর্থিত হয় নাই। প্রকৃত সংবাদের অভাবে কাহারও মৃত্যুতে শোক প্রকাশ করা ভাল দেখায় না।”

সত্য হটক, মিথ্যা হটক, কাহারও মৃত্যু-সংবাদে পরম শত্রুও মিত্ররূপ ধারণ করিয়া অশ্রু-নিসর্জন করে। মৃত্যুর হস্তস্পর্শে সমস্ত বিদ্বেষ ও শত্রুতা, বিভেদ ও কলহ—কোথায় দূরে সরিয়া যায়! দুর্বল মানব-প্রাণ মৃত ব্যক্তির মঙ্গল-লাভের জন্য হাহাকার করিয়া কাঁদিয়া উঠে। এইটি চিরন্তন সত্য!

সুভাষচন্দ্র চলিয়া গিয়াছেন; আজ তাঁহার জন্মও সমগ্র দেশ শোকে অভিভূত!

তাঁহার মৃত্যুতে পণ্ডিত জগদ্বরলাল নেহেরু বলিয়াছেনঃ—“আমি আমার এই পুত্রাতন এবং সাহসী সহ-কর্মীর মৃত্যু-সংবাদে স্তম্ভিত হইয়াছি। ভারতের প্রতি তাঁহার ভালবাসা কাহারও অপেক্ষা কম নহে। ভারতের এই মহৎ সন্তানের সহিত ঘনিষ্ঠভাবে মিলিবার সুযোগ আমার ১৯২০ খৃষ্টাব্দ হইতে হইয়াছিল এবং তাঁহার প্রতি আমার গভীর শ্রদ্ধা ছিল। ভারতের প্রতি তাঁহার অগাধ ভালবাসা এবং উদ্দেশ্যের সাধুতা সন্দেহের অতীত।”

সর্দার বল্লভভাই প্যাটেল বলিয়াছেনঃ—“ভারতের শ্রেষ্ঠ বীর সন্তান এবং দেশহিতব্রতীদের অগ্রণী সুভাষচন্দ্র বঙ্গর ঘটনাবল্ল জীবনের আকস্মিক অবসানে সমগ্র দেশ গভীর

শোকে আচ্ছন্ন হইয়াছে। এমন কিছুই নাই, যাহা তিনি স্বাধীনতা-সংগ্রামের জন্য উৎসর্গ করেন নাই।”

শ্রীমতী সরোজিনী নাইডু বলিয়াছেন :—সুভাষ যুত ; বলবর্গে চিত্রিত, অদ্ভুত এবং ঘটনাবহুল জীবন-নাট্যের শেষ বিয়োগান্ত দৃশ্য অভিনীত হইয়া গেল ! বল নর-নারীর নিকট তাঁহার মৃত্যু জাতীয় ক্ষতি নহে, পরন্তু ব্যক্তিগত শোকানহ ঘটনা ! তাঁহার উদগ্র গর্ভিত এবং প্রবল মনোবৃত্তি কোষযুক্ত জনস্তু তরবারির মত দেশরক্ষায় নিযুক্ত ছিল। তাঁহার জীবন ও মৃত্যু স্বাধীনতার বেদীমূলে বলিদান ভিন্ন অন্য কিছুই নহে। তিনি তাঁহার দেশ ও দেশের লোকের জন্য জীবন বিনর্জ্জন দিয়াছেন—ইহা অপেক্ষা মহত্তর ভালবাসা আর কিছুই হইতে পারে না।”

পটুভি সীতারামিন্না বলিয়াছেন :—“সুভাষ বাবুর মৃত্যু-সংবাদ আমাকে স্তম্ভিত করিয়াছে। ভারতের যুক্তির জন্য তিনি নিজের পদ নিজে দাছিয়া গাইয়াছিলেন ; উজ্জ্বল তিনি তাঁহার কংগ্রেস-সহকর্মীগণের নিকট কম প্রিয় নহেন ! যুদ্ধক্ষেত্রে তাঁহার অবস্থা পরিষ্কার হইবার জন্য সকলেই ব্যাকুল ছিলেন। যদি তিনি মৃত্যুমুখে পতিত হইয়া থাকেন, তবে সেই ব্যাকুলতা দেশব্যাপী দুঃখ-সমুদ্রে তলাইয়া যাইবে ! যদি তিনি জীবিত থাকেন, তবে তাঁহার চতুর্দিকস্থ জ্যোতির্মাণ্ডল গভীর ও উজ্জ্বল হইয়া দেখা দিবে।”

ডক্টর রাজেন্দ্রপ্রসাদ বলিয়াছেন :—“তাঁহার মৃত্যু দেশের পক্ষে একটি বিরাট দুর্ঘটনা। তাঁহার মত লোক কদাচিৎ

জন্মগ্রহণ করেন এবং যখন তাঁহারা চলিয়া যান, তখন সেই শূন্যস্থান সহজে পূর্ণ হয় না।”

খাঁ আবদুল গফুর খাঁ বলিয়াছেন :—“আমার পুরাতন সহকর্মী মিঃ সুভাষচন্দ্র বসুর মৃত্যুতে আমি শোকাহত হইয়াছি। আমরা উল্লেখ্য কংগ্রেস স্বার্থকিং কমিটির প্রদত্তরূপে একসঙ্গে কাজ করিয়াছি এবং তিনি ভারতের মঙ্গল এবং উন্নতির জন্য যত্ন রাখা করিয়াছেন, উভয় আমি তাঁহাকে শ্রদ্ধা করি।”

ডক্টর শ্যামাপ্রসাদ মুখোপাধ্যায় বলিয়াছেন :—“সত্যই যদি সুভাষচন্দ্র বসুর মৃত্যু হইয়া থাকে, তবে এই সংবাদ ভারতের সর্বত্র গভীর দুঃখে সহিত গৃহীত হইবে। দেশের সাধীনতার জন্য তিনি যথাসর্বস্ব ত্যাগ করিয়াছিলেন।”

এস. কে. পাটিল বলিয়াছেন :—“এই মৃত্যু-সংবাদে সমগ্র দেশে শোকাচ্ছায়া ছড়াইয়া পড়িয়াছে। দুর্গটনার মধ্যে আমাদের বর্তমান কালেও শ্রেষ্ঠ দেশ-সেবকের ব্যতিক্রম জীবনের অবদান হইল। তিনি তাঁহানী জীবনে যাহা কিছু করিয়াছেন, সবই দেশে প্রভে উদ্বুদ্ধ হইয়া করিয়াছেন।”

কিরণশঙ্কর রায় বলিয়াছেন :—“এখন তিনি (সুভাষচন্দ্র) ইতিহাসের অন্তর্ভুক্ত। তথাপি ভারতের প্রত্যেক গৃহে গভীর দুঃখ এবং শোকের ছায়া নিপতিত হইবে।”

স্বামী সহজানন্দ বলিয়াছেন :—“সুভাষচন্দ্রের অকাল-মৃত্যুর কথা শুনিয়া আমি গভীর ভাবে শোকাচ্ছন্ন হইয়া পড়িয়াছি। দীর্ঘকাল ব্যাপী তাঁহার সাহচর্যে আমার বিশ্বাস

হইয়াছে যে, তিনি সর্বশ্রেষ্ঠ স্বদেশপ্রেমিক। তাঁহার সমগ্র জীবন মাতৃভূমির স্বাধীনতার জন্য কঠোর ভাগের নিদর্শন।”

পাণ্ডিত্য গোবিন্দবল্লভ পণ্ডিত বলিয়াছেন :—“স্বদেশিক শাসন হইতে মাতৃভূমিকে মুক্তিদানের অসম্ভব মনোবৃত্তি দ্বারা সুভাষচন্দ্র গঠিত হইলেন। এই একটি মান উদ্দেশ্য দ্বারা প্রণেদিত হইয়া তিনি জীবন-পথে অগ্রসর হইয়াছিলেন। ভাগ্যের স্বাধীনতা-আন্দোলনের পথ হাতে হাতে চন্দ্র একটি বিশিষ্ট স্থান অধিকার করিয়াছেন।”

শ্রীমতী কমলাদেবী চট্টোপাধ্যায় বলিয়াছেন :—  
“দুর্ভটনার কালে সুভাষচন্দ্র যেরূপ এই ভারত-দেশের স্বাধীনতা-প্রাঙ্গণ করিলেন, তাহার ঐতিহাসিক মনোবৃত্তি এবং ভাগ্যের স্বাধীনতার জন্য অবিচল অনুরাগে তিনি কখনো ভাগ্য-কবিতা হইলেন। একে তাহাই তাঁহার স্বদেশ-প্রেম শ্রেষ্ঠ বীররূপে পরিণত করিয়াছে।”

শ্রীমতী বসন্তী মাস্টার বলিয়াছেন :—“সুভাষচন্দ্র নিজের উন্নতিস্বরূপ জীবন পরিহার করিয়া দেশের স্বাধীনতার কার্যে ব্যস্ত হইয়া পড়িলেন। তাহার মন-সংসাদে সমগ্র জাতি শোক-সাগরে নিমগ্ন। যে উদ্দেশ্যে তিনি আত্ম-বিসর্জন দিয়াছেন, একদিন তাহা জয়যুক্ত হইবে এবং দেশ-সেবা তাঁহার বীরত্বময় আত্মত্যাগের মূল্য দিতে সক্ষম হবে।”

শ্রীযুক্ত বিশ্বনাথ দাস বলিয়াছেন :—“আমি স্বদেশ-প্রেমিক আচার-শাচনীয় পরিণামে শোক প্রকাশ করিতেছি।

তিনি নিজের বৈশিষ্ট্যপূর্ণ উপায়ে ভারতের স্বাধীনতা লাভের চেষ্টা করিয়াছিলেন। তাঁহার স্বার্থত্যাগ ও স্বদেশপ্রেমে তাঁহার প্রতি আমাদের বরাবর একটা শ্রদ্ধা ছিল। বসু-পরিবার অনেক ক্ষতি স্বীকার করিয়াছেন; আমি তাঁহাদের এই ক্ষতিতে আমার সমবেদনা জ্ঞাপন করিতেছি।”

শ্রীমতী লাবণ্যপ্রভা দত্ত বলিয়াছেন :—“ভারতের শ্রেষ্ঠ স্বদেশপ্রেমিক সন্তান সুভাষচন্দ্র বসুর এইরূপ আকস্মিক ভাবে মৃত্যুর সংবাদে আমরা এরূপ শোকাভিভূত হইয়াছি যে, তাহা হইতে মুক্তিলাভ সুকঠিন। এইরূপ মৃত্যু বাস্তবিক শোকাবহ। ভারতের স্বাধীনতা-সংগ্রামের ইতিহাসে তাঁহার জীবন-বৃত্তান্ত একটি প্রয়োজনীয় অধ্যায়রূপে পরিগণিত হইবে।

ডক্টর পি. এন্. ব্যানার্জি বলিয়াছেন :—সমগ্র দেশ মাতৃভূমির অনুরক্ত সেবকের বিয়োগান্ত পরিসমাপ্তিতে শোক প্রকাশ করিবে।”

শ্রীযুক্ত হরেকৃষ্ণ মহতাব্ বলিয়াছেন :—“মিঃ বসুর মৃত্যুতে সমগ্র ভারত শোক প্রকাশ করিবে। তাঁহার আত্মত্যাগ, মাতৃভূমির স্বাধীনতার জন্ম জ্বলন্ত আগ্রহ, তাঁহার অসামান্য সঙ্ঘ-গঠনশক্তি—এই সমস্ত দেশের যুবকগণের সম্মুখে চিরকাল আদর্শ-স্বরূপ অবস্থিতি করিবে।”

অধ্যাপক এন্. জি. রঙ্গ বলিয়াছেন :—“ভারতে যে সমস্ত বীর জন্মগ্রহণ করিয়াছেন, সুভাষ তাঁহাদের মধ্যে শ্রেষ্ঠ। তাঁহার সাহস এবং অধ্যবসায় তাঁহার মহত্বের প্রমাণ।”

পুরুষোত্তম দাস ট্যাগুন বলিয়াছেন :—“সুভাষচন্দ্র বঙ্গর মৃত্যু-সংবাদে ব্যথিত হইয়াছি। আমাদের জন্মভূমি তাঁহার শ্রেষ্ঠ বীর সম্মানকে হারাইলেন।”

অনুগ্রহ-নারায়ণ সিংহ বলিয়াছেন :—“দেশের প্রতি সুভাষচন্দ্র বঙ্গর ভালবাসা এবং দেশের স্বাধীনতার জন্য তাঁহার অসীম উত্তমের কথা স্মরণ করে লিখিত থাকিবে : ভবিষ্যৎ বংশধরগণ বিশ্বয়-পরিপ্লুত হৃদয়ে তাঁহার জীবনের রোমাঞ্চকর কাহিনী ও তাঁহার স্বদেশপ্রেমের বিবরণ পাঠ করিবে, সন্দেহ নাই।”

প্রতাপচন্দ্র গুহরায় বলিয়াছেন :—“সমগ্র দেশ সুভাষ-চন্দ্রের অকাল-মৃত্যু-সংবাদে শোকাহত হইয়াছে। তিনি ভারতের শ্রেষ্ঠ দেশপ্রেমিক। ভারতের স্বাধীনতার জন্য জলশু ইচ্ছা লইয়া তিনি দেহত্যাগ করিয়াছেন।”

জগৎনারায়ণ লাল বলিয়াছেন :—“তাঁহার কঠোর দেশ-সেবা, মহৎ আদর্শবাদ, সর্বদাপরি আত্মোৎসর্গ ভারতের জাতীয়তার ইতিহাসে পুরুষানুক্রমে চলিতে থাকিবে।”

নয়

## সুভাষ-স্মরণে

সুভাষ-দিবস—সুভাষ-ছনোৎসব—স্বাধীনতা-দিবস—মেজর-  
জেনারেল শা নওয়াজের কলিকাতায় আগমন—ভাবের বন্যা।

সুভাষচন্দ্রের মৃত্যু-সংবাদে ভারতের বিভিন্ন স্থানে 'সুভাষ-  
দিবস' প্রতিপালিত হইয়াছে। বোম্বাই প্রথমে 'সুভাষ-দিবস'  
প্রতিপালনে অগ্রণী হইয়াছিল।

সেদিন বিভিন্ন বিদ্যালয়ের ছাত্রগণ সুভাষচন্দ্রের প্রতি  
শ্রদ্ধা জ্ঞাপনার্থ ক্লাসে অনুপস্থিত ছিল। জি. আই. পি.  
রেলওয়ের কারখানায় যে সমস্ত কর্মচারী সকালবেলা কাজ  
করিতে আসিয়াছিল, তাহারা কাজ না করিয়াই গৃহে ফিরিয়া  
গেল। ছয়টি মিল বন্ধ ছিল, শহরের বাজারও বন্ধ ছিল।

২৪শে আগস্ট তারিখে কলিকাতায় কলেজ স্ট্রীট মার্কেট-  
স্থিত বঙ্গীয় প্রাদেশিক কংগ্রেস-কমিটিদলের অ্যাসোসিয়েশন-  
গৃহে 'হাফ-মার্ট' করিয়া জাতীয় পতাকা উত্তোলিত হইল।  
সেদিন বহু বিদ্যালয়ের ছাত্রগণ ক্লাসে যোগদান করে নাই,  
বড় বাজার ও কলেজ স্ট্রীটে দোকান-পাট বন্ধ ছিল। অপরাহ্নে  
বহু ছাত্র রাস্তায় জাতীয় সঙ্গীত গান করিতে-করিতে শোভা-  
যাত্রা করিয়াছিল।

'ইণ্ডিয়ান সোশ্যালিস্ট স্টুডেন্টস্ বুরো'-অফিসে শোকসভা  
অনুষ্ঠিত হয়। বেঙ্গল প্রভিন্সিয়াল মারোয়াড়ী ফেডারেশন  
অফিস বন্ধ করা হয়। বিদ্যাসাগর কলেজের ছাত্রগণ ক্লাস

হইতে বাহির হইয়া আসে এবং ২৫শে আগস্ট তারিখে শোক-সভায় 'সুভাষ-দিবস' প্রতিপালন করে। যাদবপুর কলেজ অফ এঞ্জিনিয়ারিং অ্যাণ্ড টেকনোলজির ছাত্র ও শিক্ষক-গণ সম্মিলিত ভাবে এক সভায় নেতাজী সুভাষচন্দ্রের মৃত্যুতে দুঃখ প্রকাশ করেন।

লক্ষৌ, দিল্লী, পরাণী, রাওয়ালপিন্ডি, মুন্ডাট, পুনা সিটি, কাণপুর, আমেদাবাদ, এলাহাবাদ, পাটনা, লাহোর, নাগপুর, ওয়ার্দা, কটক, জবলপুর, শান্তি-নিকেতন, ব্যাঙ্গালোর, সিমলা, ঢাকা প্রভৃতি স্থানে ছাত্রগণ সুভাষ-দিবস প্রতিপালন করিয়াছে। বহু স্থানে পূর্ণ হরতাল অনুষ্ঠিত হইয়াছিল। এতদ্ভিন্ন নানা স্থানে সভা-সমিতির অনুষ্ঠান হয় ও শোভাযাত্রা করিয়া সকলে মৃত ব্যক্তির প্রতি শ্রদ্ধা জ্ঞাপন করে।

ইহার কয়েক মাস পরে, ১৯৪৬ সালের জানুয়ারী মাসে সচু মুক্তিপ্রাপ্ত শা নওয়াজ খাঁর কলিকাতায় আগমন ও নেতাজী সুভাষচন্দ্রের জন্মোৎসব উপলক্ষে, কলিকাতা মহানগরীর বৃক্কে আনন্দের যে বিপুল উচ্ছ্বাস বহিয়াছিল, সমগ্র পৃথিবীতেই তাহার তুলনা বিরল।

শা নওয়াজ খাঁ কলিকাতায় আসেন ২২শে জানুয়ারী; ২৩শে জানুয়ারী ছিল নেতাজী সুভাষচন্দ্রের জন্মোৎসব-দিবস; এবং ২৬শে জানুয়ারী ছিল ভারতের স্বাধীনতা-দিবস।

এই কয়েকটি ঘটনাকে কেন্দ্র করিয়া সমগ্র মহানগরী সেদিন আনন্দে উদ্বেল হইয়া উঠিয়াছিল। নেতাজীর বিশ্বস্ত অনুচর, পরম ভক্ত ও দুর্কর্ম বীর শা নওয়াজ খাঁ কলিকাতায়



পদার্পণ করিয়াই সর্ববাগ্রে নেতাজীর গৃহে উপস্থিত হইলেন ; তারপর নেতাজীর ক্ষুদ্র কক্ষে প্রবেশ করিয়াই তিনি যে দৃশ্যের সৃষ্টি করিয়াছিলেন, আজও তাহা মনে হইলে নয়ন-যুগল হইতে যেন গঙ্গা-যমুনার পুণ্য-প্রবাহ নামিয়া আসে !

সুসাহিত্যিক শ্রীমুক্ত বিজয়রত্ন মজুমদার মহাশয় তাঁহার অমর লেখনী-নিঃসৃত স্বর্ণাক্ষরে তাহা যে ভাবে গাঁথিয়া রাখিয়াছেন, আমরা তাহারই সামান্য কিছু অংশমাত্র পাঠক-পাঠিকাদিগকে উপহার দিতেছি।—

“সেই কক্ষ। এই কক্ষ-সন্নিধানে সেদিনও জনতা জমিত, আজও জনতা অপেক্ষমান ! কেদারার উপরে সুভাষের সেই ছবিখানি !

শা নওয়াজ খাঁ ভদ্র ও ভাল মানুষটির মত সিঁড়ি দিয়া উঠিলেন, তারপর গৃহে প্রবেশ করিয়া সেই ছবি—তাঁহার নেতাজীর সেই ছবিখানি সবলে বুকে চাপিয়া ধরিয়া, সে কি বালকের কান্না ! সে কি নারীর ক্রন্দন ! কোথায় ছিল এত জল ? পাষাণের তলে সাগরের উচ্ছ্বাস কত দিন ছিল, লুকানো ; কতকাল ছিল, গোপনে ? অবরোধে ? কে উন্মুক্ত করিয়া দিল অশ্রুর উৎস ?

সুভাষের সেই শয্যা ! শা নওয়াজ খাঁ খাটের নীচে জানু পাতিয়া শয্যায় মুখ লুকাইলেন ; চোখের জলে চাদর ভিজিল ; উপাধান মিত্ত হইল।—

মেজর-জেনারেল শা নওয়াজ তখনও চাদরে মুখ ঘসিতেছেন, আর অতি মৃদু, অতি ধীর, অপরাধীর কণ্ঠে

বলিতেছেন. “নেতাজী, আমি পারি নাই; নেতাজী, আমি পারি নাই ( I have failed ! I have failed ) ! নেতাজী, আমায় ক্ষমা করুন. আমি পারি নাই, আমি পারি নাই !”

নেতাজীর নিকট শা নওয়াজ খাঁ ও সমগ্র আজাদ-হিন্দ ফৌজ একদিন সাধীনতার যে ব্রত উদ্‌যাপনের জন্য প্রতিজ্ঞাবদ্ধ হইয়াছিলেন, তাহারই ব্যর্থতা স্মরণ করিয়া, কত ট্যাঙ্ক ও মেশিনগান-বিজয়ী মেজর-জেনারেল শা নওয়াজ খাঁর বীর-হৃদয় সেদিন গভীর দুঃখে কাঁপিয়া-কাঁপিয়া উঠিতেছিল !

এ দৃশ্য বর্ণনার নহে, এ দৃশ্য অনুভূতির ।

আজাদ-হিন্দ ফৌজের নিকট নেতাজী সুভাষচন্দ্র যে কি ছিলেন এবং কে ছিলেন, এই একটি মাত্র দৃষ্টান্তেই তাহা সুস্পষ্ট হৃদয়ঙ্গম করা যায় ।



দশ

## ব্যক্তিত্ব

মর্কটভ্যাগ—ভেড়স্বী—বাগ্মী—পরহুংখকাতর—বদুবৎসন  
—সতুলন স্বদেশপ্রেম—অদাম্প্রদায়িক—চির-অমর ।

সুভাষচন্দ্রের নৈতিক চরিত্রে কখনও কোন কলঙ্কের রেখা পড়ে নাই : তিনি নিষ্কলঙ্ক চরিত্র লইয়া চির-ব্রহ্মচারীর মত পরলোকে প্রস্থান করিয়াছেন ।

সুভাষচন্দ্র দেশ-মাতার জন্য যে আত্মত্যাগ করিয়া গিয়াছেন, তাহা প্রাচীন যুগে ভীষ্ম এবং ঐতিহাসিক যুগে রাণা প্রতাপের মত পীরদূট হয় : তিনি ইচ্ছা করিলে গভর্নমেন্টের উচ্চপদে অধিষ্ঠিত থাকিয়া সাধারণ বাঙালী জীবনের ভোগ-সুখে কালাতিপাত করিতে পারিতেন : নবীন যৌবন, সুন্দর-মৌখ্য আকৃতি, পাণ্ডিত্য, অখোপার্জনের সুযোগ-সুবিধা—তিনি সমস্তই দেশ-মাতৃকার হোমাননে অত্যাতি দিলেন ।

তাহার এই ত্যাগের কথা পর্যালোচনা করিলে ষষ্ঠ রাষ্ট্র-মহারাজ দিলীপের প্রাতি সিংহের উক্তি মনে পড়ে—

“একাতপত্রং জগতঃ সত্বতম্  
নবং বয়ঃ কান্তমিদং বপুষ্ট ।  
অন্নশ্চ হতোর্বহু হান্তমিচ্ছন্  
বিচারমূঢ়ঃ প্রণিভাসি মে ত্বম্ ॥”

সিংহ যখন মহারাজ দিলীপকে “বিচারমূঢ়” বদিয়া তিরস্কার করিয়াছিল, সাধারণ লোকও হয়ত সুভাষচন্দ্রকে ঠিক

সেইরূপ মনে করিবে। কিন্তু মহৎ যাঁহার উদ্দেশ্য, ক্ষুদ্রে তাঁহার তৃপ্তি কোথায়? “নাগ্নে সুখমস্তি।”

সেইজন্য মহামানবেরা আত্মস্বের প্রয়াসী হইতে পারেন না—সুভাষচন্দ্রও পারেন নাই। আই. সি. এস. পরীক্ষায় চতুর্থ স্থান অধিকার করিয়াও তিনি দাস-মনোরুতির বশীভূত হইতে পারিলেন না—হেলায় আই. সি. এস.-পদ পরিত্যাগ করিয়া অসহযোগ-আন্দোলনে যোগদান করতঃ কারাবাস ও নির্বাসনের দুঃখ-কষ্ট মাথায় তুলিয়া লইলেন।

সুভাষচন্দ্রের চরিত্রের মহৎ গুণ তেজস্বিতা। জীবনের প্রথমভাগে প্রেসিডেন্সী কলেজে যে এগিস্ফুলিজ আত্মপ্রকাশ করিয়াছিল, পরবর্তী জীবনে তাহাই কংগ্রেসে মহাত্মা গান্ধীর আপোষ-খীমাংসাকে অসার মনে করিয়া মহাত্মার বিরুদ্ধাচরণেও কুণ্ঠিত হয় নাই এবং দেশের স্বাধীনতার জন্য জীবন পণ করিয়া ভারতীয় জাতীয় বাহিনী পরিচালনায় দাবানলের সৃষ্টি করে।

বক্তৃতা দ্বারা লোককে মুগ্ধ করিবার অসামান্য শক্তি সুভাষচন্দ্রের ছিল। সহজ ও সরল ভাষায় তাঁহার মনোমুগ্ধকর বক্তৃতা শুনিবার সৌভাগ্য যাঁহাদের হইয়াছে, তাঁহারা ই সাংক্ষ্য দান করিবেন যে, এমন বক্তৃতা করিবার শক্তি খুব কম লোকেরই থাকে।

পরদুঃখে সুভাষচন্দ্রের কোমল হৃদয় কাঁদিয়া আকুল হইত। বহু বগ্না ও দুর্ভিক্ষ-পীড়িত নরনারীর সেবায় তাঁহার এই চিত্তবৃত্তির পরিচয় পাওয়া গিয়াছে। যুদ্ধকালেও তাঁহার গভীর ভালবাসা ও স্নেহ-প্রবণ হৃদয় বহুবার আত্মবিকাশ করিয়াছে।

আজাদ-হিন্দ ফৌজের অন্তর্গত বাঙ্গীর রাণী-বাহিনীর মধ্যে সর্বাপেক্ষা বয়োবৃদ্ধা ছিলেন শ্রীযুক্তা চন্দ্রমুখী দেবী। তাঁহার বয়স ৫৪ বৎসর।

ইনি আজাদ-হিন্দ ফৌজের যোগদান করিয়া নার্সের কার্যা গ্রহণ করেন এবং শেষ পর্য্যন্ত ইহাতে ছিলেন। ইনি আজাদ-হিন্দ ফৌজের বিভিন্ন হাসপাতাল এবং এমন কি, সমরক্ষেত্রের কয়েকটি হাসপাতালেও কাজ করিয়াছেন। ইনি কান্সীর রাণী-বাহিনীতে সিপাহীর পদে ছিলেন। ইহার তিনটি পৌত্র বালসেনা-দলে যোগদান করিয়াছিল।

নেতাজী সুভাষচন্দ্র এবং আজাদ-হিন্দ ফৌজের সকলেই তাঁহাকে 'মাতাজী' বলিয়া সম্বোধন করিতেন।

'মাতাজী' আনন্দনাথার পত্রিকায় ফাফ রিপোর্টের সঙ্গে আলাপ-আলোচনা-প্রসঙ্গে নেতাজী সুভাষচন্দ্র তাঁহার ফৌজের লোকদের কিরূপ গভীরভাবে ভালবাসিতেন এবং তাহাদের সেবার জন্য দারুণ বোমাবর্ষণের মধ্যেও কয়েক বার কিরূপভাবে নিজের জীবন বিপন্ন করিয়াছিলেন, তাহা ভাবাবেগে বর্ণনা করিয়াছেন।

এরূপ ধরনের একটি দৃষ্টান্ত—যাহা তিনি স্মরণে দেখিয়াছেন—বর্ণনা-প্রসঙ্গে মাতাজী বলেন যে, ব্রহ্ম-রণাঙ্গনে যুদ্ধের শেষ পর্যায়ে ব্রিটিশরা একবার রেঙ্গুনে মিয়ান হাসপাতালের উপর বোমাবর্ষণ করে। ইহা কতকটা কার্পেট-বোম্বিংয়ের গায় হইয়াছিল; দুই বর্গ-মাইল স্থান জুড়িয়া বোমা বর্ষিত হয়। ঐ হাসপাতালের অতি নিকটেই মাতাজীর বাসগৃহ ছিল। শত-শত নাগরিক এবং আজাদ-হিন্দ ফৌজ এই বোমাবর্ষণের ফলে আহত হয়। নেতাজী আহতদের দেখিবার জন্য ছুটিয়া যান।

এই সময় মাথার উপর আবার একদল বোমারু বিমান দেখা দেয় এবং ঐগুলি বোমাবর্ষণ করিতে থাকে। নেতাজীর গাড়ীটি একটি বোমার আঘাতে নষ্ট হইয়া যায়; কিন্তু নেতাজী তাহাতে কিছুমাত্র ভীত না হইয়া হাঁটিয়াই ঐ হাস-

পাতাল অভিমুখে অগ্রসর হন : তিনি তথায় উপস্থিত হইলে আহতগণ দারুণ বিপদের মধ্যেও উন্নতি হইয়া উঠেন।

নেতাজী সুভাষচন্দ্রের এই মধুর চরিত্রের জন্য আক্রান্ত হিন্দ ফৌজের প্রত্যেকটি সৈন্যও তাহাকে গভীরভাবে ভালবাসিত এবং তাহার শিক্ষা সকলে অনুরোধ সহিত মানিত ও তাহাকে ভক্তি-শ্রদ্ধা করিত। লেঃ কর্নেল চাটার্জি তাহার একটি উদাহরণ দিয়াছেন।

তিনি বলিয়াছেন, “ইক্ষল হইতে ফিরিবার সময় সৈন্যদিগকে অনেক দুঃখ-কষ্ট ভোগ করিতে হইয়াছে। এক জায়গায় একটি লোক মরণোন্মুখ হয়। ভাগ্যক্রমে তাহার ভাই তাহার কাছে আসে। অনস্বা দেখিয়া ভাই কাঁদিতে থাকে : তখন সে যোদ্ধা তাহার ভাইকে বলিল—‘তুমি কৰ্ত্তব্যহারা হইও না, আমার জন্য কাঁদিতেছ কেন? আমার দুঃখ হয় এইজন্য যে নিজের কৰ্ত্তব্য সম্পূর্ণরূপে করিতে পারিলাম না! তুমি আমার কাছে প্রতিশ্রুতি দাও যতদিন বাঁচবে, ততদিন আমার অসমাপ্ত কার্য সম্পন্ন করিতে চেষ্টা করিবে। নেতাজীকে বলিও—আমি আমার প্রাণ এখানে দিলাম কিন্তু বাঁচনা রহিয়া গেল—তাহা সম্পন্ন করিতে পারিলাম না!’—”

সুভাষচন্দ্রের প্রতিভা বলমুখী, যদিও তাহা কেবল দেশের স্বাধীনতা-লাভের উপায়-উদ্ভাবনেই নিরত ছিল। দেশের শিল্প-বাণিজ্যের জন্য প্রতিষ্ঠিত ‘বেঙ্গল সদেশী লীগ’ দ্বারা তিনি দেশের অর্থনীতিক উন্নতির নিষয়েও মনোনিবেশ করিয়াছিলেন। দর্শনের ছাত্র হিসাবে জগৎকে নূতন কোন মতবাদ প্রদান করাও হয়ত তাহার পক্ষে অসম্ভব হইত না; কিন্তু যে দর্শন-শাস্ত্রের চর্চায় তাহার জীবন আরম্ভ, সেই নিষয়ের মধ্যে ডুবিয়া থাকিবার অবকাশ তিনি পান নাই—নতুবা আজ পৃথিবী হয়ত সক্রোটস, প্লেটো, অ্যারিস্টটল, কার্ট, হেগেল,

শঙ্কর, রামানুজ প্রভৃতি দার্শনিকগণের মত সুভাষচন্দ্রের নিকট হইতেও জীবনের ব্যাখ্যায় কোন নূতন ভাব লাভ করিতে পারিত।

সুভাষচন্দ্রের রহস্যজনক অন্তর্কানে তাঁহার অপূর্ব উদ্ভাবনী শক্তির পরিচয় পাওয়া যায়। যোগল-যুগে আওরঙ্গজেবের রাজধানী দিল্লী হইতে মহারাষ্ট্র-সাম্রাজ্যের প্রতিষ্ঠাতা ছত্রপতি শিবাজীর পলায়নের মত সুভাষচন্দ্রের পলায়নও অভিনব কৌশলের পরিচায়ক।

সর্বোপরি সুভাষচন্দ্রের স্বদেশপ্রেম অতুলনীয়। তাঁহার অতি বড় শত্রুকেও স্বীকার করিতে হইবে যে, তাঁহার স্বদেশ-প্রেম জীবনে-মরণে, শয়নে-স্বপনে অবিরাম-গতিতে জন-প্রপাতের বারিরাশির মত উদ্দামবেগে ছুটিয়া চলিত—কোন-রূপ বাধাবিঘ্ন মানিত না। দেশের পরাধীনতায় তাঁহার অন্তরলোকে যে বেদনার সুর বজ্রত হইত, তাহাই তাঁহাকে অগ্নি-দগ্ধ খণ্ডের মত সুদূরের পথে লইয়া গিয়াছিল।

ফিলিপাইনের স্বাধীনতা-শহীদ জোস্ রিজলের মর্ম্ম-মূর্তিতে সুভাষচন্দ্রের মাল্যদানের যে মর্ম্মস্পর্শী বিবরণ সাংবাদিক হাসিওয়ারার বিবৃতি হইতে ‘আনন্দবাজার পত্রিকা’ উদ্ধৃত করিয়াছেন, নিম্নে প্রদত্ত সেই বিবরণ পাঠ করিলে স্পষ্টই হৃদয়ঙ্গম হইবে, পরাধীনতার মর্ম্মজ্বালা তাঁহার প্রাণে ছিল কত গভীর—আর যাঁহারা পরাধীনতার শৃঙ্খল মোচন করিতে যাইয়া স্বাধীনতার বেদীমূলে আত্মবিসর্জন দিয়াছেন, তাঁহাদের প্রতিও সুভাষচন্দ্রের হৃদয়ের অন্তস্তলে যে কি বিপুল পরিমাণে শ্রদ্ধা সঞ্চিত ছিল! স্বদেশপ্রেমের সাধক সুভাষচন্দ্রের ইহা এক সবাক্ উজ্জ্বল চিত্র।

“১৯৪৩ সালের নভেম্বর মাস। চমৎকার একটি দিন—ম্যানিলার সমুদ্রোপকূলে লুনেটা পার্কে সুভাষচন্দ্র গেলেন

জোস্‌ রিজলের মর্মর-মূর্তিতে মালাদান করিতে। এই মূর্তিটি খুবই প্রসিদ্ধ, কেননা জোস্‌ রিজল ছিলেন ফিলিপাইনের শ্রেষ্ঠ দেশপ্রেমিক এবং মুক্তি-সংগ্রামের লহীদ।

মূর্তির পাদদেশে শত-শত ভারতীয়ের এক পিরাট জনতা স্মৃতিচন্দ্রে ধরিয়া ধরিল। তাঁহারা সবাই থাকে ম্যানিলা কিংবা তাহার চতুর্পার্শ্ববর্তী অঞ্চলে। জনতা 'অয়-হিন্দ' ধ্বনিতে বসুকে জানাইল তাহাদের অভিমন্দন। ফটোগ্রাফাররা ফটো তুলিলে—বসু-দাঁড়াইলেন জনতার সঙ্গে।

ফটো লওয়া শেষ হইল। বল্লভন কাটয়া গেল; তিনি নড়েন না। জনতাও নিস্তরু—গভীর নীরবতার মধ্যে মৌন, অচঞ্চল দৃষ্টিতে রিজলের মূর্তির দিকে স্মৃতিচন্দ্র তাকাইয়া রহিলেন।

স্বাধীন ভারতের প্রতীক অঙ্কিত আন্দোল-হিন্দ পতাকা প্রভাত-সমীরণে ইতস্ততঃ আন্দোলিত, পিরাট মূর্তির পাদদেশে স্মৃতিচন্দ্রের অর্পিত ফুলের রাশি—এক কথায় সমগ্র অনুষ্ঠানটি উৎসবের রূপ ধারণ করিয়াছিল। সাংগ্ৰহে প্রতীক্ষমাণ নীরব জনতার সম্মুখে তিনি সতৃষ্ণ নয়নে মূর্তির দিকে তাকাইয়া রহিলেন।

এইরূপ ঘটনায় কেহ-কেহ হয়ত স্মৃতিচন্দ্রে ভাবপ্রবণ বলিয়া মনে করিবেন; কিন্তু তাঁহার সহিত কখনও যদি কাহারও আলাপ হইয়া থাকে, তাহা হইলে এইরূপ ধারণা হইবে বলিয়া আমার মনে হয় না। পক্ষান্তরে, আমার বল সহকর্মী আমাকে বলিয়াছেন যে, তাঁহারা তাঁহার শাস্ত্র সমাহিতভাব এবং গভীর চিন্তাশীল ব্যক্তিরে আকৃষ্ট হইয়াছেন। সাংবাদিক-সম্মেলনে তাঁহার আচরণ ধীর-স্থির অথচ অতীব দৃঢ়। তিনি কদাচিৎ হাসিতেন, কিন্তু হাসিলে মৃদু ও মধুর হাসি হাসিতেন। আমার মনে হয় যে, হৃদয়বেগ ও গায়বুল্লির মধ্যে তিনি অবিচলিত সাম্য রক্ষা করিতেন।”



বিদেশে ভারতীয়দিগের হৃদয় সুভাষচন্দ্রের প্রতি কি পরিমাণে আকৃষ্ট হইয়াছিল, তাহা জব্বলপুর ক্যাম্প-জেল হইতে সচুমুক্ত সাতজন ভারতীয় জাতীয় বাহিনীর সৈনিক, এলাহাবাদের বাদসাহীমণ্ডী কংগ্রেস-কমিটির সম্বন্ধনা-সভায় বিগত ৫ই নভেম্বর ( ১৯৪৫ ) সন্ধ্যাকালে বিবৃতিদান-প্রসঙ্গে বলিয়াছেন ।

তাহারা বলিয়াছেন, সুভাষচন্দ্রকে স্বর্ণ-পদ্মিমাপে ওজন করা হইয়াছিল । এই স্বর্ণ দক্ষিণ-পূর্ব এসিয়ায় প্রতিষ্ঠিত জাতীয় ব্যাঙ্কের সম্পত্তিরূপে গণ্য হইয়াছিল । কেবল তাহাই নহে, বিদেশে সুভাষচন্দ্র এত গভীর সম্মান ও মর্যাদা লাভ করিয়াছিলেন যে, তাহার গলদেশের একটি সামান্য পুষ্পমালাও জনৈক ব্যবসায়ী তাহার ধখাসর্বস্ব ব্যয়ে, বারো লক্ষ টাকা মূল্যে ক্রয় করিয়া লইয়াছিলেন ! আর কোন এক বক্তৃতা-সভায় নেতাজী সুভাষচন্দ্রের পাদমূলে যে ভক্তির অর্ঘ্য পড়িয়াছিল, তাহার মূল্য সামান্য দু' একশত টাকা নহে—তাহার মূল্য আট কোটি টাকা !

দিল্লীর সামরিক আদালতে ক্যাপ্টেন শা নওয়াজ প্রভৃতির বিচারকালে সুভাষচন্দ্রের কতকগুলি টেলিগ্রাম প্রামাণ্য দলিলরূপে গৃহীত হইয়াছিল । সেই সংরক্ষিত টেলিগ্রামগুলিতেও সুভাষচন্দ্রের দৃঢ়চিত্ততা ও স্বাধীনতার উদগ্র আকাঙ্ক্ষা মূর্ত হইয়া উঠিয়াছে ।

১৯৪৫ তারিখের অমৃতবাজার পত্রিকা হইতে উক্ত টেলিগ্রামগুলির সংক্ষিপ্ত বিবরণ নিম্নে উদ্ধৃত হইল ।—

“১৯৪৪ খৃষ্টাব্দের ২১শে জুলাই তারিখে সুভাষচন্দ্র বঙ্গ জাপানের প্রধান মন্ত্রী জেনারেল কইমোকে জানাইয়াছেন যে, পূর্ব-এসিয়ার ভারতবাসীরা জাপানের সহিত পাশাপাশি দাঁড়াইয়া জয়লাভ না হওয়া পর্য্যন্ত যুদ্ধ করিতে কৃতসঙ্কল্প ।

অন্য একখানি টেলিগ্রামে সুভাষচন্দ্র জাপানী-প্রতিষ্ঠিত

স্বাধীন-ব্রহ্মের শাসনকর্তা ডক্টর বা-ম'কে ভারতের স্বাধীনতা অর্জনের জন্য সংগ্রামে সাহায্য-হেতু অভিনন্দিত করিয়াছেন। ইহাতে তিনি আরও জানাইয়াছেন যে, যে-কোন অবস্থায় আমরা, ভারতীয়েরা—স্বাধীন-ব্রহ্ম ও জাপানের পাশে দাঁড়াইয়া যুদ্ধ করিতে দৃঢ়সঙ্কল্প, যতক্ষণ না আমাদের সাধারণ শত্রু চর্ণ হইয়া যায় এবং আমাদের জয়লাভ হয়।

একস্থানি টেলিগ্রামে সুভাষচন্দ্র জাপানী বৈদেশিক মন্ত্রী সিগামিৎসুর রাষ্ট্রপরিচালনা-নীতি ও কৌশলের প্রশংসা করিয়া বলিতেছেন যে, আমাদের পুরোভাগে দুঃসময় সত্ত্বেও আমরা জাপানের পাশে দাঁড়াইয়া আমাদের সাধারণ শত্রুর বিরুদ্ধে যুদ্ধ করিব, যতক্ষণ না বিজয়লাভ করিতে পারি।”

কিন্তু হতভাগ্য দেশ এই ভারতবর্ষ! নতুনা এত বড় একজন আদর্শ নেতা লাভ করিয়াও আমরা তাঁহাকে হারাইয়া বসিয়াছি! গতবারের জনশ্রুতির ল্যায়, এবারও যদি তাঁহার মৃত্যু-সংবাদ অচিরে মিথ্যা প্রমাণিত হয়, তবেই যা কিছু আশা ও সাহস!

সুভাষচন্দ্রের মৃত্যু-সংবাদ অবশ্য মনেকেই বিশ্বাস করেন না; বিভিন্ন জ্যোতিষীর গণনা যদি সত্য বলিয়া গ্রহণ করা যায়, তাহা হইলেও বিশ্বাস করিতে হইবে যে, এখন তাঁহার মৃত্যু হওয়া অসম্ভব! কিন্তু নানা লোকের নানা বিশ্বাস ও মতবাদ, এবং নানা জ্যোতিষীর নানা ভবিষ্যদ্বাণী কি প্রামাণ্য বলিয়া আঁকড়াইয়া ধাকা যায়? কাজেই সুভাষচন্দ্র আমাদের নাই, তাঁহাকে আমরা হারাইয়াছি, আজ এই কথাটাই যেন সত্য হইয়া বড় বেশী বেদনাদায়ক হইয়া উঠিয়াছে!

আশার মধ্যে শুধু এইটুকু যে সম্প্রতি ভারতের নানাস্থান হইতে গুটিকয়েক সংবাদ রটিতেছে কেহ-কেহ নাকি নেতাজী সুভাষচন্দ্রকে ভারতবর্ষেই বিভিন্ন স্থানে বিভিন্ন অবস্থায় দেখিতে পাইয়াছেন! মার্কিং সাংবাদিকও নাকি

সুভাষচন্দ্রের অগ্রজ শরৎচন্দ্রকে জানাইয়াছেন যে, নেতাজী জীবিত আছেন, ইহাই নাকি মার্কিন গোয়েন্দার অভিমত। যাঁহারা পূর্বেবাক্তরূপ ঘোষণা করিয়াছেন, জানি না তাঁহাদের সেই ঘোষণার মূল্য কতখানি! সুতরাং আশা ও নিরাশার দ্বন্দ্ব সমগ্র ভারতবর্ষ আজ বিভ্রান্ত ও মুহমান! সকলেরই মনে এক প্রশ্ন—সুভাষচন্দ্র জীবিত কি মৃত?

ইহার জবাব দিয়াছেন শ্রদ্ধাম্পদ সাহিত্যিক ও নেতাজী সুভাষচন্দ্রের গুণমুগ্ধ মুহম্মদ শ্রীযুক্ত বিজয়রত্ন মজুমদার মহাশয়। তিনি বলিয়াছেন :—

“সুভাষচন্দ্র জীবিত অথবা লোকান্তরিত, কেহ জানে না! আই. এন. এ.র (Indian National Army—আজাদ-হিন্দ ফৌজ) দৃঢ় বিশ্বাস, সুভাষচন্দ্র জীবিত; সুভাষচন্দ্রের দেশ-বাসী মনে করে, পরাধীন ভারতের চির-জাগ্রত খাত্তার মত ভারতের মুক্তিকামী সুভাষচন্দ্র মৃত্যুঞ্জয়ী, অবিনশ্বর।

কিন্তু তিনি জীবিত অথবা মৃত, তাহাতে কিছু আসে যায় না। গ্যারিবল্ডি কি মরিয়াছেন? শিবাজী কি মৃত? রাণা প্রতাপসিংহ চিরদিন অমর। জর্জ ওয়াশিংটনের বিনাশ নাই। নেতাজী সুভাষচন্দ্রও চিরজীবী।

শুধু ভারতের নয়, শুধু এশিয়ার নয়, পৃথিবীর যেখানে যে দেশে, যে কোন পরাধীন জাতি আছে, সেই খানেই, সেই দেশে, সেই মানব-সমাজের প্রত্যেকটি নরনারী সুভাষচন্দ্রের নামের পাদমূলে পুষ্পাঞ্জলি দিয়া ধন্য ও কৃতার্থমন্ড হইবে।”

আমরাও তাঁহাকে ভক্তিপূত হৃদয়ে শ্রদ্ধানত শিরে আমাদের প্রণতি জানাইতেছি এবং তাঁহারই প্রদত্ত অমর বাণীতে তাঁহাকে সাদর সম্ভাষণ নিবেদন করিতেছি—“জয় হিন্দ! দিল্লী চলো!”

কাল্পনিক, তাঁহার সেই দিল্লী-অভিযান আজও তো শেষ হয় নাই!

সমাপ্ত



## শিক্ষাবিভাগ কর্তৃক প্রাইজ ও লাইব্রেরীর জন্য অনুমোদিত

( কয়েকখানি ছেলেমেয়েদের ভাল গল্পের বই )

নেতাজী সুভাষচন্দ্র (জীবনী)	১১	কাঞ্চনজঙ্ঘা সিরিজ
প্রতাপসিংহ (ছেলেদের নাটক)	১০	প্রহেলিকা সিরিজ
আব্রাহাম লিঙ্কন	১১	ডিটেক্টিভ শিশু-উপন্যাস
ছোঃ শাহনামা	১১	রাতের অতিথি
বানী (মেয়েদের নাটক)	১০	স্বপ্ন হলো সত্যি
জীবজগতের আজব কথা	১১০	সূর্য্যনগরীর গুপ্তধন
ষাট-বিছা	১১	মিঃ গন্ ডিটেক্টিভ
রক্তযুধী জাগণ	১১	কাল বৈশাখী ঝড়
জীবজগতের আজব কথা	১১০	ডাকাত কালীর জঙ্গলে
উদোর গিণ্ডি বুধোর ঘাড়ে	১১০	রাত্রির ষাত্রী
আলপনা	৭	অদৃশ্য গোয়েন্দা
সমুদ্রজয়ী কলমাস	১১	অস্ত্রাচলের পথে
কবি অরবিন্দ	১১	দেশের ডাক
বলদেবি হিটলার	১১	দরদী বন্ধু
রক্তযুধীপের বিভীষিকা	১১	গ্রহের কেয়
নিশির ডাক	১১	হাওয়ার পিছনে
বিষের তীর	১০	নৈশ অভিযান
ষাটকর মার্কনী	১১	হত্যার প্রতিশোধ
রাকুসে আফ্রিকা	১১	গুপ্ত-ঘাতক
দুই ভাই	১১০	রাত যখন ৭টা
বর্ষমঙ্গল	৭	ঝড়ের প্রদীপ

দেব সাহিত্য-কুটীরা—২২১৫ বি, বামাপুকুর লেন, কলিকাতা











